

# JON

*Qotei a tamo bulyosiqa gago ambleq di soqnej*

<sup>1</sup> Tulañ nami ingi ingi kalil brantosaisonabqa Anjam a soqnej. Anjam a Qotei ombla soqneb. Anjam a segi Qotei.

<sup>2</sup> Tulañ nami Anjam a Qotei ombla soqneb.

<sup>3</sup> Anjam a singila ti soqnej. Singila dena Qotei na ingi ingi kalil gereiyej. Ingi bei gam bei na brantosai. Ingi ingi kalil brantelerjeb qaji di Anjam a segi na gereiyej.

<sup>4</sup> Anjam a segi ñambile qa utru. Ñambile di puloñ bul. Ñambile dena tamo ungasari nañgi suwantnjreqnu.

<sup>5</sup> Pulon di ambruq di suwanjeqnu. Ambru na pulon di mosotqa keresai.

<sup>6</sup> Tamo bei brantej aqa ñam Jon. Qotei na a qarinyonaq bej.

<sup>7</sup> A bosıqa pulon qa anjam palontoqnej. Di kiyaqa? Tamo ungasari kalil nañgi aqa anjam quisib pulon qa nañgo areqalo singilatqajqa deqa.

<sup>8</sup> Jon a pulon sai. A pulon qa anjam palontqajqa bej.

<sup>9</sup> Pulon di pulon bole. A mandamq aisiqa tamo ungasari kalil nañgi suwantnjreqnu.

<sup>10</sup> Anjam a mandamq di soqnej. Aqa singila na Qotei a mandam atej. Ariya tamo ungasari mandamq di soqneb qaji nañgi a qa poinjrosai.

<sup>11</sup> A aqa segi qure utruq ainaqa aqa leñ qujai nañgi a areiyosai.

**12** Ariya tamo uŋgasari a areiyosib aqa ñam qa naŋgo areqalo singilateb qaji naŋgi a na giltnjrnaqa naŋgi Qotei aqa aŋgro tiŋtiŋ branteb.

**13** Ai abu na ɣambabtnjro qaji naŋgoq dena naŋgi Qotei aqa aŋgro brantosai. Naŋgo segi areqalo na naŋgi Qotei aqa aŋgro brantosai. Tamo bei aqa areqalo na dego naŋgi Qotei aqa aŋgro brantosai. Qotei a segi na marnaqa naŋgi aqa aŋgro tiŋtiŋ branteb.

**14** Anjam di a tamo bulyosiqa gago ambleq di soqnej. Sonaqa iga aqa ñam koba ti aqa siŋgila koba ti unem. A segi qujai Qotei aqa Niri. A iga qa are tulaŋ boleiyeqnu. A segi anjam bole qa utru.

**15** A qa nami Jon a anjam palontoqnsiqa endegsi leleŋoqnej, “E nami maroqnem, ‘Tamo di a ijo qoreq na bqas. E ɣambabosaisonamqa a nami soqnej. Deqa a na e tulaŋ buŋbejunu.’ ”

**16** Qotei aqa Niri a iga kalil qa are tulaŋ boleiyeqnu. Aqa kumbra dena a na iga tulaŋ geregereigeqnu.

**17** Bole, nami Qotei a Moses aqa wau na iga dal anjam egej. Ariya Yesus Kristus aqa wau na Qotei a iga qa are boleiyosiqa anjam bole egej.

**18** Tambo bei na Qotei aqa ulatamu unosai. Qotei aqa Niri a na qujai iga Qotei osorgej. Qotei aqa Niri a segi Qotei. A aqa Abu aqa areq di sosiq beteryejunu.

### *Jon yansnjro qaji a anjam palontoqnej*

**19** Bati bei Juda tamo kokba naŋgi na atra tamo ti Livai naŋgi ti qariŋnabrqa Jerusalem qure uratosib Jon aqa areq gilsib nenemyeb, “Ni tamo yai?”

**20** Ariya Jon a anjam ultosai. A segi qa ubtosiqa minjrej, “E Kristus sai.”

**21** Onaqa naŋgi na olo nenemyeb, “Deqa ni tamo yai? Ni Elaija kiy?” Onaqa a na minjrej, “Sai.” Onaqa naŋgi na olo nenemyeb, “Ni Qotei aqa medabu o tamo iga a qa tarinjeqnum qaji tamo de kiyo?” Onaqa a na kamba minjrej, “Sai. E a sai.”

**22** Deqa olo nenemyeb, “Ni tamo yai? Ni segi qa kiyersi mareqnum di geregere mergimqa iga olo aisim tamo naŋgi iga qariŋgonub qaji di minjrqom.”

**23** Onaqa Jon na minjrej, “Nami Qotei aqa medabu o qaji tamo Aisaia a anjam endegsi neŋgreŋyej, ‘Tamo bei a wadau sawaq di tulan leleŋqoqnsim tamo uŋgasari naŋgi minjroqnaqas, “Tamo Koba a bqajqa gam gereiyetiy.”’ Aisaia a nami anjam degsi neŋgreŋyej. Gam gereiyqa tamo agi e segi.”

**24** Tamо naŋgi di Farisi naŋgi na qariŋnernab Jon aqaq gileb.

**25** Deqa naŋgi olo Jon nenemyeb, “Ni Kristus sai. Ni Elaija sai. Ni Qotei aqa medabu o qaji tamo di sai. Deqa ni kiyaqa tamo uŋgasari naŋgi yansnjreqnum?”

**26** Onaqa Jon na kamba minjrej, “E ya na naŋgi yansnjreqnum. Ariya nungo ambleq di tamo bei unu. Niŋgi a qa qaliesai.”

**27** A ijo qoreq na bqas. A ñam ti unu. E ñam saiqoji. Deqa e na a kaŋgalyqajqa e tamo bolesai.”

**28** Jon a Betani qureq di naŋgi anjam degsi minjroqnej. Betani qure di Jordan ya taqal beiq di unu. Dia Jon na tamo uŋgasari naŋgi yansnjroqnej.

*Yesus a Qotei aqa Kaja Du*

<sup>29</sup> Nebeonaqa Yesus a walwelosiq Jon aqa areq beqnaqa unsiq marej, “Ningi uniy. Tamo di a Qotei aqa Kaja Du. A na qujai tamo ungasari mandamq endi unub qaji nañgo une kobotetnjqras.

<sup>30</sup> E tamo deqa nami endegsi merηgoqnem, ‘A ijo qoreq na bgas. E ηambabosaisonamqa a nami soqnej. Deqa a na e tulañ buñbejunu.’

<sup>31</sup> E nami a qa qaliesai. Ariya Israel nañgi a qa qalieqajqa deqa e bosim ya na tamo ungasari nañgi yansnjreqnum.”

<sup>32</sup> Jon a nañgi degsi minjrsiqa olo minjrej, “Qotei aqa Mondor a lañ qure uratosiq binon bulosiq mandamq aisiqa Yesus aqa gateq di awoonaq e unem.

<sup>33</sup> E nami Yesus qa qaliesai. Ariya Qotei agi e ya na tamo ungasari nañgi yansnjrqajqa qariñbej qaji a na merbej, ‘Ijo Mondor Bole a aisim tamo bei aqa gateq di awoamqa ni unqam. A na qujai Mondor aqa siñgila na tamo ungasari nañgi yansnjroqnqas.’

<sup>34</sup> Qotei na e degsi merbonaqe e tamo di unsim marem, ‘Bole, a Qotei aqa Niri.’ ”

### *Tamo qalub nañgi Yesus dauryeb*

<sup>35-36</sup> Olo nebeonaqa Jon aqa aŋgro aiyel nañgi ti koba na tigelesonabqa Yesus a walwelosiq gile-qnaqa Jon na unsiqa nañgi aiyel minjrej, “Ningi uniy. Tamo di a Qotei aqa Kaja Du.”

<sup>37</sup> Degsi minjrnaqa nañgi aiyel Jon dauryqa uratosib olo Yesus dauryosib gileb.

<sup>38</sup> Onaqa Yesus a bulosiqa nañgi aiyel a dauryosib beq nabqa unjrsiqa nenemnjrej, “Ningi aiyel kiyaqa e daurbeqnub?” Onaqa minjeb,

“Rabai, ni tal qabia unum?” Ñam “Rabai” di Hibru anjam. Gago anjam, “Qalie Tamo Koba.”

<sup>39</sup> Onaqa Yesus na naŋgi aiyel minjrej, “Ningi bosib ijo tal uniy.” Onaqa naŋgi Yesus dauryosib gilsib tal a soqnej qaji di uneb. Unsib senj batı 4 onaq bilaqtej deqa naŋgi a ombla soqneb.

<sup>40</sup> Tamo aiyel Jon aqa anjam quſib Yesus dauryeb qaji bei aqa ñam Andru. A Saimon Pita aqa was.

<sup>41</sup> A Yesus uratosiq walwelosiq aqa was Saimon itosiq minjej, “Iga Mesaia unonum.” Ñam “Mesaia” di Hibru anjam. Gago anjam, “Kristus.”

<sup>42</sup> Degsi minjsiqa Saimon osiq Yesus aqa areq osi gilej. Onaqa Yesus na Saimon unsiqa minjej, “Ni Saimon. Ni Jon aqa ɻiri. Bunuqna ino ñam Sifas mermoqnqab.” Ñam “Sifas” di Hibru anjam. Gago anjam, “Pita.” Aqa damu, “Meniŋ.”

### *Yesus a Filip Nataniel wo naŋgi metnjrej*

<sup>43</sup> Olo nebeonaqa Yesus a Galili sawaq gilqa osiqa tamo bei aqa ñam Filip itosiq minjej, “Ni e daurbe.”

<sup>44</sup> Filip a Betsaida qure qaji. Di Andru Pita wo naŋgo qure utru.

<sup>45</sup> Onaqa Filip a aisiqa tamo bei aqa ñam Nataniel itosiq minjej, “Ni au. Iga tamo a qa nami Moses marsiq dal anjamq di neŋgreŋyej qaji a unonum. Qotei aqa medabu o qaji tamo naŋgi dego a qa maroqnsib neŋgreŋyoqneb. Tamo di Yesus Nasaret qure qaji. A Josep aqa ɻiri.”

<sup>46</sup> Onaqa Nataniel na kamba Filip minjej, “Nasaret di qure kiñala. Di qure kobaquja sai. Tamo bole bei a qure dena brantqa kere kiyo?” Onaqa Filip na minjej, “Ni bosim tamo di unime.”

**47** Onaqa Nataniel a walwelosiq Yesus aqa areq beqnaqa unsiqa a qa marej, “Nin̄gi uniy. Tamo di a Israel tamo bolequja. A gisan̄ anjam marosaieqnu.”

**48** Onaqa Nataniel na Yesus nenemyej, “Ni kiyersi e qa qalieonum?” Onaqa Yesus na kamba minjej, “Filip a ni metmosaisonqa ni qura utruq di awesonamqa e ni numonum.”

**49** Onaqa Nataniel a Yesus aqa anjam di qusiqa minjej, “O Qalie Tamo Koba, ni degsi maronum deqa e poibqo, ni Qotei aqa Niri. Ni Israel nañgo Mandor Koba.”

**50** Onaqa Yesus na kamba minjej, “Ni qura utruq di awesonam e ni numonum e degsi ubtosim mermonumqa ni qusim ino areqalo e qa singilatonum e? Di ijo singila kiñala segi e babtonum. Bunuqna e ijo singila kokba babtoqnit ni unoqnqam.”

**51** Osiqa nañgi kalil minjrej, “Nin̄gi quiy. E bole merñgwai. E segi Tamo An̄gro. Deqa bunuqna lañ waqamqa Qotei aqa lañ an̄gro nañgi ijo jejamuq na lañ qureq oqoqnsib olo mandamq aiyoqnib nin̄gi unjrqab.”

## 2

### *Tamo bei uña bañ ojqa bati brantej*

**1** Bati aiyel koboonaqa Kana qure agi Galili sawaq di unu dia tamo bei uña bañ ojqa bati brantej. Deqa tamo uñgasari nañgi koroosib ingi goiyeb. Anjam qarinyonab Yesus aqa ai a koro deq gilej.

**2** Yesus aqa an̄gro nañgi ti dego metnijnab koro deq gileb.

**3** Koroosib iŋgi uyeqnabqa wain saiinjrnaqa Yesus aqa ai na minjej, “Naŋgi wain saiinjrqo.”

**4** Onaqa Yesus na minjej, “Ai, di ino wau. Di ijo wau sai. Ijo wauqa batı brantosaiunu.”

**5** Onaqa aqa ai na kaŋgal tamo naŋgi endegsi minjrej, “Yesus a anjam kiye mernŋimqa di dauryiy.”

**6** Tal dia ya nobu 6 kokba meniŋ na gereiyo qaji atelenjonab soqneb. Juda naŋgi Qotei pailyqa oqnsib ya nobu dena ya tigoqnsib nango baŋ ti jejamu ti yansoqneb. Deqa ya nobu di atelenjonab soqneb. Ya nobu quja quja 100 lita.

**7** Ariya Yesus na kaŋgal tamo naŋgi minjrej, “Ya nobu di maqteleniy.” Onaqa naŋgi ya nobuq di ya qameleŋonab maqeј.

**8** Onaqa Yesus na olo minjrej, “Ya bei tigsib osi gilsib goiyo lanja a yiу.” Onaqa kaŋgal tamo naŋgi Yesus aqa anjam di dauryosib ya bei tigsib osi gilsib goiyo lanja a yeb.

**9** Ya di Yesus na bulyonaq wain babej. Wain babonaqa goiyo lanja a uyo oneiyosiq marej, “Endi wain bolequja.” Wain di qabe na bej di a qaliesai. Kaŋgal tamo ya tigeб qaji naŋgi segi qalie. Onaqa goiyo lanja a na tamo uŋa baŋ ojeq qaji di metonaq aqa areq bonaq minjej,

**10** “Bati gaigai tamo naŋgi iŋgi goiyoqnsib wain qaqatiŋ bole namo tamo naŋgi anainjreqnab uyeqnub. Uyeqnab olo bunu wain qaqatiŋ bolesai di anainjreqnub. Ariya ni degyosai. Ni wain qaqatiŋ bole tentosim namo wain qaqatiŋ bolesai anainjronum uy'onub olo bunu wain qaqatiŋ bole anainjronum.”

**11** Yesus a Kana qureq di mañwa di babtej. Kana qure agi Galili sawaq di unu. A nami mañwa bei babtosaioqnej. Bati di qujai a na mañwa babtqa utru atej. Mañwa dena a na aqa segi ñam koba ti aqa singila koba ti boleq atej. Onaqa aqa angro nañgi mañwa di unsibqa a qa nañgo areqalo singilateb.

**12** Ariya uña ban ojqa bati di koboonaqa Yesus aqa was nañgi ti aqa angro nañgi ti aqa ai koba na Kana qure uratosib Kaperneam qureq gileb. Gilsib dia bati qudei soqneb.

### *Tamo nañgi atra tal miliq di iñgi iñgi qariñyoqneb*

**13** Qotei a nami Israel nañgi Isip sawaq di padalqa laqnabqa nañgi elenej. Deqa olo are qalqajqa yori bati jojomonaqa Yesus a Jerusalem aiyej.

**14** Aisiq atra tal kobaquja miliq gilej. Gilsiga ñam atej di tamo nañgi na makau ti kaja ti binon ti qariñyeqnaqbqa tamo qudei na awaiyeqnaq unjrej. Silali piloqneb qaji tamo nañgi nañgo awo jaramq di awesosib silali pileqnabqa nañgi dego Yesus na unjrej.

**15** Unjrsiqa raunga osiq dena toqon gereiyosiq ganinþyoqnsiq nañgi kalil nañgo kaja ti nañgo makau ti winjrnaqa atra tal uratosib jaraiyeb. Silali piloqneb qaji tamo nañgi dego winjrsiq nañgo awo jaram bilbelyosiq silali bimbleñyetnjrej.

**16** Osiqa tamo nañgi binon qariñyoqnsibqa dena silali oqneb qaji nañgi endegsi minjrej, “Niñgi binon di eleñosib jaraiyyi. Niñgi na ijo Abu aqa tal endi iñgi qariñyo tal bulyaib.”

**17** Onaqa Yesus aqa aŋgro naŋgi aqa kumbra di unsibqa Qotei aqa anjam bei neŋgreŋq di so qaji deqa olo are qaleb. Agi nami endegsib neŋgreŋyeb, “O Abu, e ino tal qa tulan arearetbqo. Deqa e ino tal bole sqajqa siŋgilaeqnum.”

**18** Yesus na tamo naŋgi di winjrnaqa Juda tamo kokba naŋgi unsibqa deqa nenemyeb, “Ni maŋwa kiye babtim dena iga poigwas, ni Qotei aqa ñam na kumbra endi yeqnum?”

**19** Onaqa Yesus na kamba minjrej, “Ningi na atra tal kobaquja endi koŋgrontibqa bati qalub qa e olo tigeltqai.”

**20** Onaqa naŋgi na minjeb, “Atra tal endi gereiye-qnab wausau 46 koboej. Ni kiyaqa bati qalub qa olo tigeltqa maronum? Keresai.”

**21** Yesus a atra tal qa marej di aqa segi jejamu sigitosiqa yawo anjam marej.

**22** Deqa bunuqna a subq na tigelonaqa aqa aŋgro naŋgi aqa anjam deqa olo are qalsibqa Qotei aqa anjam nami neŋgreŋyeb qaji deqa poinjrnaqa Yesus qa naŋgo areqalo siŋgilateb.

### *Yesus a tamo kalil naŋgo kumbra qa qalie bole*

**23** Qotei a nami Israel naŋgi Isip sawaq di padalqa laqnabqa naŋgi elenjej. Deqa olo are qalqajqa yori bati brantonaqa Yesus a Jerusalem di sosiqa maŋwa babteqnaqa tamo uŋgasari tulan gargekoba naŋgi unoqnsib aqa ñam qa naŋgo areqalo siŋgilatoqneb.

**24** Ariya Yesus a naŋgi areinjrosai. A tamo kalil naŋgi qa qalie bole.

**25** A powo bei qa truquosaieqnu. Deqa tamo bei na tamo nañgi qa ubtosim Yesus minjaiq. A segi tamo nañgo areqalo qalie bole.

### 3

#### *Nikodemus a qolo Yesus ombla anjam qaireb*

**1** Jerusalem dia tamo bei soqnej aqa ñam Nikodemus. A Farisi tamo. A Juda nañgo gate bei.

**2** A qolo Yesus aqa areq bosiqa minjej, “O Qalie Tamo Koba, iga qalieonum, ni powo tamo bole. Ni Qotei aqaq na bem. Qotei a ni singila emosai qamu mañwa ni yeqnum qaji di ni babtqa keresai qamu.”

**3** Onaqa Yesus na kamba minjej, “E bole mermqai. Tamo bei a aŋgro mom bunuj bulosim ñambabqasai di Qotei na a taqatosim aqa Mandor Koba sqasai. Deqa a Qotei unqa keresai.”

**4** Onaqa Nikodemus na nenemyej, “Tamo a qeliqo di a kiyersim olo aqa ai miligiq aisim aŋgro mom bulosim ñambabqas?”

**5** Onaqa Yesus na kamba minjej, “E bole mermqai. Tamo bei a ya na ti Qotei aqa Mondor na ti aŋgro mom bunuj bulosim ñambabqasai di Qotei na a taqatosim aqa Mandor Koba sqasai.

**6** Niŋgi nungo ai abu nañgo jejamuq dena ñambabeqnum deqa niŋgi mandam tamo unub. Ariya Qotei aqa Mondor na tamo bei ñambabtqas di a mondor ti sqas.

**7** E ni mermonum, ‘Niŋgi aŋgro mom bunuj bulosib ñambaboiy.’ Ni ijo anjam di qusim pruguge-taim.

**8** Jagwa a segi puyoqnsiqa sawa sawaq gileq-naqa ni aqa anjam ato queqnum. Ariya a qabe na

kiyo boqnsiq qabiteqnu di ni qaliesai. Tamo kalil Qotei aqa Mondor aqa singila na aŋgro mom bunuj bulosib ɣambabeqnub qaji naŋgi kere dego.”

<sup>9</sup> Onaqa Nikodemus na olo Yesus nenemyej, “Kumbra di kiyersi brantqas?”

<sup>10</sup> Onaqa Yesus na kamba minjej, “Ni Israel naŋgo qalie tamo koba. Ni kiyaqa ijo anjam end-eqa poimosai?

<sup>11</sup> E bole mermqai. Anjam iga qalieonum qaji deqa mareqnum. Kumbra iga uneqnum qaji deqa saeqnum. Ariya ningi gago anjam endi ojosaieqnub.

<sup>12</sup> Endego e mandam qa anjam mern̄gonumqa ningi quisib nunjō areqaloq di siŋgilatosai. Deqa e lanj qure qa anjam dego mern̄git ningi kiyersib nunjō areqaloq di siŋgilatqab?

<sup>13</sup> Tamo bei a lanj qureq oqosai. E Tamo Aŋgro e segi qujai lanj qureq dena mandamq aiyem.

<sup>14</sup> Nami Moses a wadau sawaq di sosiqa a amal sigitosiq soqtosiq gaintej. Dego kere e Tamo Aŋgro soqtbosib gaintbqab.

<sup>15</sup> Amqa tamo kalil e qa naŋgo areqalo siŋgilatqab qaji naŋgi ɣambile gaigai sqab.

<sup>16</sup> “Qotei aqa Niri qujaiunu. Qotei na tamo ungasari kalil mandamq endi unub qaji naŋgi tulaj qalaqalainjrsiq deqa aqa segi Niri qujai di naŋgi enjrej. A endegsi are qalej, ‘Tamo ungasari naŋgi ijo Aŋgro qa naŋgo areqalo siŋgilatqab di naŋgi padalqasai. Naŋgi ɣambile gaigai sqab.’ Qotei a degsi are qalsiq deqa aqa segi Niri qujai naŋgi enjrej.

<sup>17</sup> Qotei a tamo ungasari mandamq endi unub

qaji naŋgo une qa peginjrqa marsiq aqa Niri qariŋyosai. A naŋgi eleŋjam naŋgi padalaib deqa osiq aqa Niri qariŋyonaq mandamq aiyej.

<sup>18</sup> Tamo uŋgasari Yesus qa naŋgo areqalo singilateqnub qaji naŋgi Qotei na peginjrqasai. Ariya tamo uŋgasari Yesus qa naŋgo areqalo singilatosaeqnub qaji naŋgi Qotei na peginjrqas. Di kiyaqa? Naŋgi aqa segi Niri qujai aqa ñam qa naŋgo areqalo singilatosai deqa.

<sup>19</sup> Qotei na tamo uŋgasari naŋgi di peginjrqas di aqa utru agiende. Puloŋ a mandamq ainaqa naŋgi ambru qa arearetnjroqnej. Naŋgi puloŋ qa arearetnjrosaioqnej. Di kiyaqa? Naŋgi kumbra uge yoqneb deqa.

<sup>20</sup> Tamo uŋgasari kalil kumbra uge yeqnub qaji naŋgi puloŋ jeuteqnub. Naŋgo kumbra uge di puloŋ na boleq ataim deqa naŋgi puloŋ aqaq bosaeqnub.

<sup>21</sup> Ariya tamo uŋgasari anjam bole dauryeqnub qaji naŋgi puloŋ aqaq beqnub. Boqnsib wau bole bole yeqnabqa tamo naŋgi unoqnsib mareqnub, ‘Bole, naŋgi Qotei aqa siŋila na wau di yeqnub.’ ”

### *Jon yansnjro qaji a Yesus qa anjam palontoqnej*

<sup>22</sup> Bati bei Yesus aqa aŋgro naŋgi ti walwelosib Judia sawaq gileb. Gilsib dia sosibqa Yesus na tamo uŋgasari naŋgi yansnjroqnej.

<sup>23</sup> Jon yansnjro qaji a Ainon qureq di sosiqa a dego tamo uŋgasari naŋgi yansnjroqnej. Ainon qure di Salim qure jojomq di unu. Dia ya koba soqnej deqa tamo uŋgasari naŋgi Jon aqa areq beqnabqa a na yansnjroqnej.

**24** Herot na Jon tonto talq di waiyosaisoqnej deqa Jon a kumbra di yoqnej.

**25** Bati bei Jon aqa aŋgro qudei naŋgi Juda tamo bei ti jejamu yanso kumbra qa anjam na qoto-qneb.

**26** Osib naŋgi Jon aqa areq gilsib minjeb, “O Qalie Tamo, nami tamo ni ombla Jordan ya taqal beiq di sosibqa ni a qa anjam maroqnem qaji bini tamo ungasari kalil naŋgi aqa areq gileqnabqa a na yansnjreqnu. Naŋgi inoq bosaieqnub.”

**27** Onaqa Jon na kamba minjrej, “Qotei laŋ qureq di unu qaji a na iga ingi bei egwasai di iga ingi bei oqa kerasai.

**28** Niŋgi segi ijo anjam bei quoqneb. Agi e merngoqnem, ‘E Kristus sai. Qotei na e namoqna qariŋbonaq e Kristus bqajqa gam gereiyetem.’

**29** Tamo uŋa banj ojqas qaji a segi na uŋa di oqas. Aqa was a laŋa qalaq di tigelesosimqa tamo uŋa banj ojqo qaji aqa anjam quoqnqas. Qusimqa tulanq areboleboleiyqas. Dego kere e bini tulanq areboleboleibqo.

**30** Kristus aqa ñam tulanq kobaqas. Ijo ñam aguq aiqas.” Jon na aqa aŋgro naŋgi degsi minjrej.

**31** Tamo laŋ qureq di sosiqa dena mandamq aiyej qaji a na ingi ingi kalil tulanq buŋnjrejunu. Mandam qaji tamo ungasari naŋgi mandam endeqa kumbra yoqnsib anjam mareqnub. Ariya tamo laŋ qureq di sosiqa dena mandamq aiyej qaji a na ingi ingi kalil tulanq buŋnjrejunu.

**32** Kumbra a uneqnu qaji a deqa saeqnu. Anjam a queqnu qaji di a na babtosiq mareqnub. Ariya mandam qaji tamo ungasari naŋgi aqa anjam di

ojosaieqnub.

<sup>33</sup> Tamo ungasari Yesus aqa anjam di ojeqnub qaji naŋgi a qa naŋgo areqalo singilateqnsib mareqnub, “Bole, Qotei a anjam bole qa utru.” Naŋgi degsib mareqnub.

<sup>34</sup> Tamo Qotei na qarinjej qaji a Qotei aqa anjam babtosiq mareqnu. Di kiyaqa? Qotei na aqa Mondor a torei yekritej deqa. A na aqa Mondor potosiq taqal bei segi Yesus yosai.

<sup>35</sup> Abu na aqa segi Niri qalaqalaiyeqnu deqa a na ingi ingi kalil aqa baŋq di atelegej.

<sup>36</sup> Tamo ungasari Qotei aqa Niri qa naŋgo areqalo singilateqnub qaji naŋgi ɿambile gaigai sqab. Ariya tamo ungasari Qotei aqa Niri aqa anjam dauryqa urateqnub qaji naŋgi ɿambile itqasai. Qotei aqa minjin naŋgoq di sqasai.

## 4

### *Yesus a Samaria uŋja bei wo anjam maroqneb*

<sup>1-3</sup> Farisi naŋgi endegsib queb, “Yesus a Jon buŋyosiqa tamo ungasari tulan̄ gargekoba yansnjreqnaqa naŋgi a dauryeqnub. Jon a tamo gargekoba yansnjrosaieqnu.” Farisi naŋgi degsib queb. Bole, Yesus a segi na tamo ungasari naŋgi yansnjrosaioqnej. Aqa aŋgro naŋgi na yansnjroqneb. Tamo Koba Yesus a qaliej, Farisi naŋgi degsib queb. Deqa a Judia sawa uratosiqa olo Galili sawaq gilej.

<sup>4</sup> A gam dauryosiqa Samaria sawa amble potosiqa walwelosiq gilej.

<sup>5</sup> Gilsiq Samaria naŋgo qure kiñala bei aqa ñam Sikar di brantej. Qure qalaq di mandam mutu bei

soqnej. Mandam mutu di Jekop a nami aqa ɻiri Josep yej.

**6** Ya uyuqajqa sub dia soqnej. Ya sub di Jekop a nami boqej qaji. Yesus a walwelosiq qanam jige sej bati 12 onaqa aqa jejamu asgiyonaq aqaratqa osiqa ya sub qalaq di awoej.

**7-8** Onaqa aqa aŋgro naŋgi iŋgi awaiyqa marsib qure miliqq aiyeb. Aiyeqnabqa Samaria uŋa bei a ya tugwajqa bej. Bonaqa Yesus na minjej, “Ya gambaŋ tigsim e anaibe.”

**9** Onaqa Samaria uŋa dena Yesus kamba minjej, “Ni Juda tamo. E Samaria uŋa. Deqa ni kiyaqa e merbonum, ‘Ya gambaŋ tigsim e anaibe?’” Uŋa na degsiqa Yesus minjej. Di kiyaqa? Juda naŋgi Samaria naŋgi ti koba na anjam marosaieqnub.

**10** Onaqa Yesus na uŋa di minjej, “Ni iŋgi bole Qotei na laŋa emqajqa di qalieosim qamu tamo ni na ya tigsim anaiyqajqa mermqo qaji a qa poimqo qamu ni e merbimqqa ɻambile gaigai sqajqa ya anaimonum qamu.”

**11** Onaqa uŋa dena minjej, “O Tam Koba, ni ya tugwajqa gambaŋ saiqoji. Ya sub endi tulan guma koba. Deqa ni qabe na ɻambile gaigai sqajqa ya di oqam?”

**12** Gago moma utru Jekop a nami ya sub endi bogsiqa gago moma naŋgi enjrej. A sub endena ya uyoqnej. Aqa aŋgro naŋgi ti aqa makau ti aqa kaja ti naŋgi dego sub endena ya uyoqneb. Ni na gago moma utru Jekop buŋyqam kiyo?”

**13** Onaqa Yesus na kamba minjej, “Tamo naŋgi sub endena ya uyoqnqab di naŋgi olo bunu ya qarnjroqnqas.

**14** Ariya e na tamo naŋgi ya anainjrqai di naŋgi bunu ya qarnjrqasai. Ya e na anainjrqai di naŋgi uyibqa naŋgo are miligiq di ya ani bul polyoqn-imqa naŋgi ɣambile gaigai sqab.”

**15** Onaqa uŋa dena Yesus minjej, “O Tamo Koba, ni na ya di anaibimqa e olo ya qarboqnqasai. Amqa e olo bosiy sub endena ya tugoqnqasai.”

**16** Onaqa Yesus na minjej, “Ni mati aisim ino gumbuluŋ metosim niŋgi ombla endeq boiy.”

**17** Onaqa uŋa na minjej, “E gumbuluŋ saiqoji.” Onaqa Yesus na minjej, “Ni gumbuluŋ saiqoji di kere maronum.

**18** Ni nami gumbuluŋ 5 osim uratnjrem. Ariya tamo ni bini ombla unum qaji di ino gumbuluŋ sai. Deqa ino anjam di bole.”

**19** Onaqa uŋa dena minjej, “O Tamo Koba, ni anjam di ubtosim merbonum deqa e poibqo, ni Qotei aqa medabu o qaji tamo bole.”

**20** Gago moma naŋgi nami manaq endi korooqnsib Qotei qa louoqneb. Ariya Juda naŋgi mareqnub, ‘Qotei qa louqajqa sawa qujai agi Jerusalem.’ ”

**21** Onaqa Yesus na olo minjej, “O uŋa, e ni anjam bei mermit ni quisim poimeme. Anjam agiende. Bati bei brantimqa manaq endi niŋgi Abu qa louoqnasai. Jerusalem dia dego niŋgi Abu qa louoqnasai.

**22** Niŋgi Samaria qaji. Deqa niŋgi Abu qa loueqnub qaji a qa geregere poiŋgosai. Ariya iga Juda qaji. Deqa iga Abu qa loueqnum qaji a qa geregere poigeqnu. Di kiyaqa? Abu na tamo uŋgasari naŋgi eleŋqajqa utru agi Juda iga segi.

**23** Ariya bati bei brantimqa tamo naŋgi Mondor na ti anjam bole na ti Abu qa louoqnqab. Osib naŋgo lou dena naŋgi Abu qa bole louoqnqab. Yim Abu a naŋgi qa tulaŋ areboleboleiyqas. Bati di agi brantqo.

**24** Qotei a segi Mondor. Deqa tamo naŋgi Qotei qa louqa oqnsib Mondor na ti anjam bole na ti louoqnqab di naŋgi Qotei qa bole louoqnqab.”

**25** Onaqa uŋa dena Yesus minjej, “E qalie, Mesaia a bqas.” “Mesaia” di Hibru anjam. Gago anjam, “Kristus.” Osiqa Yesus minjej, “Mesaia a bosimqa Qotei aqa anjam kalil ubtosim mergekritqas.”

**26** Onaqa Yesus na minjej, “Mesaia agi e segi. Aqo ombla anjam mareqnum.”

**27** Yesus a uŋa degsi minjnaqa aqa angro naŋgi olo qureq na bosibqa a uŋa de wo anjam mareqnab unsibqa tulaŋ prugugeteb. Ariya naŋgi Yesus nenemyosai, “Ni kiyaqa uŋa de wo anjam mareqnub?” Deyosai.

**28** Onaqa uŋa dena aqa ya nobu uratosiqa olo qure miliqiŋ aisiqa tamo uŋgasari naŋgi minjrej,

**29** “Niŋgi bosib tamo di uniy. E kumbra nami yoqnem qaji di a na ubtekritqo. Tamo di a Kristus kyo?”

**30** Degsi minjrnaqa naŋgi qure uratosib Yesus unqajqa beb.

**31** Beqnbabqa Yesus aqa angro naŋgi na minjeb, “O Qalie Tamo Koba, ni bosim iŋgi uye.”

**32** Onaqa Yesus na minjrej, “Ijo iŋgi uyo bei unu di ningi qaliesai.”

**33** Onaqa aqa angro naŋgi aqa anjam di quisibqa segi segi maroqneb, “Tamo bei na iŋgi bei osi bosiq

anaiyqo kiyo?”

<sup>34</sup> Onaqa Yesus na minjrej, “Qotei e qarinjbej qaji aqa areqalo e dauryosiy aqa wau kobotqai. Ijo ingi uyo bole agide.

<sup>35</sup> “Niñgi mareqnub, ‘Bai qolqe koboeqnaqa ingi melieqnu.’ Niñgi degsib mareqnub. Ariya e na niñgi yawo anjam bei endegsi merñgwai. Niñgi ingi wauq di ñam atsib ingi meliosiq unu di unqab.

<sup>36</sup> Tamo ingi meli gentoqnsib koroiyeqnub qaji nañgi awai eqnub. Nañgo awai agi nañgi ñambile gaigai sqab. Deqa tamo nañgi ingi yageqnub qaji ti tamo nañgi ingi meli genteqnub qaji ti koba na areboleboleinjrqas.

<sup>37</sup> Deqa anjam endi bole, ‘Tamo bei na ingi yagwas. Olo tamo bei na ingi meli gentqas.’

<sup>38</sup> E niñgi qarinjgonumqa gilsib wau niñgi na wauosai qaji dena ingi eleñeqnub. Tamo qudei nañgi nami waukobaeb. Ariya niñgi laña gilsib ingi eleñeqnub.”

<sup>39</sup> Uña dena Samaria tamo ungasari gargekoba qure dia soqneb qaji nañgi Yesus qa sainjrnaq quisibqa Yesus qa nañgo areqalo singilateb. Di kiyaqa? Uña na minjrej, “Kumbra kalil e nami yoqnem qaji di tamo dena ubtekritqo.”

<sup>40</sup> Degsi minjrnaq quisibqa Yesus aqa areq bosib minjeb, “Ni gago qureq endi iga koba na sqom.” Degsi minjnabqa Yesus a batí aiyel nañgo qureq di soqnej.

<sup>41</sup> Sosiqa Qotei aqa anjam palonteqnaqa tamo ungasari gargekoba nañgi aqa anjam quoqnsib poinjreqnaqa a qa nañgo areqalo singilateqneb.

<sup>42</sup> Deqa nañgi na uña di minjeb, “Ni Yesus

qa anjam mergonam qusim gago areqaloq di singilatem. Siŋgilatosim sonamqa a segi na olo anjam mergwo qusim turtosim gago areqalo a qa torei siŋgilatonum. Osim deqa iga endegsi poigwo, ‘Bole, Yesus a na qujai tamo ungasari mandamq endi unub qaji naŋgi elenqas.’ ”

*Yesus na Rom naŋgo tamo gate aqa ɿiri boletej*

<sup>43</sup> Onaqa bati aiyel koboonaqa Yesus a qure di uratosiq walwelosiq Galili sawaq gilej.

<sup>44</sup> A segi nami endegsi marej, “Qotei aqa medabu o qaji tamo bei aqa segi qure utruq gilsim anjam minjroqnqas di naŋgi aqa anjam quetqa asginjrqas. Deqa a qure dia ñam saiqoji sqas.”

<sup>45</sup> Yesus a Galili sawaq di brantonaqa tamo ungasari sawa dia soqneb qaji naŋgi a qa tulan areboleboleinrej. Di kiyaqa? Nami Juda naŋgo yori bati koba qa Yesus a Jerusalem dia maŋwa babteqnaq naŋgi unoqneb deqa.

<sup>46</sup> Ariya Yesus a olo Kana qureq aiyej. Qure di agi Galili sawaq di unu. Qure dia nami Yesus a ya bulyonaqa wain babej. Aisiq di sonaqa Kaperneam qureq di Rom naŋgo mandor aqa tamo gate bei aqa ɿiri makobaiyonaq ɿeiesoqnej.

<sup>47</sup> Deqa tamo gate di Yesus a Judia sawa uratosiq bosiq Galili sawaq di soqnej di quasiq walwelosiq aqa areq aisiq pailyosiq minjej, “O Tam Koba, ijo angro a moiqa laqnu. Deqa ni bosim a boletime.”

<sup>48</sup> Onaqa Yesus na tamo di minjej, “Niŋgi ijo maŋwa bei nunjo ɿamdamu na unqasai di niŋgi e qa nunjo areqalo siŋgilatqasai.”

<sup>49</sup> Onaqa tamo dena olo Yesus minjej, “O Tam Koba, ni boqujat. Ijo angro a moiyo uge.”

**50** Onaqa Yesus na minjej, “Ni gile. Endego ino anjro a boleqo ɣambile unu. A moiqasai.” Onaqa a Yesus aqa anjam di quisiqa bole qa marsiq gilej.

**51** A gileqnaqa aqa kaŋgal tamo qudei naŋgi aqa talq dena bosib gamq di turosib minjeb, “Ino anjro a boleosiq ɣambile unu.”

**52** Onaqa a na nenemnjrej, “Seŋ bati gembu a boleqo?” Onaqa minjeb, “Ya qanam seŋ bosiq ingi uyo bati tiŋyonaqa aqa jejamu kaŋkan koboonaqa a boleej.”

**53** Degsi minjnabqa a qalieej, seŋ bati deqa tintiŋ Yesus na minjej, “Endego ino anjro a boleqo ɣambile unu. A moiqasai.” A degsi qalieosiq deqa a Yesus qa aqa areqalo singilatej. Tamo kalil a ombla tal qujaiq di soqneb qaji naŋgi dego Yesus qa naŋgo areqalo singilateb.

**54** Yesus a Judia sawa uratosiq bosiq Galili sawaq di sosiqa bati deqa a maŋwa di yej. A nami Galili sawaq di maŋwa bei yosaioqnej. Aqa maŋwa qujai nami yej qaji agi a ya bulyonaq wain babej.

## 5

### *Jesus a ma tamo bei boletej*

**1** Bati bei Yesus a Juda naŋgo yori bati koba unqa marsiqa Jerusalem aiyej.

**2** Jerusalem dia ya kuru bei soqnej. Ya kuru di kaja naŋgo siraŋme qalaq di soqnej. Ya kuru di aqa ñam Betesda. Di Hibru anjam na mareqnub. Ya kuru areqsi jagwa oqajqa tal kiñilala 5 soqneb.

**3** Tal dia tamo ma ti, tamo ñam qandimo, tamo singa uge, tamo jejamu lainjro qaji tulan̄ gargekoba soqneb. Naŋgi ya anŋilqajqa tarin̄ojqneb.

**4** Bati qudei Tamo Koba aqa laj aŋgro ya kuru miligiq aiyoqnsiqa ya enteqnaqa annjiloqnej. Ya annjiloqnimqa tamo a namo yaq aiqas qaji aqa ma koboqas. Utru deqa naŋgi ya annjilqajqa tarinjoqneb.

**5** Ariya bati deqa tamo bei wausau 38 ma ti soqnej qaji a dia tarinjoqnej.

**6** Onaqa Yesus na tamo di ɻeiesonaq unsiqa a bati olekoba ma de ti soqnej di qalieosiqa nenemyej, “Ni boleqajqa are unu e?”

**7** Onaqa minjej, “O Tamo Koba, ya annjiloqnimqa tamo yai na e aqaryabosim urur yaq osi aiqas? Tamo dego bei sosai. E aiqa yeqnam ma tamo qudei naŋgi e bunjboqnsib namo yaq aiyeqnub.”

**8** Onaqa Yesus na minjej, “Ni tigelosim ino sapera qoboiyosim walwel.”

**9** Degsi minjnaqa bati qujai deqa aqa jejamu boleonaqa a tigeloqujatosiq aqa sapera qoboiyosiqa walwelosiq gilej.

Bati di Juda naŋgo yori bati.

**10** Deqa Juda tamo kokba naŋgi na tamo boleej qaji di unsib minjeb, “Bini yori bati. Iga wauqa getento. Deqa ni ino sapera qoboiyaim.”

**11** Onaqa a na kamba minjrej, “Tamo e boletbqo qaji a na merbqo, ‘Ni ino sapera qoboiyosim walwel.’”

**12** Degsi minjrnaqa naŋgi na nenemyeb, “Tamo yai na ni mermqo, ‘Ni ino sapera qoboiyosim walwel?’”

**13** Onaqa a na minjrej, “Tamo e boletbqo qaji aqa ñam di e qaliesai.” A naŋgi degsi minjrej. Di kiyaqa? Tamo gargekoba sonab Yesus a naŋgo ambleq na ulanjej.

**14** Onaqa nebeonaqa Yesus a atra tal miliq gilsiga tamo di itosiq minjej, “Ni que. E ni boletmonum deqa ni olo une bei ataim. Gulbe kobaquja bei ino jejamuq di olo branto uge.”

**15** Onaqa tamo di aisiqa Juda tamo kokba naŋgi minjrej, “Tamo e boletbej qaji agi Yesus.”

**16** Onaqa Juda tamo kokba naŋgi Yesus ugeugeiyqajqa maroqneb. Di kiyaqa? A maŋwa di yori bati qa yoqnej deqa.

**17** Onaqa Yesus na kamba minjrej, “Ijo Abu a nami gaigai wauoqnej agi bini wauoqnsiq unu. Deqa e dego waueqnum.”

**18** Onaqa Juda tamo kokba naŋgi Yesus aqa anjam di quisibqa naŋgi a qalib moiqajqa torei singilaoqneb. Di kiyaqa? A yori bati segi gentosai. A dego marej, “Qotei a ijo Abu.” Aqa anjam dena a segi qa marej, “Aqo Qotei wo ombla kerekere.”

### *Yesus a Qotei aqa Niri*

**19** Onaqa Yesus na kamba minjrej, “E bole merŋgwai. E Qotei aqa Niri. E ijo segi areqalo na kumbra bei yqa keresai. Kumbra ijo Abu na yeqnaq e uneqnum qaji di e dego yeqnum.

**20** E ijo Abu aqa Niri. Deqa a na e qalaqalaiboqnsiqa kumbra kalil a yeqnu qaji di e olo osorbeqnu. Bunuqna a kumbra tulan singila kokba dego osorboqnqas. Yim ninji unsib tulan prugwab.

**21** Ijo Abu na tamo moreŋo qaji naŋgi olo ɻambile enjroqnsiqa subq na tigeltnjreqnu. Deqa e Qotei aqa Niri e kumba dego ijo segi areqalo na tamo naŋgi ɻambile enjreqnum.

**22** Ijo Abu na tamo naŋgo une qa naŋgi peginjrosaieqnu. Wau di a na e ebej. E Qotei aqa Niri deqa e na tamo naŋgo une qa naŋgi peginjreqnum.

**23** E wau di yeqnum. Di kiyaqa? Tamo kalil naŋgi ijo ñam soqtetboqnqajqa deqa. Agi naŋgi ijo Abu aqa ñam soqteqnub degokere. Tamo a ijo ñam soqtetbosaaieqnu di a ijo Abu e qariŋbej qaji aqa ñam dego soqtosaaieqnu.

**24** “E bole merŋgwai. Tamo a ijo anjam quisim ijo Abu e qariŋbej qaji a qa aqa areqalo siŋgilatqas di a ŋambile gaigai sqas. Deqa e aqa une qa pegiyqasai. A moiyo gam uratosim olo ŋambile oqas.

**25** “E bole merŋgwai. E Qotei aqa Niri. Bati bei brantimqa tamo uŋgasari moreno qaji naŋgi ijo kakro quisib ŋambile oqab. Bati di agi brantqo.

**26** Ijo Abu a segi ŋambile qa utru. E aqa Niri. A na e siŋgila ebej deqa e dego ŋambile qa utru.

**27** E Tamo Aŋgro unum deqa ijo Abu na e siŋgila ebej. Siŋgila dena e na tamo uŋgasari naŋgo une qa peginjreqnum.

**28** Niŋgi ijo anjam di quisib tulan prugaib. Bati bei brantimqa tamo uŋgasari kalil subq di unub qaji naŋgi ijo kakro quqwab.

**29** Qusib olo sub uratosib tigelqab. Tamo uŋgasari kumbra bole bole yeqnub qaji naŋgi tigelosib ŋambile sqab. Tamo uŋgasari kumbra uge uge yeqnub qaji naŋgi tigelabqa e na naŋgi peginjrsiy padaltnjrqai.”

### *Tamo qudei na Yesus aqa ñam ubteqnub*

**30** Osiqa Yesus a olo marej, “E ijo segi areqalo na wau bei yqa keresai. Ijo Abu na e anjam merbeqnaq quoqnsim tamo uŋgasari naŋgi peginjreqnum.

E kumbra tiñtiñ na nañgi peginqreqnum. E ijo segi areqalo dauryosaeqnum. Ijo Abu e qariñbej qaji aqa areqalo dauryeqnum.

<sup>31</sup> “E segi na ijo kumbra ti ijo wau ti ubtosiy marqai di tamo nañgi bole qa maraib.

<sup>32</sup> Tamo bei unu agi Qotei. A dego ijo kumbra ti ijo wau ti ubtosiq mareqnu. E qalieonum, anjam a mareqnu qaji di bole.

<sup>33</sup> “Ninji na tamo qudei qarinjnrb Jon aqaq gilnabqa a anjam bole ubtosiq minjroqnej.

<sup>34</sup> Bole, mandam tamo bei na ijo kumbra ti ijo wau ti ubtqa kerasai. Ariya Qotei na ninji elenqajqa deqa e ninji Jon qa merñgonum.

<sup>35</sup> Jon a ñam puloñ bul sosiqa tamo uñgasari nañgi suwantnjreqnaqa niñgi aqa suwanjoq di sokiñalayoqnsib areboleboleinjgoqnej.

<sup>36</sup> “Ijo anjam e ubtosim mareqnum qaji di anjam kobaqua. Anjam dena Jon aqa anjam tulan bunyejunu. Di kiyaqa? Wau kalil ijo Abu na ebej qaji di e yeqnam tamo uñgasari nañgi unoqnsib endegsi poinjreqnu, bole, ijo Abu na e qariñbonaq bem.

<sup>37</sup> Ijo Abu e qariñbej qaji a e qa anjam ubtosiq mareqnu. Ariya ninji aqa kakro nami quosaioqneb. Aqa ulatamu dego ninji nami unosaioqneb.

<sup>38</sup> Qotei aqa anjam dego nunjo are miligiq di sosai. Tamo Qotei na qarinjyonaq mandamq aiyej qaji aqa anjam niñgi nunjo areqaloq di singilatosaeqnub.

<sup>39</sup> “Bole, ninji Qotei aqa anjam neñgrenq di unu qaji di sisivoqnsib peleiyeqnub. Niñgi are qaleqnub, anjam dena ninji ñambile gaigai sqab. Ariya anjam di e ubtosiq mareqnu.

**40** Niñgi kiyaqa ñambile oqajqa are qaloqnsib olo ijoq bqajqa urateqnub?

**41** “E mandam tamo nañgoq dena ñam koba osiaeignum.

**42** Ariya e ningi qa qalieonum. Nuñgo are miligiq di ningi Qotei qalaqlaiyosaieqnub.

**43** E ijo Abu aqa ñam na bonamqa ningi ijo anjam osai. Tamo bei aqa segi ñam na bkas di ningi aqa anjam oqujatqab.

**44** Niñgi nuñgo segi was nañgoq dena ñam koba oqajqa are qaleqnub. Ariya niñgi Qotei aqaq dena ñam koba oqajqa are qalosaieqnub. Qotei agi a segi qujai Qotei bole. Niñgi kumbra degyeqnub deqa niñgi kiyersib e qa nuñgo areqalo siñgilatqab? Di keresai.

**45** “E ijo Abu aqa ñamdamuq di nuñgo une qa merñgwai edegaib. Nuñgo une qa merñgwajqa tamo qujai agi Moses. Niñgi are qaleqnub, Moses a na niñgi aqaryaiñgwas. Di sai.

**46** Niñgi Moses aqa anjam nuñgo areqaloq di siñgilateqnub qamu ijo anjam dego nuñgo areqaloq di siñgilateqnub qamu. Di kiyaqa? Moses a nami e qa anjam neñgrenyej.

**47** Niñgi Moses aqa anjam nami neñgrenyej qaji di nuñgo areqaloq di siñgilatosaeieqnub deqa niñgi kiyersib ijo anjam dego nuñgo areqaloq di siñgilatqab? Di keresai.”

## 6

*Yesus a tamo 5,000 nañgi iñgi anainjrej*

**1** Bati bei Yesus a Galili ya agu taqal beiq gilej. Ya agu di yuwal bul tulanj kobaquja. Ya agu di aqa ñam bei Taiberias ya agu.

**2** Yesus a tamo mainjro qaji nañgoq di mañwa babteqnaqa tamo uñgasari tulanj gargekoba nañgi unoqneb. Deqa a ya agu taqal beiq gileqnaqa nañgi a dauryosib giloqneb.

**3** Bati di Yesus na aqa aŋgro nañgi joqsiqa koba na manaq oqsibqa mana goge dia awesoqneb.

**4** Qotei a nami Israel nañgi Isip sawaq di padalqa laqnabqa nañgi elenej. Deqa olo are qalqajqa yori bati jojomej.

**5** Deqa Yesus a ñam atsiqa tamo uñgasari tulanj gargekoba a dauryosib aqa areq beqnabqa unjrsiqa Filip nenemyej, “Iga qabe na ingi awaiyosim tamo uñgasari kalil di anainjronam kereqas?”

**6** Filip a kamba Yesus kiyersi minjim quqwajqa deqa Yesus na laja nenemyej. Yesus a kumbra kiye yqas di a segi nami qalieej.

**7** Onaqa Filip na kamba Yesus minjej, “Tamo ungasari nañgi di tulanj gargekoba. Iga 200 kina osim dena ingi awaiyosim ingi kiñala kiñala anainjrqom di tulanj kereqasai.”

**8** Onaqa Yesus aqa aŋgro bei Andru di Saimon Pita aqa was a na Yesus minjej,

**9** “Aŋgro wala beiunu. A bem 5 qe kiñilala aiyel ojejunu. Ingi di dego tamo uñgasari gargekoba endi anainjrqom di tulanj kereqasai.”

**10** Onaqa Yesus na aqa aŋgro nañgi minjrej, “Ninji na tamo uñgasari kalil nañgi minjribqa mandamq di awoeleñeb.” Sawa dia ñij koba soqnej deqa Yesus aqa aŋgro nañgi na tamo

uŋgasari minjrnabqa kalil ñiŋq di awoelenjeb. Tamo awoelenjeb qaji sisib 5,000.

**11** Awoonabqa Yesus na bem ti qe ti di osiqa Qotei pailyosiqa tamo uŋgasari awoelenjeb qaji naŋgi jeisi anainjreqnaq uyoqneb. Uynab kalil menetnjrej.

**12** Menetnjrnaqa Yesus na aqa aŋgro naŋgi minjrej, “Niŋgi iŋgi oto kalil koroiyyiy. Oto bei urataib.”

**13** Degsi minjrnnaqa naŋgi bem 5 aqa oto kalil tamo uŋgasari naŋgi urateleñeb qaji di koroiyosib gumba kokba 12 di jignab maqeleñej.

**14** Onaqna tamo uŋgasari kalil naŋgi Yesus aqa maŋwa di unsib maroqneb, “Bole, Qotei aqa medabu o tamo nami Qotei na qarinyim mandamq aiqajqa marej qaji agi a di.”

**15** Onaqna Yesus a naŋgo anjam di quisiga endegsi qaliej, “Naŋgi bosib e ojsib e naŋgo Mandor Koba atqajqa are qaleqnub.” A degsi qalieosiq deqa a sawa di uratosiqa a segi manaq oqsiq di soqnej.

### *Yesus a ya baŋgaq na walwelej*

**16** Ariya bilaqttonaqa Yesus aqa aŋgro naŋgi alile aiyeb.

**17** Alile aisib qobuŋ bei gogetosib qobuŋ suweiyosib gileb. Naŋgi mareb, “Iga ya agu taqal beiq gilsim Kaperneam qureq di tiryqom.” Naŋgi degsib marsib gileb. Qoloonaqa Yesus a naŋgoq bosaisoqnej.

**18** Naŋgi ya agu ambleq di gileqnabqa jagwa koba tigelosiqa ya korkortosiqa naŋgi pulutnjrej.

**19** Naŋgi 5 o 6 kilomita oyoosib gileqnabqa Yesus a ya baŋgaq na walwelosiqa naŋgi daurnjrsiq gilej.

Gilsiq qobuň jojomynaqa ɻam ateb di a ya baŋgaq na walwelosiq beqnaqa unsib ulakobaeb.

**20** Deqa a na minjrej, “Endi e beqnum. Ulaaib.”

**21** Degsi minjrnaqa naŋgi areboleboleinjrnaqa a metonab qobuň gogetej. Onaqa qobuň a ururosiq sawa naŋgi gilqajqa mareb qaji di tiryej.

### *Tamo uŋgasari naŋgi Yesus qa ɻamoqneb*

**22** Nebeonaqa tamo uŋgasari qudei naŋgi ya agu taqal beiq di soqneb. Naŋgi qalie, ya bilaq qobuň qujai segi dia tiryosiq soqnej. Yesus aqa aŋgro naŋgi qobuň di gogetosib gileb. Yesus a naŋgi koba na qobuň di gogetosai.

**23** Ariya tamo uŋgasari naŋgi alile di sonabqa qobuň qudei Taiberias qureq dena beb. Bosib sawa Tamo Koba Yesus a pailyosiq naŋgi ingi anainjrej qaji sawa jojomq di tiryeb.

**24** Yesus aqa aŋgro naŋgi ti di sosai. Tamo uŋgasari naŋgi degsi unsibqa qobuň di gogetosib gilsib Kaperneam qureq di Yesus qa ɻamoqneb.

### *Yesus a segi ɻambile qa bem uyo bole*

**25** Ariya naŋgi ya agu taqal beiq di Yesus itosib nenemyeb, “O Qalie Tamo Koba, ni seŋ batı gembu endeq bem?”

**26** Onaqa Yesus na kamba minjrej, “E bole merŋgwai. E maŋwa babteqnam ningi unoqneb ningi deqa are qalsib e qa ɻamosai. E ningi bem anaingonam uynab menetŋgej ningi deqa are qalsib e qa ɻameqnub.

**27** Jejamu qa ingi a koboqas. Ningi ingi deqa wauaib. Nambile gaigai sqajqa ingi deqa ningi wauoqniy. Ingı di e na ningi anaingit uyqab. E Tamo Aŋgro. Ijo Abu Qotei na e giltbej.”

<sup>28</sup> Onaqa naŋgi na kamba Yesus nenemyeb, “Iga Qotei aqa wau kiye yoqnqom?”

<sup>29</sup> Onaqa Yesus na minjrej, “Qotei aqa wau agi merŋgwai. Niŋgi tamo Qotei na qarinjej qaji a qa nuŋgo areqalo siŋgilatiy. Tamo di agi e segi.”

<sup>30-31</sup> Onaqa naŋgi Yesus aqa anjam di quisibqa olo nenemyeb, “Ni maŋwa kiye babtim iga unsim ni qa gago areqalo siŋgilatqom? Nami gago moma naŋgi wadau sawaq di sosibqa bem uyoqneb. Agi Qotei aqa anjam bei endegsi unu, ‘Moses a laŋ qure qa bem tamo uŋgasari naŋgi anainjreqnaq uyoqneb.’ Deqa ni wau kiye yim iga unsim ni qa poigim gago areqalo ni qa siŋgilatqom?”

<sup>32</sup> Onaqa Yesus na kamba minjrej, “E bole merŋgwai. Bem Moses na tamo uŋgasari naŋgi anainjrej qaji di laŋ qure qa bem bolesai. Bem Ijo Abu na niŋgi anaingoqnqas qaji di laŋ qure qa bem bole.

<sup>33</sup> Bem di Qotei aqa segi bem. Bem di laŋ qureq dena mandamq aisiq tamo uŋgasari mandamq endi unub qaji naŋgi ɣambile enjreqnu.”

<sup>34</sup> Onaqa naŋgi na Yesus minjeb, “O Tamo Koba, bati gaigai bem di anaigoqne.”

<sup>35</sup> Onaqa Yesus na minjrej, “E segi ɣambile qa bem uyo bole. Deqa tamo bei a ijoq bqas di a bunu mamyqasai. Tamo bei a e qa aqa areqalo siŋgilatqas di a bunu ya qaryqasai dego.

<sup>36</sup> “Niŋgi nuŋgo ɣamdamu na e nubeqnub. Ariya niŋgi e qa nuŋgo areqalo siŋgilatosaeqnub. E nami degsi merŋgem.

<sup>37</sup> Niŋgi quiy. Tamo uŋgasari kalil Qotei na e ebej qaji naŋgi ijoq boqnqab. Tamo uŋgasari ijoq bqab qaji naŋgi di e na olo winjrqa keresai.

**38** E ijo segi areqalo dauryqajqa deqa e laj qure uratosim mandamq aiyosai. Abu e qarinbej qaji aqa areqalo dauryqajqa deqa e laj qure uratosim mandamq aiyem.

**39** Abu e qarinbej qaji aqa areqalo agiende. Tamo ungasari a na ebej qaji bei e uratit padalqasai. E naŋgi kalil diŋo bati qa olo subq na tigeltnrqai.

**40** Od, ijo Abu aqa areqalo agiende. Tamo ungasari kalil e nuboqnsib e qa naŋgo areqalo singilateqnub qaji naŋgi ɻambile gaigai sqab. Diŋo bati qa e na naŋgi olo subq na tigeltnrqai. E Qotei aqa Niri unum deqa e kumbra di yqai.”

**41** Onaqa Juda naŋgi Yesus aqa anjam di quisibqa naŋgi a qa ugeosib yomuoqneb. Di kiyaqa? A marej, “E segi bem bole laj qure uratosim mandamq aiyem qaji.”

**42** Naŋgi a qa yomuoqnsib maroqneb, “Tamo di Yesus. A Josep aqa ɻiri. Aqa ai abu naŋgi qa iga qalie bole. A kiyaqa marqo, ‘E laj qure uratosim mandamq aiyem?’”

**43** Onaqa Yesus na kamba minjrej, “Niŋgi e qa laja laja ɻiriŋoqnaib.

**44** Tamо bei aqa segi areqalo na ijoq bqa keressai. Ijo Abu e qarinbej qaji a na tamо bei aqa are tigeltetim ijoq bqas. Yim diŋo bati qa e na olo subq na tigeltnqai.

**45** Agi Qotei aqa medabu o qaji tamо naŋgi nami anjam endegsib neŋgreŋyeb, ‘Qotei na tamо kalil naŋgi anjam plaltosim minjroqnaas.’ Anjam degsib neŋgreŋyeb. Deqa tamо kalil ijo Abu aqa anjam quoqnsib a qa poinjreqnu qaji naŋgi ijoq

boqnqab.

**46** “Tamo bei a ijo Abu aqa ulatamu unosai bole sai. E segi qujai ijo Abu aqa ulatamu unem. Agi e nami Qotei aqaq dena mandamq aiyem.

**47** E bole mern̄gwai. Tamo a e qa aqa areqalo singilatqas di a ɻambile gaigai sqas.

**48** E segi ɻambile qa bem uyo bole.

**49** Nami nun̄go moma naŋgi wadau sawaq di sosibqa bem uyoqneb. Bunuqna naŋgi kalil moreŋekriteb.

**50** Ariya e segi qujai bem bole laŋ qure uratosim mandamq aiyem qaji. Tamo un̄gasari naŋgi bem di uyqab di naŋgi moreŋqasai.

**51** E segi ɻambile qa bem bole laŋ qure uratosim mandamq aiyem qaji. Tamo bei a bem di uyqas di a ɻambile gaigai sqas. Bem di agi ijo jejamu. E na tamo un̄gasari mandamq endi unub qaji naŋgi ijo jejamu anainjrit uyqab. Uysib naŋgi ɻambile sqab.”

**52** Onaqa Juda naŋgi Yesus aqa anjam di quisib segi segi anjam na qotoqnsib maroqneb, “Tamo di a kiyersim aqa jejamu iga anaigim uyqom?”

**53** Onaqa Yesus na kamba minjrej, “E bole mern̄gwai. E Tamo An̄gro. Deqa niŋgi ijo jejamu ti ijo leŋ ti uyqasai di niŋgi ɻambile sqasai.

**54** Tamo naŋgi ijo jejamu ti ijo leŋ ti uyqab di naŋgi ɻambile gaigai sqab. Deqa diŋo bati qa e na naŋgi olo subq na tigeltnjrqai.

**55** Ijo jejamu di in̄gi uyo bole. Ijo leŋ di ya uyo bole.

**56** Tamo naŋgi ijo jejamu ti ijo leŋ ti uyqab di naŋgi e beterbesqab. E dego naŋgi beternjresqai.

**57** Ijo Abu ḥambile unu qaji a na e qariñbej deqa aqa siñgila na e dego ḥambile unum. Dego kere tamo nañgi ijo jejamu ti ijo leñ ti uyqab di nañgi ijo siñgila na ḥambile sqab.

**58** E segi bem bole lañ qure uratosim mandamq aiyem qaji. Nuñgo moma nañgi nami bem uyoqneb dego sai. Nañgi bem uyoqnsib olo moreñqneb. E segi bem uyo bole. Deqa tamo nañgi bem bole di uyqab di nañgi moreñqasai. Nañgi ḥambile gaigai sqab.”

**59** Yesus a Kaperneam qureq Juda nañgo Qotei tal miligiq di sosiqa Qotei aqa anjam di palontosiq tamo uñgasari nañgi minjroqnej.

### *Yesus a segi ḥambile gaigai sqajqa utru*

**60** Onaqa tamo uñgasari Yesus dauryoqneb qaji nañgi aqa anjam di qusibqa nañgi gargekoba endegsib maroqneb, “Anjam di gulbe koba. Tamo yai nañgi anjam di poinjrqa kere?”

**61** Degtisib maroqnsib Yesus qa yomueqnabqa di qalieosiqa minjrej, “Ijo anjam dena nuñgo areqalo ugetetñgwoqa niñgi ijo ñam ulontonub e?

**62** E Tamo Añgro. Qure e nami soqnam qaji deq olo oqoqnitqa niñgi e nubsibqa kiyersib are qalqab?

**63** Qotei aqa Mondor a segi na tamo uñgasari nañgi ḥambile enjreqnu. Nuñgo jejamu na niñgi aqaryainqwa keresai. Ijo anjam kalil e niñgi merñgeqnum qaji endi Mondor aqa anjam. Anjam dena niñgi ḥambile oqab.

**64** Ariya niñgi qudei e qa nuñgo areqalo singilatosiaeinqub.” Yesus a nañgi degsi minjrej. Di kiyaqa? Tamo yai nañgi a qa nañgo areqalo

singilatqasai di a nami qaliej. Bunuqna aqa aŋgro bei na a osim jeu tamo naŋgo banq di atqas di dego a nami qaliej.

<sup>65</sup> Osiqa minjrej, “Utru deqa e niŋgi merngonum, ‘Qotei na tamo bei aqa are tigeltetqasai di a ijoq bqa keresai.’”

<sup>66</sup> Yesus a anjam degsi marnaqa tamo uŋgasari gargekoba a nami dauryoqneb qaji naŋgi a dauryqa uratosib jaraiyeb.

<sup>67</sup> Onaqa Yesus na aqa aŋgro 12 naŋgi nenemnjrej, “Niŋgi dego e uratbosib jaraiqab e?”

<sup>68</sup> Onaqa Saimon Pita na minjej, “O Tamo Koba, iga ni uratmosim tamo yai aqaq gilqom? Tamo dego bei sosai. Ni segi qujai ɣambile gaigai sqajqa anjam mergeqnum.

<sup>69</sup> Iga ni qa gago areqalo singilatosim endegsi qalieonum, Qotei aqa segi Tamo Bole a na nami giltej qaji agi ni qujai.”

<sup>70</sup> Onaqa Yesus na minjrej, “E segi na ijo aŋgro 12 niŋgi gilŋgem. Ariya nunqo ambleq di aŋgro bei a mondor uge ti unu.”

<sup>71</sup> Yesus a Saimon Iskariot aqa ɣiri Judas a qa degsi marej. Yesus aqa aŋgro 12 naŋgi deqaji bei agi Judas. A na bunuqna Yesus osiq jeu tamo naŋgo banq di atej qaji.

## 7

### *Yesus a Jerusalem aiyej*

<sup>1</sup> Bati bei Yesus a Judia sawaq di laqajqa uratosiq walwelosiq Galili sawaq di laqnej. Di kiyaqa? Juda tamo kokba naŋgi a qalib moiqajqa maroqneb deqa.

<sup>2</sup> Ariya Juda nañgo yori bati koba jojomej. Yori bati di aqa utru agiende. Juda nañgo moma nañgi nami jagwa oqajqa tal gereiyoqnsib osi laqneb.

<sup>3</sup> Deqa Yesus aqa was nañgi na minjeb, “Ni Galili sawaq endi saim. Ni tigelosim Judia sawaq aiye. Aisim dia ino mañwa babtoqnimqa ino anjro nañgi unoqqnqab.

<sup>4</sup> Ni ino mañwa boleq atqajqa are soqnim ni uli na yaim. Ni tamo ungasari kalil nañgo ñamdamuq di yoqne.”

<sup>5</sup> Yesus aqa was nañgi a qa nañgo areqalo singilatosai deqa nañgi degsib misiliñ anjam minjeb.

<sup>6</sup> Onaqa Yesus na kamba minrej, “Ijo bati kereosaiunu. Ariya bati kalil di nuñgo bati.

<sup>7</sup> Mandam tamo nañgi niñgi jeutñgwa kerasai. Ariya nañgi e jeutbeqnub. Di kiyaqa? E nañgo kumbra uge uge babtetrnjreqnum deqa.

<sup>8</sup> Ningi segi aisib yori bati di uniy. Ijo bati kereosai unu deqa e aiqasai.”

<sup>9</sup> Yesus na aqa was nañgi degsi minjrsiqa a Galili sawaq di soqnej.

<sup>10</sup> Ariya aqa was nañgi yori bati di unqajqa ainabqa a dego aiyej. A boleq di aiyosai. Tamo nañgi a unaib deqa a loumosiq aiyej.

<sup>11</sup> Yori bati di brantonaqa Juda tamo kokba nañgi Yesus qa ñamoqneb. Ñamoqnsib maroqneb, “Yesus a qabi unu?”

<sup>12</sup> Onaqa tamo ungasari gargekoba nañgi segi segi ñirinjoqnsib anjam laña laña Yesus qa maroqneb. Qudei nañgi maroqneb, “Yesus a tamo bolequa.” Qudei nañgi maroqneb, “Sai. A na tamo

unjasari nañgi gisa gisañnjreqnu.”

<sup>13</sup> Nañgi degsib maroqneb. Ariya nañgi Juda tamo kokba nañgi ulainjrsib deqa nañgi Yesus qa boleq di anjam marosaioqneb.

<sup>14</sup> Ariya yori bati gilsiq ambleqyonaqa Yesus a segi brantosiqa atra tal miliqiq gilsiq dia tamo unjasari nañgi Qotei aqa anjam palontosiq minjrqnej.

<sup>15</sup> Onaqa Juda tamo kokba nañgi Yesus aqa anjam di quolibqa nañgi tulan prugugetosib segi segi maroqneb, “Yesus aqa powo kobaquja di qabe na osiqa anjam marelqnu? A nami skul beiq gilosai.”

<sup>16</sup> Onaqa Yesus na kamba minjrej, “Anjam e marelqnum endi ijo anjam sai. Anjam endi ijo Abu e qarinbej qaji aqa anjam.

<sup>17</sup> Tamo bei a Qotei aqa areqalo dauryqajqa are soqnimqa anjam e marelqnum qaji endi aqa utru a geregere poiyqas. Osim qalieqas, ijo anjam endi Qotei aqaq na bej. E ijo segi areqalo na marosaieqnum. A degsim qalieqas.

<sup>18</sup> Tamo bei aqa segi areqalo na anjam marqas di a aqa segi ñam soqtqa osim deqa anjam marqas. Ariya e Qotei aqa ñam soqtqa are qaleqnum. Agi a na e qarinbej. Deqa e tamo bole. E gisan tamoi sai.

<sup>19</sup> “Nami Moses na niñgi dal anjam engej. Ariya niñgi dal anjam di dauryosaieqnub. Kiyaqa niñgi e lubsib moiyyotbqa marelqnum?”

<sup>20</sup> Onaqa tamo unjasari nañgi na kamba Yesus minjeb, “Mondor uge inoq di unu. Yai na ni lumsim moiyyotmqa marelqnu?”

<sup>21</sup> Onaqa Yesus na kamba minjrej, “E mañwa qujai babtem deqa niñgi kalil prugugeteqnub.

**22** Ariya niŋgi are qaliy. Moses a niŋgi muluŋ engej deqa nuŋgo aŋgro mel naŋgo muluŋ waiyqa bati bosiq yori bati tiŋtiŋeqnu di niŋgi yori bati qa naŋgi muluŋ breinjreqnub. Bole, Moses a muluŋ qa utru sai. Nuŋgo moma naŋgi muluŋ qa utru.

**23** Niŋgi Moses aqa dal anjam dauryqa maroqnsib yori bati qa nuŋgo aŋgro mel naŋgi muluŋ breinjreqnub. Ariya e yori bati qa tamo qujai aqa jejamu boletonamqa niŋgi unsibqa kiyaqa e qa ɻirineqnu?

**24** Niŋgi laŋa ɻamdamu na ijo kumbra tenemtaib. Geregere ijo kumbra tenemtosib bole qa maroqniy.”

### *Yesus a tamo yai?*

**25** Bati deqa tamo ungasari qudei Jerusalem di soqneb qaji naŋgi segi segi endegsib maroqneb, “Yesus a kiyo Juda gate naŋgi na qalib moiqajqa laqnub?”

**26** Niŋgi uniy. A boleq di anjam palonteqnaqa naŋgi a anjam bei minjosaeqnu. Naŋgi qalie kiyo, a Kristus?

**27** Kristus a qabe na bqas di tamo bei a qalieqasai. Ariya tamo endi aqa qure utru di iga qalie bole.”

**28** Onaqa Yesus a atra tal miliq di sosiqa a leleŋosiqa Qotei aqa anjam palontosiq tamo ungasari naŋgi endegsi minjrej, “Niŋgi e qa qalie e? E qabe na bem di dego niŋgi qalie e? Ariya e ijo segi areqalo na bosai. Ijo Abu na e qarinjbonaq bem. Ijo Abu a segi anjam bole qa utru. Niŋgi a qa qaliesai.

**29** E a qa qalie bole. E aqaq na bem. A na e qariñbej.”

**30** Onaqa Juda tamo kokba nañgi Yesus aqa anjam di quisibqa nañgi a ojsib tonto talq di waiyqa maroqneb. Ariya a ojqa bati kereosaisoqnej deqa tamo bei na a ojosai.

**31** Bati deqa tamo uñgasari gargekoba nañgi Yesus qa nañgo areqalo siñgilatoqneb. Osib maroqneb, “Tamo endi a mañwa gargekoba babteqnu. Kristus a bosim tamo endi buñyqa keresai.”

### *Farisi nañgi Yesus ojqa mareb*

**32** Tamo uñgasari nañgi Yesus qa anjam degsib mareqnab Farisi nañgi quisibqa atra tamo kokba ti koroosib qaja tamo qudei qariñjrnab Yesus ojqa gileb.

**33** Deqa Yesus a endegsi marej, “E ningi koba na sokiñalayosi ijo Abu e qariñbej qaji aqaq olo oqwai.

**34** Oqitqa ningi e qa ñamqab e nubqasai. Qure e sqai di ningi oqwa keresai.”

**35** Onaqa Juda tamo kokba nañgi segi segi maroqneb, “Yesus a qabitimqa iga a unqasai? A Grik nañgo sawaq oqsim dia Juda tamo qudei ti sosib Grik nañgi anjam plaltosim minjroqnqas kiyo?

**36** A marqo, ‘Ningi e qa ñamqab di ningi e nubqasai. Qure e sqai di ningi oqwa keresai.’ Utru kiyaqa a degsi marqo?”

### *Yesus a ñambile gaigai sqajqa ya qa marej*

**37** Ariya yori bati gilsiq koboqa laqnaqa yori kobaquja brantonaqa Yesus a tigelosiqa lelenosiq marej, “Tamo bei a ya qaryimqa ijoq bosim ya uyem.

<sup>38</sup> Tamo bei a e qa aqa areqalo siñgilatqas di aqa are miliq na ñambile gaigai sqajqa ya oqoqnsim ya ani bul polyoqnqas. Nami Qotei aqa anjam degsib neñgreñyeb unu.”

<sup>39</sup> Yesus a ya qa marej di a Mondor Bole sigitosiqa yawo anjam marej. A lañ qureq ogo-saisosiq deqa a ñam koba osaisoqnej. Deqa batí di tamo nañgi a qa nañgo areqalo siñgilateb qaji nañgi Mondor Bole di osaisoqneb.

*Tamo uñgasari nañgi Yesus aqa anjam quisib poaiyeleb*

<sup>40</sup> Onaqa tamo uñgasari qudei nañgi Yesus aqa anjam di quisib maroqneb, “Bole, Qotei aqa medabu o tamo nami Qotei na qarinjyim bqajqa marej qaji agi a endi.”

<sup>41</sup> Onaqa qudei maroqneb, “Tamo endi a bole Kristus.” Onaqa qudei maroqneb, “Sai. Kristus a bqas di a Galili sawaq dena bqasai.

<sup>42</sup> Kristus a Devit aqa leñ na ñambabosim aqa qure utru Betlehem dena bqas. Nami Qotei aqa anjam degsib neñgreñyeb unu.”

<sup>43</sup> Tamo uñgasari nañgi degsib Yesus qa anjam tititosib ñiriñosib poaiyeleb.

<sup>44</sup> Osib nañgi qudei Yesus ojqa mareb. Mareb di tamo bei na a ojosai.

*Juda tamo kokba nañgi Yesus qa nañgo areqalo siñgilatosai*

<sup>45</sup> Onaqa qaja tamo nañgi olo puluosib atra tamo kokba ti Farisi ti nañgoq ainabqa minjreb, “Ningi kiyaqa Yesus ojsib osi bosai?”

<sup>46</sup> Onaqa qaja tamo nañgi na kamba minjreb, “Iga Yesus aqa anjam quonum di anjam bolequa

maroqnaj. Tamo bei nami anjam deqaji marosiaoqnej. Deqa iga a ojosai.”

<sup>47</sup> Onaqa Farisi naŋgi na minjreb, “Yesus a ninji dego gisanjwo e?”

<sup>48</sup> Niŋgi uniy. Juda gate bei Yesus qa aqa areqalo sinjilatosai. Farisi tamo bei dego Yesus qa aqa areqalo sinjilatosai. Sai bole sai.

<sup>49</sup> Ariya tamo uŋgasari laŋa laŋaj naŋgi dal anjam qaliesai deqa naŋgi Yesus qa naŋgo areqalo singilateqnub. Tamo uŋgasari naŋgi di Qotei na torei qoreinjrim padalqab.”

<sup>50</sup> Onaqa Juda gate Nikodemus agi nami Yesus aqaq gilsiq anjam minjej qaji a Farisi naŋgo ambleq di tigelosiqa minjrej,

<sup>51</sup> “Gago dal anjam kiyersiunu? Iga tamo bei laŋa ojsim aqa une qa pegiyqom e? Sai. Gago dal anjam degsi sosai. Iga mati aqa anjam qusim aqa kumbra geregere qaliegom.”

<sup>52</sup> Onaqa Farisi naŋgi na kamba minjeb, “Ni dego Galili qaji tamo kiyo? Qotei aqa anjam neŋgreŋq di unu qaji di geregere peleiye. Peleiyim endegsi poimqas, Qotei aqa medabu o qaji tamo bei a Galili sawaq dena bqasai.”

### *Uŋja bei une atej qaji a ojsib Yesus aqa areq osib beb*

<sup>53</sup> Onaqa koro koboonaqa tamo uŋgasari kalil naŋgi jaraiyosibqa naŋgo segi segi talq gilelejeb.

## 8

<sup>1</sup> Ariya Yesus a Oliv manaq oqej.

<sup>2</sup> Nobqolo ambru a olo tigelosiqa atra tal miliq gilej. Gilsiq di sonaqa tamo uŋgasari kalil naŋgi

aqa areq beqnabqa a awoosiqa Qotei aqa anjam palontosiq minjroqnej.

<sup>3</sup> Ariya uña bei a tamo bei wo une ateqnab tamo qudei na uneb. Unsibqa dal anjam qalie tamo nañgi ti Farisi nañgi ti minjrnab quisibqa uña di ojsib osi bosib tamo ungasari nañgo ñamdamuq di tigelteb.

<sup>4</sup> Osib Yesus minjeb, “O Qalie Tamo Koba, uña endi a tamo bei wo une ateqnab tamo qudei na unjronub.

<sup>5</sup> Ni qalie, Moses a nami dal anjam endegsi nengreñyej, ‘Uña bei a tamo bei wo une atibqa menij na a qalib moiym.’ Deqa ni kiyersi marqam?”

<sup>6</sup> Nañgi Yesus degsib nenemyeb. Di kiyaqa? Nañgi a laña are qametib a anjam bei grotimqa quisib a ojqajqa deqa. Onaqa Yesus a kamba nañgi anjam bei minjrosai. A mana qamsiq turuosiqa bañ gei na mandamq di nengreñyoqnej.

<sup>7</sup> Onaqa nañgi na olo anjam di Yesus nenemyonabqa a tigelosiqa minjrej, “Nuñgo ambleq di tamo bei une saiqoji unu kiyo? Soqnimqa niñgi na minjib a namo menij osim uña di qalem.”

<sup>8</sup> Osiqa olo turuosiqa mandamq di nengreñyoqnej.

<sup>9</sup> Onaqa nañgi Yesus aqa anjam di quisibqa segi segi oqedosib jaraiyeb. Tamo qeli nañgi namoosib jaraiyonab qudei bunueb. Osib nañgi kalil Yesus uratonab a segi soqnej. Uña di a Yesus aqa ulatumuq di tigelesoqnej.

<sup>10</sup> Onaqa Yesus a olo tigelosiqa uña di minjej, “Uña, tamo nañgi qabitonub? Ni unime. Tamo bei na ino une qa olo ni mermosai.”

**11** Onaqa uŋa dena Yesus minjej, “Od, Tamo Koba, tamo bei na ijo une qa olo merbosai.” Onaqa Yesus na minjej, “E dego ino une qa mermqasai. Deqa ni gile. Olo une bei ataim.”

*Yesus a puloŋ bulosiq tamo naŋgi suwantnjre-qnu*

**12** Osiqa Yesus na tamo uŋgasari naŋgi olo endegsi minjrej, “E mandamq endi puloŋ bul unum. Tamo a e daurbqas di a ambruq di walwelqasai. A suwaŋoq di walweloqnsim ɻambile gaigai sqas.”

**13** Onaqa Farisi naŋgi Yesus aqa anjam di quisib minjeb, “Ni segi ino kumbra ti ino wau ti ubtosim mareqnum. Deqa iga bole qa marqasai.”

**14** Onaqa Yesus na kamba minjrej, “E segi ijo kumbra ti ijo wau ti ubtosiy marqai di niŋgi bole qa marqa kere. Di kiyaqa? E qabe na bem di e segi qalie bole. E puluosiy olo qabitqai di dego e qalie. Ariya e qabe na bem di niŋgi qaliesai. E puluosiy olo qabitqai di dego niŋgi qaliesai.

**15** Niŋgi mandam qa kumbra na tamo naŋgi peginqreqnub. E tamo naŋgi peginqrosaieqnum.

**16** Ariya e tamo naŋgi peginqrqai di e kumbra tinqtiŋ na peginqrqai. Di kiyaqa? E segi na tamo naŋgi peginqrosaieqnum. Ijo Abu e qarinbej qaji a ombla na tamo naŋgi peginqreqnum.

**17** Nunjo dal anjam bei endegsib nengreyeb unu, ‘Tamo aiyel naŋgi anjam qujai marqab di naŋgo anjam bole brantqas.’

**18** Deqa e segi ijo kumbra ti ijo wau ti ubtosim mareqnum. Ijo Abu e qarinbej qaji a dego e ombla ijo kumbra ti ijo wau ti ubtosim mareqnum.”

**19** Onaqa Farisi naŋgi na Yesus nenemyeb, “Ino Abu a qabi unu?”

Onaqa Yesus na kamba minjrej, “Niŋgi e qa qaliesai deqa niŋgi ijo Abu qa dego qaliesai. Niŋgi e qa qalie qamu niŋgi ijo Abu qa dego qalie qamu.”

**20** Yesus a atra tal miliqq di sosiqa anjam degsi plaltosiq marej. A silali ato qaji warum jojomq di awesoqnej. Warum dia tamo naŋgi Qotei atraiy-oqnsibqa silali atoqneb. Yesus ojqa bati kereo-saisoqnej deqa tamo bei na a ojosai.

*Yesus a marej, “Qure e oqwai di niŋgi oqwa keresai”*

**21** Onaqa Yesus na tamo uŋgasari naŋgi olo endegsi minjrej, “E niŋgi uratŋgitqa niŋgi e qa ŋamqab e nubqasai. Niŋgi nunŋo une ti sosib moreŋqab. Qure e oqwai di niŋgi oqwa keresai.”

**22** Onaqa Juda naŋgi Yesus aqa anjam di quisibqa segi segi endegsib maroqneb, “Yesus a kiyaqa marqo, ‘Qure e oqwai di niŋgi oqwa keresai?’ A na aqa segi jejamu qalim moiqas kiyo?”

**23** Onaqa Yesus na olo minjrej, “Niŋgi mandam endena branteb. E laŋ goge na bem. Niŋgi mandam qaji tamo. E mandam qaji tamo sai.

**24** Deqa niŋgi e qa nunŋo areqalo singilatiy. Osib poiŋgem, e segi qujai gaigai degsi unum. Niŋgi degyqasai di niŋgi nunŋo une ti sosib moreŋqab. Agi e nami niŋgi degsi merŋgonum.”

**25** Onaqa naŋgi na Yesus nenemyeb, “Ni tamo yai?” Onaqa Yesus na minjrej, “E nami ijo kumbra ti ijo wau ti ubtosim merngoqnsim agi bini merŋgeqnum.

**26** E anjam gargekoba mern̄siy nun̄go une qa pegingwajqa ijo areqaloq di unu. Ariya ijo Abu e qarin̄bej qaji a anjam bole qa utru. Deqa anjam kalil a na merbeqnu qaji di e quoqnsim tamo un̄gasari mandamq endi unub qaji nañgi minjreqnum.” Yesus a nañgi degsi minjrej.

**27** Juda nañgi qaliesai, Yesus a Abu qa nañgi minjrej.

**28** Deqa a na olo minjrej, “Nin̄gi e Tamo Añgro soqtbosib gaibatqab bati deqa nin̄gi poingwas, e segi qujai gaigai degsi unum. Osib qaliegab, e ijo segi areqalo na kumbra bei yosaieqnum. Anjam kalil ijo Abu na merbeqnaq queqnum qaji di segi e mareqnum.

**29** Ijo Abu e qarin̄bej qaji a e ombla sosiqa taqbejunu. E gaigai kumbra kalil a tulan̄ areareteqnu qaji di dauryeqnum. Deqa a na e uratbosaeqnu.”

**30** Yesus a anjam degsi marnaqa tamo un̄gasari nañgi quisibqa nañgi gargekoba a qa nañgo areqalo singilateb.

### *Yesus na iga aqaryraigimqa gago une na iga taqatgwa keresai*

**31** Juda nañgi Yesus qa nañgo areqalo singilateb qaji nañgi a na endegsi minjrej, “Nin̄gi ijo anjam singila na dauryoqniy. Nin̄gi degyqab di nin̄gi ijo añgro tiñtiñ sqab.

**32** Sosibqa nin̄gi anjam bole geregere qaliegab. Yimqa anjam bole dena nin̄gi aqaryain̄gimqa in̄gi bei na nin̄gi ojsim taqatgwa keresai.”

**33** Onaqa nañgi na kamba minjeb, “Iga Abraham aqa moma. Iga nami tamo bei aqa kan̄gal tamo

sosai. Deqa ni kiyaqa mergonum, ‘Ingi bei na ninji ojsim taqatنجwa keresai?’”

**34** Onaqa Yesus na kamba minjrej, “E bole merنجwai. Tamo kalil une yeqnub qaji naنجi une aqa kaنجgal tamo bul unub.

**35** Kanجgal tamo naنجgi laجا wau tamo unub deqa naنجgi abu saiqoji. Ariya angro naنجgi abu ti unub deqa naنجgi gaigai naنجgo abu ombla sqab.

**36** E Qotei aqa Niri deqa e Abu ti unum. Deqa e na ninji aqaryaingitqa nuنجgo une na ninji ojsim taqatنجwa keresai bole sai.

**37** “E qalie, ninji Abraham aqa moma unub. Ariya ijo anjam nuنجgo are miliq di sosai. Utru deqa ninji e lubsib moiytbqa mareqnub.

**38** Kumbra kalil ijo Abu na e osorbeqnu qaji deqa e saeqnum. Niنجgi dego kumbra kalil nuنجgo abu na osorنجgeqnu qaji di dauryeqnub.”

**39** Onaqa Juda naنجgi Yesus aqa anjam di quisibqa olo kamba minjeb, “Gago abu bole agi Abraham.” Onaqa Yesus na minjrej, “Niنجgi Abraham aqa angro unub qamu kumbra Abraham a yoqnej qaji di ninji dego dauryeqnub qamu.

**40** Ariya ninji dauryosaieqnub. Anjam bole kalil Qotei na e merbeqnaq queqnum qaji di e ninji olo merنجgeqnam ninji e lubsib moiytbqa mareqnub. Abraham a kumbra deqaji yosaioqnej.

**41** Niنجgi nuنجgo abu aqa kumbra dauryeqnub.” Onaqa naنجgi na minjeb, “Gago ai naنجgi laجا laجا laosib iga ئىambabtgosai. Gago Abu qujai agi Qotei.”

**42** Onaqa Yesus na minjrej, “Qotei a nuنجgo Abu qamu ninji e qalaqlaibonub qamu. Di kiyaqa?

E Qotei aqaq na bem deqa. E ijo segi areqalo na bosai. Qotei na e qarinjbonaq bem.

**43** “Kiyaqa niŋgi ijo anjam endi poiŋgosai? E merŋgwai. Niŋgi ijo anjam quqwa keresai deqa.

**44** Niŋgi nuŋgo abu Satan aqa aŋgro sosib aqa areqalo dauryqajqa tulaŋ ſiŋgilaeqnub. Satan a nami leŋ ojo tamo soqnej agi a bini degsi unu. A kumbra bole dauryosaieqnub. A kumbra bole dauryqajqa torei urateqnub. A gisaŋ tamo. A anjam marqas di a gisaŋ anjam segi marqas. A gisaŋ anjam qa utru. A gisaŋ anjam kalil qa abu.

**45** Ariya e anjam bole palonteqnam niŋgi ijo anjam nuŋgo areqaloq di ſiŋgilatosaeqnub.

**46** Niŋgi ijo jejamuq di une qametbeqnub e? E anjam bole maritqa niŋgi kiyaqa ijo anjam nuŋgo areqaloq di ſiŋgilatqasai?

**47** Tamo uŋgasari Qotei aqaq na beb qaji naŋgi aqa anjam queqnub. Niŋgi Qotei aqaq na bosai deqa niŋgi aqa anjam quosaieqnub.”

### *Yesus a segi qujai gaigai degsi unu*

**48** Onaqa Juda naŋgi Yesus aqa anjam di quisibqa minjeb, “Iga bole maronum, ni Samaria qaji tamo. Mondor uge inoq di unu.”

**49** Onaqa Yesus na kamba minjrej, “Mondor uge ijoq di sosai. E ijo Abu aqa ñam soqteqnam niŋgi na olo ijo ñam ugetetbeqnub.

**50** E ijo segi ñam soqtqa are qalosaieqnum. Ijo Abu a segi na ijo ñam soqtetbqa are qaleqnu. Agi a na qujai nuŋgo une qa niŋgi peginjgeqnu.

**51** E bole merŋgwai. Tamo bei na ijo anjam qusim dauryqas di a moiqa keresai. Sai bole sai.”

**52** Onaqa Juda naŋgi na minjeb, “Endego iga qalieonum, mondor uge inoq di unu. Abraham a moiyej. Qotei aqa medabu o qaji tamo kalil naŋgi dego moreŋekriteb. Ariya ni maronum, ‘Tamo bei na ijo anjam quisim dauryqas di a moiqa keresai.’

**53** Ni gago moma utru Abraham bunyqam kiyo? A moiyej. Qotei aqa medabu o qaji tamo kalil naŋgi dego moreŋeb. Deqa ni segi qa kiyersi mar-qam?”

**54** Onaqa Yesus na kamba minjrej, “E ijo segi ñam soqteqnum qamu e laŋa soqteqnum qamu. Ariya ijo Abu na ijo ñam soqtetbeqnu. Agi niŋgi a qa mareqnub, ‘A gago Qotei.’

**55** Niŋgi a qa qaliesai. E segi a qa qalie. E a qa qaliesai degsi marqai di e niŋgi bul gisan tamo sqai. E a qa qalieosim deqa agi aqa anjam dauryeqnum.

**56** “Nunjo moma utru Abraham a nami ijo bqa-jqa batı unqa marsiqa areboleboleiyonaq soqnej. A unsiqa tulaj areboleboleiyej.”

**57** Onaqa Juda naŋgi Yesus aqa anjam di quisibqa minjeb, “Ino wausau 50 osaiunu. Ni Abraham unem e?”

**58** Onaqa Yesus na kamba minjrej, “E bole mern̄gwai. Abraham a ḥambabosaisonaqa e segi qujai gaigai degsi unum.”

**59** Onaqa naŋgi Yesus aqa anjam di quisibqa minjin̄ oqetn̄jrnaqa menin̄ elējosib Yesus menin̄ na qalsib moiytqa yonab a loumosiq atra tal uratosiq ulaŋej.

## 9

*Yesus a tamo ñam qandimo boletej*

<sup>1</sup> Yesus a walwelosiq gilsiq gam qalaq di tamo bei ai miligiq na ɣam qandimo ɣambabej qaji di awesonaq unej.

<sup>2</sup> Onaqa Yesus aqa aŋgro naŋgi na nenemyeb, “O Qalie Tamo Koba, yai aqa une na tamo di a ɣam qandimo ɣambabej? Aqa segi une na kiyo aqa ai abu naŋgo une na kiyo?”

<sup>3</sup> Onaqa Yesus na kamba minjrej, “Tamo di aqa une na sai. Aqa ai abu naŋgo une na sai dego. A ɣam qandimo ɣambabej di aqa utru agiende. Qotei na a boletimqa tamo uŋgasari naŋgi Qotei aqa wau unsib aqa ñiam soqtqab. <sup>4</sup> Sawa suwaŋjesoqnimqa ijo Abu e qariŋbej qaji aqa wau yoqñqom. Ambrumqa tamo naŋgi wauqa kerasai.

<sup>5</sup> E mandamq endi sosimqa e mandam endeqa puloŋ bul unum.”

<sup>6</sup> Yesus na aqa aŋgro naŋgi degsi minjrsiqa mandamq di miselosiq aqa misel mandam ti ojnaq jagi bulonaq osiqa tamo di aqa ɣamdamuq di atej.

<sup>7</sup> Atsiqa qariŋyosiq minjej, “Ni gilsim ya bei ñam Siloam di yal.” “Siloam” di Hibru anjam. Aqa damu, “Qariŋyqo.” Onaqa tamo di a gilsiq yalon-aqa ɣam poiyonaqsa sawa unej. Sawa unsiqa olo puluosi bej.

<sup>8</sup> Bonaqa aqa qure qujai naŋgi ti tamo naŋgi a nami ɣam qandimo sosiqa silali qa ɣilnjqroqnej qaji naŋgi ti a unsibqa mareb, “Tamo nami silali qa ɣilgoqnej qaji agiende kiyo?”

<sup>9</sup> Onaqa tamo qudei naŋgi mareb, “Od, agi a qujai.” Onaqa tamo qudei naŋgi mareb, “A sai. Endi tamo bei. Aqa ulatamu tamo ɣam qandimo aqa ulatamu bul.” Onaqa a segi na minjrej, “Agi e

segí.”

<sup>10</sup> Onaqa tamo ungasari naŋgi na nenemyeb, “Ni ɻamdamu kiyersi poimqoqa sawa unonum?”

<sup>11</sup> Onaqa a na kamba minjrej, “Tamo bei aqa ɻam Yesus a na jagi gereiyosiq ijo ɻamdamuq di atsiqa merbqo, ‘Ni gilsim Siloam yaq di yal.’ Degsi merbqoqa e gilsim yalonumqa ɻam poibqoqa sawa unonum.”

<sup>12</sup> Onaqa tamo ungasari naŋgi na olo nenemyeb, “Tamo ni boletmqo qaji a qabi unu?” Onaqa a na minjrej, “A qabitqo kiyo di e qaliesai.”

<sup>13</sup> Onaqa tamo ungasari naŋgi na tamo nami ɻam qandimyesoqnej qaji di osib Farisi naŋgoq osi gileb.

<sup>14</sup> Bati Yesus na jagi gereiyosiq tamo di boletej di Juda naŋgo yori bati.

<sup>15</sup> Deqa Farisi naŋgi na tamo di endegsib nenemyeb, “Ni ɻamdamu kiyersi poimqoqa sawa unonum?” Onaqa a na minjrej, “Tamo bei aqa ɻam Yesus a jagi misel ti bulyosiq ijo ɻamdamuq di atqoqa e yalonum ɻam poibqoqa sawa unonum.”

<sup>16</sup> Onaqa Farisi qudei naŋgi mareb, “Yesus a yori bati grotqo deqa iga qalieonum, Qotei na a qarinjosai.” Ariya Farisi qudei naŋgi mareb, “Sai. Une tamo a kiyersim maŋwa deqaji babtqas?” Farisi naŋgi anjam deqa ɻiriŋosib poaiyeleb.

<sup>17</sup> Onaqa naŋgi na tamo di olo nenemyeb, “Yesus a ino ɻamdamu boletqo deqa ni a qa kiyersi are qalonum?” Onaqa a na minjrej, “E are qalonum, a Qotei aqa medabu o qaji tamo bole.”

<sup>18</sup> Tam di a nami ɻam qandimo sosiqa olo ɻam poiyej deqa Juda tamo kokba naŋgi areqalo kobaiyeb. Osib aqa ai abu naŋgi metnjrnb beb.

<sup>19</sup> Bonabqa endegsib nenemnjreb, “Tamo endi nun̄go aŋgro e? A bole ɻam qandimo ɻambabej e? Boleamqa nin̄gi na mergibqa iga quqwom. A kiyersi bini ɻam poiyoqqa sawa uneqnu?”

<sup>20</sup> Onaqa aqa ai abu naŋgi na kamba minjreb, “Di bole, a gago aŋgro. A ɻam qandimo ɻambabej di iga qalie.

<sup>21</sup> Ariya a kiyersi bini ɻam poiyoqqa sawa uneqnu di iga qaliesai. Tamo yai na aqa ɻamdamu boletqo di dego iga qaliesai. A tamo boleqo. A segi nenemyibqa a segi na marqas.”

<sup>22</sup> Aqa ai abu naŋgi Juda tamo kokba naŋgi ulainjrsib deqa anjam degsib minjreb. Juda tamo kokba naŋgi nami maroqneb, “Tamo bei a marqas, ‘Yesus a bole Kristus,’ degsi marimqa tamo di iga taqal waiyonam a bunu olo Qotei tal miliq gilqasai.”

<sup>23</sup> Deqa naŋgi aiyel Juda tamo kokba naŋgi ulainjrsib minjreb, “A tamo boleqo. A segi nenemyiy.”

<sup>24</sup> Onaqa tamo nami ɻam qandimyesoqnej qaji di Farisi naŋgi na olo metonab bonaq minjeb, “Ni Qotei aqa ɻam soqtosim anjam bole merge. Iga qalieonum, Yesus a une tamo. Ni degsi merge.”

<sup>25</sup> Onaqa a na kamba minjrej, “A une tamo kiyo sai kiyo di e qaliesai. Ariya e nami ɻam qandimo soqnem bini e olo ɻam poibqoqqa sawa uneqnum di e qalieonum.”

<sup>26</sup> Onaqa naŋgi na olo nenemyeb, “Yesus a ni kiyermqo? A kiyersi ino ɻamdamu boletqoqqa ni sawa uneqnum?”

<sup>27</sup> Onaqa a na kamba minjrej, “E nami merŋgonum nin̄gi ijo anjam quetbosai. Kiyaqa

ololo mern̄git quqwab? Niñgi dego Yesus aqa an̄gro sqajqa are unu e?”

<sup>28</sup> Onaqa Farisi nañgi na tamo di misiliyosib minjeb, “Ni Yesus aqa an̄gro. Iga Moses aqa an̄gro.

<sup>29</sup> Iga qalie, Qotei a bole Moses anjam minjonej. Ariya Yesus a qabe na kiyo bej di iga qaliesai.”

<sup>30</sup> Onaqa tamo dena kamba minjrej, “E nunjo anjam di quonum ugeibqo. Ningi mareqnub, ‘Yesus a qabe na kiyo bej di iga qaliesai.’ Ariya Yesus a ijo ñamdamu boletqoqa e sawa uneqnum.

<sup>31</sup> Iga qalie, tamo nañgi une ateqnub qaji nañgi Qotei pailyqab di a nañgo pailyo quqwasai. Ariya tamo nañgi Qotei qa ulaoqnsib aqa areqalo dau-ryeqnub qaji nañgi pailyqab di a nañgo pailyo quqwas.

<sup>32</sup> Tamo ai miliq qandimo ñambabo qaji di tamo bei na nami boletonaq iga quosaioqnem.

<sup>33</sup> Qotei na Yesus qarinjosai qamu a mañwa bei babbta keresai qamu.”

<sup>34</sup> Onaqa Farisi nañgi na kamba minjeb, “Une aqa kumbra inoq di beterejunu. Ni une ti sosim ñambabem agi bini ni degsi unum. Deqa ni Qotei aqa anjam iga mergaim.” Degr̄sib minjsib a taqal waiyosib a olo Qotei tal miliq gilqajqa saidyeb.

### *Farisi nañgi tamo ñam qandimo bul unub*

<sup>35</sup> Farisi nañgi na tamo di taqal waiyonab Yesus a di quisicha a qa ñamosiq itosiq nenemyej, “Ni Tam An̄gro qa ino areqalo sin̄gilatonum e?”

<sup>36</sup> Onaqa a na kamba Yesus minjeb, “O Tam Koba, Tam An̄gro di yai? Ni merbimqa e qusiy ijo areqalo a qa sin̄gilatqai.”

**37** Onaqa Yesus na minjej, “Ni na Tamo Añgro agi itonum. Endego aqo ombla anjam mareqnum.”

**38** Onaqa a na Yesus minjej, “Od, Tamo Koba, e ni qa ijo areqalo singilatonum.” A degsi Yesus minjsiqa aqa areq di siñga pulutosiqa a biñiyej.

**39** Onaqa Yesus a marej, “E tamo uñgasari nañgi peginjrqajqa deqa mandamq aiyem. Deqa tamo ñam qandimo unub qaji nañgi olo ñamdamu bole atoqnqab. Tamo ñamdamu bole ateqnub qaji nañgi olo ñam qandimnjresqas.”

**40** Onaqa Farisi qudei Yesus aqa jojomq di tigelesoqneb qaji nañgi aqa anjam di quisib nenemyeb, “Iga dego ñam qandimgejunu kiyo?”

**41** Onaqa Yesus na kamba minjrej, “Ningi ñam qandimgejunu qamu ningi une saiqoji unub qamu. Ariya ningi mareqnub, ‘Iga ñamdamu bole ateqnum.’ Dego di ningi une ti unub.”

## 10

### *Yesus a kaja nañgo mandor bole*

**1** Osiqa Yesus a olo marej, “E bole merñgwai. Tamo bei a kaja nañgo jeñ miligiq gilqa osimqa a sirañmeq na gilqa uratosim qalaq na jeñ prugosim miligiq gilqas di a bajñ tamo.

**2** Tamo a sirañmeq na jeñ miligiq gilqas di a kaja nañgo mandor bole.

**3** Deqa sirañme taqato tamo na sirañ waqtetonim miligiq giloqnsim aqa segi kaja nañgo ñam metnjroqnqas. Metnjroqnim nañgi aqa kakro quisib boqnib joqsim oqedoqnqas.

**4** A na aqa segi kaja kalil nañgi joqsim oqedoqn-sim a nañgi qa namoosim giloqnimqa nañgi aqa kakro qa poinjrim deqa nañgi a dauryoqnqab.

**5** Tamo lañaj bei na nañgi metnjqras di nañgi aqa kakro qalieqasai deqa nañgi a dauryqasai. Nañgi a uratosib jaraiqab.”

**6** Yesus na yawo anjam degsi minjrnaqa nañgi quisib utru poinjrosai.

**7** Deqa Yesus a damu ubtosiqa endegsi minjrej, “E bole mernjgwai. Kaja nañgi di ijo segi tamo uñgasari nañgi sigitnjrejunub. Jen miliq q gilqajqa sirañme agi e segi.

**8** Anjam plalto tamo kalil e bosaisonam nami beb qaji nañgi baiñ tam bul. Deqa kaja nañgi nañgo medabu dauryosaioqneb.

**9** E segi sirañme. Tamo uñgasari nañgi ijoq na jeñ miliq q giloqneb di Qotei na nañgi eleñqas. Amqa nañgi miliq q gile oqede oqnsib ingi bole uyoqneb.

**10** “Niñgi qalie, baiñ tam nañgi kaja baiñosib ugeugeinjrsib ñumqajqa deqa beqnub. Ariya e degyqa bosai. E na kaja nañgi ñambile enjritqa nañgi ñambile tulanq boledamu oqajqa e deqa bem.

**11** E kaja nañgo mandor bole. Mandor bole aqa kumbra agiende. A kaja nañgi aqaryainjrqas marsimqa aqa segi ñambile uratosim moiqas.

**12** Ariya tamo lañaj aqa kumbra degosai. A silali qa segi wauqas deqa a kaja nañgi geregere taqatnjrqasai. A kaja nañgo mandor bolesai. Kaja nañgi aqa sai. Deqa bañjuwanq bamqa unsim kaja nañgi uratnjsim ulanqas. Yimqa bañjuwanq na kaja qudei ñumim kalil segisegiosib jaraiqab.

**13** A silali qa segi wauqas deqa a kaja naŋgi geregere taqatnjqasai. A kaja naŋgi qa are qalosai. Baŋju juwaŋ bamqa a kaja naŋgi uratnjsim ulaŋqas.

**14** “E kaja naŋgo mandor bole. E ijo segi kaja naŋgi qa qalie bole. Ijo segi kaja naŋgi e qa dego qalie bole.

**15** Ijo Abu a e qa qalie bole. E ijo Abu qa qalie bole. Dego kere e ijo segi kaja naŋgi qa qalie bole. Naŋgi dego e qa qalie bole. Deqa e na ijo kaja naŋgi aqaryainjrqa marsiy ijo segi ŋambile uratosiy moiqai.

**16** Ijo kaja qudei dego jeŋ oqeeq di unub. Naŋgi jeŋ miliqiq di sosai. Deqa e naŋgi dego joqsiy bosiy ijo kaja jeŋ miliqiq di unub qají naŋgi ti turtnjsiy jeŋ qujaiq di breinjrit naŋgi mandor qujai ti sqab. Sosib ijo medabu quoqnqab.

**17** Ijo Abu na e tulaŋ qalaqalaibeqnu. Di kiyaqa? E ijo segi ŋambile uratosiy moisiy olo subq na tigelqai.

**18** Tamo bei na ijo ŋambile yaibqa keresai. E ijo segi areqalo na ijo ŋambile uratosiy moiqai. E singila ti unum deqa e na ijo ŋambile uratqa kere. Osiy olo ijo ŋambile oqa kere. Ijo Abu a nami merbej, ‘Ni degye.’ Deqa e degyqai.”

**19** Onaqa Juda naŋgi Yesus aqa anjam deqa ŋirinjosib poaiyeleb.

**20** Osib naŋgi gargekoba endegsib maroqneb, “Yesus a mondor uge tiunu deqa a tulaŋ nanariqo. Kiyaqa niŋgi aqa anjam queteqnub?”

**21** Onaqa naŋgi qudei maroqneb, “Tamo a mondor uge ti sqas di a anjam bole deqaji marqa kere-

sai. Mondor uge na tamo ñam qandimo boletqa kere e? Sai.”

*Juda tamo kokba nañgi Yesus qa minjinj oqetnjrej*

<sup>22</sup> Nami Juda nañgo moma nañgi atra tal bunuj sirañ waqteb. Deqaolo are qalqajqa yori bati Jerusalem dia brantej. Bati di ulili aiqa bati.

<sup>23</sup> Onaqa Yesus a atra tal miliqq gilsiga tal me ñam Solomon dia walweloqnej.

<sup>24</sup> Walweleqnaqa Juda tamo kokba nañgi aqa areq di koroosib minjeb, “Bati gembub koboamqa ni na ino kumbra ti ino wau ti ubtosim geregere mergwam? Ni Kristus amqa geregere merge.”

<sup>25</sup> Onaqa Yesus na kamba minjrej, “E nami ningi merηgem, ‘E Kristus.’ Merηgonam ningi qunab ugeingej. Wau kalil e ijo Abu aqa ñam na yeqnum qaji di ningi geregere tenemtoqniy. Tenemtosib endegsi poiñgas, bole, e Qotei aqa Niri.

<sup>26</sup> Niñgi ijo kaja sai deqa niñgi e qa nuñgo areqalo singilatosiaeqnub.

<sup>27</sup> Ijo kaja nañgi ijo medabu queqnub. E nañgi qa qalie bole. Nañgi e daurbeqnub.

<sup>28</sup> E nañgi ñambile enjreqnum deqa nañgi ñambile gaigai sqab. Nañgi padalqasai. Sai bole sai. Tamo bei na nañgi ijo bañq dena yaibqa keresai.

<sup>29</sup> Ijo Abu na nañgi e ebej. A segi qujai ingi ingi kalil tulan̄ buñnjrejunu. Deqa tamo bei na ijo kaja nañgi ijo Abu aqa bañq dena yaiyqa keresai bole sai.

<sup>30</sup> Aqo ijo Abu wo tamo qujai.”

<sup>31</sup> Onaqa Juda tamo kokba nañgi Yesus aqa anjam di quisibqa nañgi a qalib moiqajqa marsib meninj eleñeb.

<sup>32</sup> Osib Yesus qalqa laqnab endegsi minjrej, “E na Abu aqa wau bole gargekoba niŋgi osorŋgoqnem. Wau bole kiye qa niŋgi e lubsib moiyoqbqa meniŋ eleŋonub?”

<sup>33</sup> Onaqa Juda tamo kokba naŋgi na kamba endegsib minjeb, “Wau bole bei qa iga ni meniŋ na lumqasai. Ni Qotei misiliŋyonum deqa lumqom. Agi ni segi qa maronum, ni Qotei. Ni degsi maraim. Ni mandam tamo. Deqa ni lumqom.”

<sup>34</sup> Onaqa Yesus na kamba naŋgi minjrej, “Nuŋgo dal anjam bei nami endegsib neŋgreŋyeb, ‘E niŋgi mernŋgonum, “Niŋgi qotei.”’

<sup>35</sup> Agi Qotei na tamo qudei naŋgi minjrej, ‘Niŋgi qotei.’ A na naŋgi degsi minjrej. Niŋgi qalie, iga Qotei aqa neŋgreŋ bei gentqa keresai.

<sup>36</sup> Abu a segi na e giltbosiqqa qarinjbonaq mandamq aiyem deqa e maronum, ‘E Qotei aqa Niri.’ E degsi maronum deqa niŋgi kiyaqa merbonub, ‘Ni Qotei misiliŋyonum?’

<sup>37</sup> “E ijo Abu aqa wau yosaiotqa niŋgi ijo anjam quetbaib.

<sup>38</sup> Ariya e Abu aqa wau yitqa niŋgi ijo anjam quib ugeiŋgim olo ijo wau unsib dena geregere poŋgem, bole, Abu na e beterbesonaqa e kamba Abu beteryejunum.”

<sup>39</sup> Onaqa naŋgi Yesus aqa anjam di quisib a ojqa yonab a naŋgi qa loumosiq ulanjej.

<sup>40</sup> Ulaŋosiqa olo Jordan ya taqal beiq gilej. Gilsiqqa Jon na nami tamo uŋgasari naŋgi yansnjroqnej qaji sawaq di soqnej.

<sup>41</sup> Sonaqa tamo uŋgasari gargekoba naŋgi aqaq giloqnsib segi segi maroqneb, “Jon a maŋwa bei

babtosaiqnej. Ariya anjam kalil Jon a Yesus qa maroqnej qaji di bole.”

<sup>42</sup> Nañgi degsib maroqneb deqa Yesus a sawa dia sonaqa tamo ungasari gargekoba nañgi a qa nañgo areqalo siñgilateb.

## 11

### *Lasarus a makobaiyosiq moiyej*

<sup>1</sup> Tamo bei aqa ñam Lasarus a maiyej. Lasarus aqa qure utru Betani. Qure di Maria aqa jaja Marta wo nañgo qure utru.

<sup>2</sup> Maria agi bunuqna Tamo Koba Yesus aqa siñgaq di goreñ bilentosiq aqa gate bañga na piyej qaji a di. Aqa jaja Lasarus a maiyej.

<sup>3</sup> Deqa Maria Marta wo nañgi na tamo qudei qariñjrnab Yesus aqaq gilsib minjeb, “O Tamo Koba, tamo ni tulañ qalaqlalaiyeqnum qaji a maiyqo.”

<sup>4</sup> Onaqa Yesus a nañgo anjam di quasiqa minjrej, “Ma di moiqajqa ma sai. A maiyqo di aqa utru agiende. Qotei aqa siñgila boleq dimqa tamo ungasari nañgi unsib Qotei aqa ñam soqtqajqa deqa a ma di oqo. E Qotei aqa Niri dego ñam koba oqai.”

<sup>5</sup> Yesus a Marta aqa jaja Maria wo nañgi aiyal qalaqlainjrej. A Lasarus dego qalaqlalaiyej.

<sup>6</sup> Lasarus a maiyej anjam di quasiqa quosaibusiqa sawa a soqnej qaji dia bati aiyal olo soqnej.

<sup>7</sup> Sosiqa aqa añgro nañgi minjrej, “Iga olo Judia sawaq aiqom.”

<sup>8</sup> Onaqa nañgi na Yesus minjeb, “O Qalie Tamo Koba, nami yala Juda nañgi meniñ na ni lumqa mareb. Di ni olo deq aiqam e?”

<sup>9</sup> Onaqa Yesus na kamba minjrej, “Señ oqsiq qanam jigeqo sawa suwañqo. Deqa tamo nañgi walwelqa kere. Mañgalqasai.

<sup>10</sup> Ariya señ aisiq qoloqo sawa ambruqo. Deqa tamo nañgi walwelqa keresai. Mañgalqab.”

<sup>11</sup> Yesus a anjam degsi marsiqa olo minjrej, “Gago was Lasarus a ñeiejunu. E aisiy dudumyqai.”

<sup>12</sup> Onaqa Yesus aqa angro nañgi aqa anjam di quisibqa minjeb, “O Tamko Koba, a ñeiejunu degam aqa ma saiqas.”

<sup>13</sup> Nañgi Lasarus a bole ñeiejunu edegeb. Di sai. A bole moiyej. Yesus a Lasarus aqa moiyo sigitosiqa ñeio qa marej.

<sup>14</sup> Deqa a na ubtosiq minjrej, “Lasarus a bole moiyej.

<sup>15</sup> Niñgi ijo singila unsib e qa nuñgo areqalo singilatqajqa deqa e aqaq aiyosaisonam a moiyej. E niñgi qa are qalsim kumbra degyem. E ijo kumbra deqa areboleboleibeqnu. Niñgi tigelab iga Lasarus aqaq aiqom.”

<sup>16</sup> Onaqa Tomas aqa ñiam bei Didimus a na Yesus aqa angro qudei nañgi minjrej, “Uñgum. Iga kalil aisim Yesus a koba na moiqom.”

*Yesus a marej, “E segi subq na tigelo qa utru”*

<sup>17</sup> Onaqa Yesus aqa angro nañgi koba na aisib Betani qure jojomysib anjam endegsib queb, “Lasarus a nami moiyej subq ateb. Bati qolqe koboqo.”

<sup>18</sup> Betani qure di Jerusalem jojom. Kilomita qalub.

**19** Deqa Juda tamo uñgasari gargekoba nañgi Betani qureq bosib Marta Maria wo nañgo jaja moiyej deqa are latetnjqajqa koroosib soqneb.

**20** Onaqa Marta a anjam endegsi quej, “Yesus a beqnu.” A degsi quisiqa walwelosiqa gamq di Yesus turqajqa gilej. Maria a talq di awesoqnej.

**21** Marta a gilsiq gamq di Yesus turosiq minjej, “O Tamo Koba, ni nami endi so qamu ijo jaja a moiyyosai qamu.

**22** E qalieonum, ni ingi kiye qa Qotei pailyqam a ni emqas.”

**23** Onaqa Yesus na Marta minjej, “Ino jaja a olo subq na tigelqas.”

**24** Onaqa Marta na kamba minjej, “E qalie, diño bati qa tamo uñgasari kalil nañgi subq na tigelabqa ijo jaja dego ombla tigelqab.”

**25** Onaqa Yesus na minjej, “E segi subq na tigelo qa utru. E segi ñambile sqajqa utru. Tamo a e qa aqa areqalo siñgilatosim moiqas di uñgum. A ñambile sqas.

**26** Tamo kalil ñambile sosib e qa nañgo areqalo siñgilateqnub qaji nañgi olo bunu moiqasai. O Marta, ni ijo anjam di quisim ino areqaloq di siñgilatonum e?”

**27** Onaqa Marta na Yesus minjej, “Od, Tamo Koba. E qalieonum, ni Kristus, Qotei aqa Ñiri. Ni qujai Qotei na qariñmonaqa mandamq aiyem qaji. Deqa e ni qa ijo areqalo siñgilatonum.”

### *Yesus a Lasarus qa are ugeiyonaqa akamej*

**28** Marta a anjam degsi marsiqa olo puluosi aisiq aqa jaja Maria metonaq aqa areq bonaq ombla

sasalosibqa minjej, “Qalie Tamo Koba a bqo. A ni qa marqo.”

<sup>29</sup> Onaqa Maria a Marta aqa anjam di qusiqatigeloqujatosiq Yesus unqa gilej.

<sup>30</sup> Yesus a qure miliq aiyosaisoqnej. A Marta wo anjam mareb qaji sawaq di soqnej.

<sup>31</sup> Sonaqa Juda tamo ungasari talq di Maria are latetiqneb qaji naŋgi Maria a tigeloqujatosiq tal uratosiq gileqnaqa unsib are qaleb, “A Lasarus aqa subq di akamtqajqa gileqnu kiyo.” Naŋgi degsib are qalsib tigelosib Maria dauryosib gileb.

<sup>32</sup> Maria a gilsiq Yesus soqnej qaji sawaq di brantosiqa Yesus unsiqa aqa areq di singa pulutosiqa minjej, “O Tamo Koba, ni nami endi so qamu ijo jaja a moiyosai qamu.”

<sup>33</sup> Onaqa Yesus a Juda tamo ungasari Maria dauryosib beb qaji naŋgi Maria ombla akamoqneb di unsiqa naŋgi qa are gulbeiyonaqa nenemnjrej,

<sup>34</sup> “Niŋgi Lazarus qabia subq ateb?” Onaqa naŋgi na minjeb, “O Tamo Koba, ni bosim aqa sub une.”

<sup>35</sup> Degsi minjnabqa Yesus a dego akamej.

<sup>36</sup> A akamonaqa Juda naŋgi di unsibqa mareb, “Niŋgi uniy. Yesus a Lazarus tulaŋ qalaqalaiy-oqnej deqa akamqo.”

<sup>37</sup> Onaqa naŋgi qudei Yesus qa yomuosib mareb, “Yesus a nami tamo ɻam qandimo boletej. A kiyaqa Lazarus boletosai? Yim a moiqasai.”

### *Yesus a Lazarus subq na tigeltej*

<sup>38</sup> Onaqa Yesus a naŋgo yomu anjam di qusiqatigeloqujatosiq Lazarus aqa subq

gilej. Sub di mana miliq di bogeb. Lasarus nami subq atsib menij kobaquja na sub me getenteb.

<sup>39</sup> Deqa Yesus na tamo qudei minjrej, “Ninji menij kobaquja di taqal atiy.” Onaqa tamo moiyej qaji aqa jaja Marta na Yesus minjej, “O Tamo Koba, a nami moiyej bati qolqe gilqo. Iga menij taqal atqom di aqa qusa quleqwas.”

<sup>40</sup> Onaqa Yesus na kamba minjej, “E nami mermonum, ni e qa ino areqalo singilatqam di ni Qotei aqa siŋgila unqam.”

<sup>41</sup> Degsi minjnaqa naŋgi menij kobaquja di taqal atnabqa Yesus a laŋ goge tarosiqa Qotei endegsi pailyej, “O Abu, ni ijo pail endi quonum deqa e ni qa tulan areboleboleibqo.

<sup>42</sup> E qalieonum, ni gaigai ijo pail queqnum. Ariya tamo ungasari ijo areq endi tigelejunub qaji naŋgi e qa naŋgo areqalo singilatqajqa deqa e ni pailmonum. Yim naŋgi qalieqab, ni na e qarinŋbonam bem.”

<sup>43</sup> Yesus a degsi Qotei pailyosiq koboonaqa a tulan maosiq marej, “O Lasarus, ni subq dena tigelosim au.”

<sup>44</sup> Degsi marnaqa tamo moiyej qaji a subq dena tigelosiq oqedej. Aqa siŋga ti baŋ ti ulatamu ti nami gara na dalaeb. Deqa Yesus na minjrej, “Aqa gara di pamblonyib walwelosim gilem.”

*Juda tamo kokba naŋgi koroosib Yesus qalib moiqajqa maroqneb*

<sup>45</sup> Bati deqa Juda tamo ungasari Maria aqa are latetqa beb qaji naŋgi Yesus aqa manwa di unsibqa naŋgi gargekoba Yesus qa naŋgo areqalo singilateb.

**46** Ariya nañgi qudei tigelosib Farisi nañgoq gilsib kumbra Yesus yej qaji deqa sainjreb.

**47** Sainjrnab quisibqa atra tamo kokba ti Juda tamo kokba ti metnjrnab nañgo areq bosib koba na koroosib mareb, “Iga kiyerqom? Yesus a manwa gargekoba yelenjeqnu.

**48** Iga a uratonam degsi kumbra yoqnqas di tamo ungasari kalil nañgi a qa nañgo areqalo singilatqab. Yim Rom nañgi bosib gago atra tal niñaqyosib iga dego kobotgwab.”

**49** Wausau deqa tamo bei aqa ñam Kaiafas a Juda nañgo atra tamo gate soqnej. Deqa a nañgo ambleq di tigelosiqa minjrej, “Niñgi tulan nanaronub. Anjam laña laña mareqnub.

**50** Niñgi are qaliy. Tamo qujai a tamo ungasari kalil nañgi qa moiqas di kere. Amqa iga padalqasai.”

**51** Kaiafas aqa segi areqalo na anjam di marossai. A wausau deqa atra tamo gate soqnej deqa a Qotei aqa medabu osiqa anjam di marej. Yesus a Juda nañgi qa moiqas anjam di ubtosiq marej.

**52** Bole, Yesus a Juda nañgi segi qa moiqasai. Qotei aqa angro kalil sawa bei beiq di unub qaji nañgi qa ti moiqas. Moisim nañgi kalil koroinjrimqa nañgi aqa segi tamo ungasari sqab. Kaiafas a anjam di ubtosiq marej.

**53** Bati qujai deqa Juda tamo kokba nañgi Yesus qalib moiqajqa anjam gereiyqa utru ateb.

**54** Yesus a di qalieosiq deqa a Juda nañgo ambleq di walwelosaioqnej. A segitosiqa qure kiñala bei wadau sawa jojom deq gilsicha aqa angro nañgi koba na dia soqneb. Qure di aqa ñam Efraim.

**55** Qotei a nami Israel nañgi Isip sawaq di padalqa laqnabqa nañgi elenjej. Deqa olo are qalqajqa yori bati jojomej. Yori bati jojomonaqqa Juda tulan gargekoba nañgo qure qureq dena tigelosib yori bati di unqajqa deqa Jerusalem beb. Juda nañgo kumbra agiende. Yori bati di brantosaisoqnimqa nañgi Jerusalem bosib nañgo segi jejamu yansosib yori bati qa tarinqab. Utru deqa nañgi Jerusalem beb.

**56** Ariya nañgi Jerusalem bosib Yesus qa ñamoqneb. Ñamoqnsib atra tal miliq bosib segi maroqneb, “Ningi kiyersib are qalonub? Yesus a yori bati unqajqa Jerusalem bgas bkas kiyosai kiyosai?”

**57** Nañgi degsib maroqneb. Di kiyaqa? Atra tamo kokba ti Farisi ti nañgi na tamo ungasari nañgi nami endegsib minjreb, “Tamo bei a Yesus qabi soqnimqa unsim bosim iga mergim iga na ojgom.”

## 12

*Maria a goreñ quleq tulan boledamu Yesus aqa sinjgaq di bilentej*

**1** Ariya Juda nañgo yori bati koba jojomej. Bati 6 amqa brantqas. Deqa Yesus a tigelosiqa Betani qureq gilej. Qure di Lasarus agi Yesus na subq na tigeltej qaji aqa qure utru.

**2** Gilnaqa qure deqaji tamo ungasari nañgi a unsibqa areboleboleinjrnaqa ingi goiyeteb. Marta a ingi suweiyosiq Lasarus Yesus wo tamo qudei ti metnjrnaq bosib koba na awoosib ingi uyoqneb.

<sup>3</sup> Onaqa Maria a goreñ quleq tulan̄ boledamu silali kobaquja na awaiyej qaji di jalin̄aq jigsiga osi bosiqa Yesus aqa sin̄gaq di bilentosiqa aqa segi gate bañga na piyetej. Onaqa goreñ aqa quleq na tal keretej.

<sup>4</sup> Onaqa Yesus aqa aŋgro bei Judas Iskariot agi bunuqna Yesus osiq jeu tamo naŋgo baŋq di atej qaji a Maria aqa kumbra di unsiqa ɻirin̄osiq marej,

<sup>5</sup> “A kiyaqa goreñ di qarinyosiq meniŋ silali 300 osiq dena tamo iŋgi iŋgi saiqoji naŋgi aqaryainjrosai?”

<sup>6</sup> Judas a tamo iŋgi iŋgi saiqoji naŋgi qa are qalsiq anjam di marosai. A bajin̄ tamo. A Yesus aqa aŋgro naŋgo silali jugwajqa quŋ taqatoqnej. Deqa naŋgi quŋ miligiq di silali ateqnab a na olo bajin̄oqnej. A deqa are qalsiq anjam di marej.

<sup>7</sup> Onaqa Yesus a Judas aqa anjam di quisiga minjej, “Uŋa di urat. A goreñ di ojesoqnem. A ijo jejāmu subq atqajqa are qalsiq nami gereiyqo.

<sup>8</sup> Tamo iŋgi iŋgi saiqoji naŋgi bati gaigai niŋgi ti sqab. Ariya e bati gaigai niŋgi ti sqasai.”

### *Atra tamo kokba naŋgi Lazarus qalsib moirotqa maroqneb*

<sup>9</sup> Juda tulan̄ gargekoba naŋgi qalieeb, Yesus a Betani qureq gilsiq di soqnej. Deqa naŋgi a unqa beleñeb. Naŋgi Yesus segi unqajqa bosai. Yesus a nami Lazarus subq na tigeltej deqa naŋgi a dego unqa beb.

<sup>10</sup> Atra tamo kokba naŋgi Lazarus dego qalsib moirotqa qairoqneb.

<sup>11</sup> Di kiyaqa? Yesus a Lazarus subq na tigeltonaqa Juda gargekoba naŋgi atra tamo kokba

naŋgi uratnjsib olo Yesus qa naŋgo areqalo singilatoqneb.

### *Mandor Koba Yesus a Jerusalem bej*

**12** Tamo uŋgasari tulaŋ gargekoba naŋgi yori bati unqajqa marsib Jerusalem beleñeb. Belenosib nebeonaqa naŋgi endegsib queb, “Yesus a Jerusalem bqas.”

**13** Naŋgi degsib quisib deqa naŋgi tuwom baŋga eleñosib Yesus gamq di turqajqa aiyeb. Aisib Yesus beqnaqa unsib tulaŋ lelenjoqnsib endegsib minjoqneb, “Iga ni qa tulaŋ areboleboleigeqnu. Ni Tamo Koba aqa ñam na bonum deqa a ni tulaŋ geregereimeqnu. Ni Israel naŋgo Mandor Koba.”

**14** Onaqa Yesus a donki osiqa quraq di awoej. Aqa kumbra deqa nami Qotei aqa anjam bei endegsib neŋgreŋyeb unu,

**15** “O Saion tamo uŋgasari, ninji ulaaib. Ninji uniy. Nunjo Mandor Koba a donki bunuj quraq di awoosiq beqnu.”

**16** Bati deqa Yesus aqa aŋgro naŋgi anjam di aqa utru poinjrosai. Bunuqna Yesus a moisiq ñam koba onaqa naŋgi anjam deqa olo are qalsib endegsib mareb, “Bole, anjam di Yesus qa neŋgreŋyeb deqa tamo uŋgasari naŋgi lelenjoqnsib a biŋijoqneb.”

**17** Ariya tamo uŋgasari Yesus a Lasarus metosiq subq na tigeltonaq uneb qaji naŋgi maŋwa deqa saoqnsib laqneb.

**18** Laqnab tamo uŋgasari tulaŋ gargekoba naŋgi quoqneb. Deqa Yesus a donki bunuj quraq di awoosiq Jerusalem beqnaqa naŋgi a gamq di turqajqa aiyelenjeb.

**19** Ainabqa Farisi naŋgi na unjrsibqa segi segi maroqneb, “Iga Yesus singila na saidyeqnamqa keresaiigeqnu. Niŋgi uniy. Tamo uŋgasari kalil naŋgi a dauryeqnub.”

*Grik tamo qudei naŋgi Filip minjeb, “Iga Yesus unqom”*

**20** Tamo uŋgasari Qotei louqa marsib yori bati unqajqa Jerusalem aiyeleñeb qaji naŋgo ambleq di Grik tamo qudei soqneb.

**21** Grik tamo naŋgi di Filip aqaq di branteb. Di kiyaqa? Filip a degó Grik tamo. Filip aqa qure utru Betsaida. Qure di Galili sawaq di unu. Naŋgi Filip aqaq di brantosib nenemyeb, “O gago was, iga Yesus unqa kere e?”

**22** Onaqa Filip a aisiqa naŋgo anjam di Andru minjsiqa Andru ombla gilsib olo Yesus minjeb.

**23** Minjnab quisqa naŋgi kamba minjrej, “E Tamo Angro. Deqa e ñam koba oqajqa bati bran-tqo.

**24** E bole mern̄gwai. Kurgus yago breiyibqa mandamq aisiq moiqasai di a laŋa sqas. Moiqas di a olo qoqi oqsim gei gargekoba atelenqas.

**25** Dego kere tamo bei na aqa segi ñambile tulan̄ qalaqalaiyqas di a padalqas. Ariya a mandamq endi aqa segi ñambile qoreiyqas di a ñambile gaigai sqas.

**26** Tamo bei na e wauetbqa osimqa a e daurbem. Yimqa qure e sqai di a degó e ombla sqom. A ijo wau yoqnqas di ijo Abu na a ñam kobaquja yqas.”

*Jeu tamo naŋgi na Yesus soqtosib goge gaintqab*

**27** Osiqa Yesus a olo anjam endegsi marej, “Endegeo e are tulan̄ gulbekobaibqo. Deqa e endegsi

Qotei pailyqai kiyo, ‘O ijo Abu, ni na marimqa bati uge endi ijoq baiq?’ Uñgum, e degsi pailyqasai. Bati uge endi branteme. E deqa mandamq aiyem.

<sup>28</sup> O ijo Abu, ni na ino ñiam tulaj kobaqujatime.” Yesus a degsi marnaqa lañ goge dena anjam endegsi brantej, “E ijo ñiam kobaqujatonum. Ololo kobaqujatqai.”

<sup>29</sup> Anjam degsi brantonaqa tamo uñgasari Yesus aqa areq di tigelesoqneb qaji nañgi quisibqa segi segi maroqneb, “Kola anjam atqo kiyo?” Onaqa tamo qudei nañgi mareb, “Sai. Lañ aŋgro bei na Yesus anjam minjqa.”

<sup>30</sup> Onaqa Yesus na kamba minjrej, “Anjam ningi quonub qaji di e aqaryaibqajqa brantosai. Di ningi aqaryaaingwajqa brantqo.

<sup>31</sup> Niñgi quiy. Qotei na tamo uñgasari mandamq endi unub qaji nañgi peginjrqajqa bati bqo. A na mandam endeqa gate koba Satan taqal waiyqajqa bati dego bqo.

<sup>32</sup> E bini mandamq endi unum. Ariya bunuqna jeu tamo nañgi na e soqtbosib goge gaintbqab. Yimqa bati deqa e na tamo uñgasari kalil nañgi are tigeltetnjritqa ijoq bqab.”

<sup>33</sup> Yesus a aqa segi moiqajqa gam boleq atqa osiqa deqa degsi marej.

<sup>34</sup> Onaqa tamo uñgasari nañgi na kamba Yesus minjeb, “Kristus a bati gaigai sqas. Dal anjam nami degsib marnab iga quem. Deqa ni kiyaqa maronum, ‘E Tamо Aŋgro soqtbosib goge gaintbqab?’ Tamо Aŋgro di tamo yai?”

<sup>35</sup> Onaqa Yesus na minjrej, “Puloŋ a nuŋgo ambleq di sokiñalayosim niñgi olo uratŋgwas. Deqa

niŋgi puloŋ ti sosib puloŋq na laqniy. Yimqa niŋgi ambruinqwasai. Tamo ambruq na laqnu qaji a qabiteqnu kiyo di a qaliegqasai.

**36** Niŋgi puloŋ ti sosib puloŋ qa nuŋgo areqalo siŋgilatiy. Niŋgi degyqab di niŋgi puloŋ aqa angro sqab.”

*Juda tamo gargekoba naŋgi Yesus qa naŋgo are-qalo siŋgilatosai*

Yesus na tamo uŋgasari naŋgi anjam degsi min-jrsiqa naŋgi uratnırnaq naŋgi a olo unosai.

**37** A Qotei aqa maŋwa gargekoba naŋgo ɻamdamuq di yeqnaqa naŋgi unoqneb. Unoqnsib ariya naŋgi Yesus qa naŋgo areqalo siŋgilatosaiqneb.

**38** Naŋgi kumbra di yeb deqa anjam bei Qotei aqa medabu o tamo Aisaia a nami marej qaji di aqa damu brantej. A endegsi marej, “O Tamo Koba, tamo yai a gago anjam endi quasiqa aqa areqaloq di siŋgilatqo? Tamo yai a Tamo Koba aqa singila unsiq poiyyo? Tamo dego bei sosai.” Aisaia a nami anjam degsi marej.

**39** Deqa naŋgi Yesus qa naŋgo areqalo siŋgilatqa keresai. Utru deqa Aisaia a anjam bei dego endegsi neŋgreŋyej,

**40** “Qotei a naŋgo ɻamdamu getentetnjrej. A naŋgo are miligi dego getentetnjrej. Deqa naŋgi naŋgo ɻamdamu na Qotei aqa kumbra bei unqa keresai. Naŋgi naŋgo are miliqq na Qotei aqa anjam dego poinjrqa keresai. Deqa naŋgi are bulyosib ijoq bqa keresai. Deqa e na naŋgi bolet-njrqasai.”

**41** Aisaia a nami Yesus aqa siŋgila unsiq deqa anjam degsi marej.

**42** Bole, Juda gate gargekoba naŋgi are bulyosib Yesus qa naŋgo areqalo siŋgilateb. Ariya naŋgi Farisi naŋgi ulainjrsib deqa naŋgi boleq di Yesus aqa ñam marosaioqneb. Naŋgi are qaleb, “Iga boleq di Yesus aqa ñam marqom di Farisi naŋgi iga Qotei tal miliq qilqa saidgwab.”

**43** Naŋgi degsib are qaleb. Di kiyaqa? Naŋgi Qotei na naŋgo ñam soqtqajqa arearetnjrosaioqnej. Tamo naŋgi na naŋgo ñam soqtqajqa deqa arearetnjroqnej.

*Yesus aqa anjam a tamo sigitosim tamo uŋgasari naŋgi peginjrqas*

**44** Onaqa Yesus a tulan leleñosiq marej, “Tamo bei a e qa aqa areqalo siŋgilatqas di a e qa segi aqa areqalo siŋgilatqasai. Ijo Abu e qarinbej qaji a qa dego aqa areqalo siŋgilatqas.

**45** Tamo bei a e nubqas di a ijo Abu e qarinbej qaji di dego unqas.

**46** E puloŋ bulosim mandamq aiyem. Deqa tamo uŋgasari kalil e qa naŋgo areqalo siŋgilateqnub qaji naŋgi ambruq di sqasai.

**47** Tamo bei a ijo anjam qusimqa ariya a dauryqasai di e na a pegiyqasai. E tamo uŋgasari naŋgi peginjrqa bosai. E naŋgi eleŋqajqa bem.

**48** Tamo uŋgasari naŋgi e qoreibosib ijo anjam quqwa uratqab di naŋgi peginjrqajqa tamo bei unu. Anjam e mareqnum qaji a segi tamo sigitosim tamo uŋgasari naŋgi peginjrqas. Diŋo batiamqa anjam dena naŋgi peginjrqas.

**49** E ijo segi areqalo na anjam marosaieqnum. Ijo Abu e qariñbej qaji a na anjam merbeqnaqa quoqnsim agi mareqnum.

**50** E qalieonum, ijo Abu aqa anjam di ɻambile gaigai sqajqa anjam. Deqa anjam kalil e mareqnum qaji di ijo Abu na e merbeqnaq quoqnsim agi mareqnum.”

## 13

### *Yesus na aqa an̄gro nañgo siñga yansetnjrej*

**1** Juda nañgo yori bati koba jojomonaqa Yesus a endegsi qalieej, “E mandamq endi so bati koboqo. E moisiy ijo Abu aqaq olo oqwa bati brantqo.” Yesus na aqa segi an̄gro mandamq di soqneb qaji nañgi tulan qalaqalainjroqnsiq gilsı gilsiq aqa moiqa bati itej.

**2** Deqa a nañgi koba na awoosib in̄gi uyoqneb. Di bilaq. In̄gi uyeqnabqa Satan a Judas Iskariot aqaq aiyej. Aisiqa Judas na Yesus osim jeu tamo nañgo banq di atqajqa deqa are tigeltetej. Judas a Saimon Iskariot aqa njiri.

**3** Yesus a qalieej, aqa Abu na in̄gi in̄gi kalil aqa banq di atelennej. A Qotei aqaq na bej puluosim Qotei aqaq olo oqwas di dego qalieej.

**4** Deqa a aqa an̄gro nañgi koba na in̄gi uyoqnsibqa a tigelosiqa aqa gara olekoba piqtosiq jejamu piyo qaji gara osiqa tigej.

**5** Tigsiqqa kañgal tamo bulosiqa tabirq di ya qamsiq aqa an̄gro nañgo siñga yansetnjroqnsiq jejamu piyo qaji gara dena piyetnjroqnej.

**6** Osiqa Pita aqa siñga yansetqa laqnaqa minjej, “O Tamo Koba, ni ijo siñga yansetbqam e?”

<sup>7</sup> Onaqa Yesus na kamba minjej, “Kumbra e endego yeqnum endi ni utru poimosai unu. Bunuqna ni poimqas.”

<sup>8</sup> Onaqa Pita na Yesus saidyosiq minjej, “Ni ijo siŋga yansqasai. Sai bole sai.” Onaqa Yesus na minjej, “E ni yansmqaſai di ni e ombla sqa keresai.”

<sup>9</sup> Onaqa Saimon Pita na minjej, “O Tamo Koba, ni ijo siŋga segi yansaim. Ijo baŋ ti gate ti dego yansetbe.”

<sup>10</sup> Onaqa Yesus na minjej, “Tamo a yalqo a olo yalqasai. Aqa siŋga segi yansqas di kere. Dena a torei milalo sqas. Niŋgi milalo unub. Ariya niŋgi kalil milalo sosai.”

<sup>11</sup> Yesus a qalieej, aqa aŋgro bei agi Judas a na Yesus osim jeu tamo naŋgo baŋq di atqas. Deqa a na minjrej, “Niŋgi kalil milalo sosai.”

<sup>12</sup> Yesus a naŋgo siŋga yansetnjsiq koboonaqa aqa segi gara olekoba olo jigsiq awoosiq nenemnjrej, “Kumbra e endego niŋgi eŋgonum qaji di niŋgi utru poiŋgwo e?”

<sup>13</sup> Niŋgi e merbeqnub, ‘O Qalie Tamo Koba. O gago Tamo Koba.’ Niŋgi kere e merbeqnub. Agi e segi qujai.

<sup>14</sup> E nuŋgo Tamo Koba. E nuŋgo Qalie Tamo Koba dego. Ariya e nuŋgo siŋga yansetŋgonum deqa niŋgi dego segi segi qa kumbra degyoqniy.

<sup>15</sup> Kumbra e endego niŋgi osorŋgonum qaji di niŋgi kamba dego degsib yoqniy.

<sup>16</sup> E bole merŋgwai. Kaŋgal tamo na aqa tamo koba bunyqa keresai. Tamo a wau qa gilqas di a na tamo a qarinyqo qaji di bunyqa keresai.

<sup>17</sup> Kumbra e yeqnum endi aqa utru

nin̄gi poingim dauryiy. Yimqa nin̄gi tulan̄ arebolebolein̄gwas.

<sup>18</sup> “Ijo anjam endi e nin̄gi kalil qa marosai. E na nin̄gi giltn̄gem deqa e nin̄gi qa qalie bole. Ariya Qotei aqa anjam bei nengren̄q di unu qaji di aqa damu brantqas. Anjam agiende, ‘Tamo e ombla bem quiq di tuqtosim uyqas qaji a na e jeutbqas.’

<sup>19</sup> Kumbra di brantosaisonqa e nami mer̄gonum. Deqa kumbra di brantimqa nin̄gi e qa nun̄go areqalo singilatosib marqab, ‘Bole, Yesus a segi qujai gaigai degsi unu.’

<sup>20</sup> E bole mer̄gwai. Tamo bei na tamo ungasari e qarijn̄nronum qaji nañgi osim geregereinjrqas di a e dego osim gereibqas. A e osim gereibqas di a na ijo Abu e qariñbej qaji a dego osim gereiyqas.”

*Judas a Yesus osim jeu tamo nañgo ban̄q di atqas*

<sup>21</sup> Yesus a degsi marsiqা are tulan̄ gulbekobaiyonaqa olo marej, “E bole mer̄gwai. Ijo an̄gro bei na e osim jeu tamo nañgo ban̄q di atqas.”

<sup>22</sup> Onaqa Yesus aqa an̄gro nañgi segi segi kokooqneb. Yesus a an̄gro yai qa degsi marej di nañgi qaliesai deqa nañgi degyoqneb.

<sup>23</sup> Yesus aqa an̄gro bei agi Yesus na tulan̄ qalaqlaiyoqnej qaji a Yesus aqa areq di awesoqnej.

<sup>24</sup> Deqa Saimon Pita a ban̄ na an̄gro di minjej, “Ni na Yesus nenemyimqa a an̄gro yai qa degsi marqo di mermqas.”

<sup>25</sup> Onaqa an̄gro dena Yesus beteryosiqa nenemyej, “Ó Tam̄o Koba, ni an̄gro yai qa degsi maronum?”

**26** Onaqa Yesus na minjej, “Anjro e endego bem osiy quiq di tuqtosiy anaiyqai qaji a na e osim jeu tamo naŋgo baŋq di atqas.” Degsi minjsiqa bem quiq di tuqtosiq Saimon Iskariot aqa ɻiri Judas anaiyej.

**27** Anaiyonaq Satan a Judas aqa are miligiq ainaqa Yesus na minjej, “Ni kumbra yqam qaji di endego yoqujat.”

**28** Yesus a Judas degsi minjnaqa aqa aŋgro kalil awesoqneb qaji naŋgi quisibqa Yesus na Judas kiyaqa anjam di minjej naŋgi deqa poinjrosai.

**29** Judas a naŋgo silali jugwajqa quŋ taqatoqnej deqa naŋgi qudei are qaleb, Judas a gilsim yori bati aqa iŋgi iŋgi awaiyqajqa deqa kiyo Yesus na degsi minjej. Naŋgi qudei are qaleb, Judas a gilsim iŋgi awaiyosim tamo sougetejunub qaji naŋgi anainjrqas.

**30** Onaqa Judas a bem di uysiqa warum uratosiq oqedej. Di qolo.

### *Yesus na aqa aŋgro naŋgi dal anjam bunuj enjrej*

**31** Judas a oqedonaqa Yesus a endegsi marej, “Bini e Tamo Anjro ñam koba oqai. E ñam koba otqa Qotei a dego ñam koba oqas.

**32** Qotei a ñam koba osimqa a na e dego ñam koba ebqas. A urur ñam koba ebqas.

**33** O ijo aŋgro niŋgi quiy. E niŋgi koba na sokiñalayosiy uratŋgitqa niŋgi e qa ɻamoqnqab. Qure e oqwai di niŋgi oqwa keresai. E nami Juda tamo kokba naŋgi degsi minjroqnam agi bini niŋgi dego olo merŋgonum.

**34** Endego e dal anjam bunuj engwai. Dal anjam bunuj agiende. Niŋgi segi segi qa qalaqlaiyo

kumbra yoqniy. E niŋgi qalaqalaingeqnum dego kere niŋgi kamba dego segi segi qa qalaqalaiyo kumbra yoqniy.

<sup>35</sup> Niŋgi segi segi qa qalaqalaiyo kumbra yoqnibqa tamo kalil naŋgi nunjo kumbra di unoqnsib dena qalieoqnqab, niŋgi ijo angro bole.”

*Yesus na Pita minjej, “Ni maroqalubtqam, ‘E Yesus qaliesai’ ”*

<sup>36</sup> Onaqa Saimon Pita na Yesus nenemyej, “O Tamo Koba, ni qabitqam?” Onaqa Yesus na minjej, “Qure e oqwai di ni mati oqwa keresai. Bunuqna ni e daurbosim qure deq oqwam.”

<sup>37</sup> Onaqa Pita na olo Yesus nenemyej, “O Tamo Koba, kiyaqa e bini ni daurmqa keresai? Ni marimqa e ni qa ijo ɻambile uratosiy moiqai.”

<sup>38</sup> Onaqa Yesus na kamba minjej, “Ni e qa ino ɻambile uratosim moiqam e? E bole mermqai. Tuwe anjamosaisoqnimqa ni maroqalubtqam, ‘E Yesus qaliesai.’ ”

## 14

*Iga Qotei aqaq oqwaqqa gam agi Yesus a segi qujai*

<sup>1</sup> Osiqa Yesus a olo marej, “Niŋgi are gulbeŋgaiq. Niŋgi Qotei qa nunjo areqalo singilateqnub ariya niŋgi e qa dego nunjo areqalo singilateqnub.

<sup>2</sup> Ijo Abu aqa talq di warum gargekoba unub. E oqsiy nunjo segi segi warum gereiyetŋgawai. Ijo anjam di bolesai qamu e niŋgi merŋgosai qamu.

<sup>3</sup> E nunjo segi segi warum gereiyetŋgsiy olo bosiy niŋgi joqsiy qure e sqai di niŋgi dego e ombla sqab.

**4** Qure e sqai deq oqwaqqa gam di ningi qalie.”

**5** Onaqa Tomas na Yesus minjej, “O Tamo Koba, qure ni oqwam di iga qaliesai. Deqa iga kiyersim qure deq oqwaqqa gam qalieqom?”

**6** Onaqa Yesus na minjej, “E segi gam. E segi anjam bole qa utru. E segi ɿambile qa utru dego. Tamo bei a gam bei na ijo Abu aqaq oqwa kerasai. Ijo Abu aqaq oqwaqqa gam agi e segi qujai.

**7** Ningi e qa qalieonub qamu ningi ijo Abu qa dego qalieonub qamu. Agi endego ningi ijo Abu qa qalieqa utru atonub. Osib ningi a unonub.”

**8** Onaqa Filip na Yesus minjej, “O Tamo Koba, ni na ino Abu osorgimqa di iga qa kereqas.”

**9** Onaqa Yesus na minjej, “O Filip, e bati olekoba ningi koba na soqnem. Ni e qa qalieosai unum e? Tamo a e nubqo di a ijo Abu dego unqo. Deqa ni kiyaqa e merbonum, ‘Ni na ino Abu iga osorge’?

**10** E ijo Abu beteryesonam a e dego beterbejunu di ni poimosai kiyo? Anjam e na ningi merngeqnum qaji endi ijo segi areqalo na merngosai. Ijo Abu na e beterbesosiqa aqa wau ojeqnu.

**11** E ijo Abu beteryesonam a e dego beterbejunu. Ningi ijo anjam di qusib e qa nuŋgo areqalo singilatiy. Saiamqa wau kalil e nuŋgo ɿamdamuq di yeqnum qaji di ningi unsib e qa nuŋgo areqalo singilatiy.

**12** “E bole merngwai. Tamo bei a e qa aqa areqalo singilatqas di wau kalil e yeqnum qaji a dego yoqnqas. Osim ijo wau di bunyosim wau tulaŋ kokba yoqnqas. Di kiyaqa? E ijo Abu aqaq olo oqwai deqa.

**13** E Qotei aqa Niri unum deqa niŋgi ijo ñam na ingi bei qa Qotei pailyqab di e na ingi di eŋgwai. Yim dena ijo Abu a ñam koba oqas.

**14** Niŋgi ijo ñam na ingi bei qa Qotei pailyqab di e na ingi di eŋgwai.”

*Yesus a aqa Abu minjim a na aqa Mondor Bole qariŋyqas*

**15** Osiqa Yesus a olo marej, “Niŋgi e qalaqalaibqab di niŋgi ijo anjam dauryoqnqab.

**16** Amqa e ijo Abu minjitqa a na Aqaryaingo Tamo qariŋyim nuŋgoq bosim singilatŋwas. Osim a batı gaigai niŋgi koba na sqas.

**17** Aqaryaingo Tamo di a anjam bole qa Mondor. Tamo uŋgasari mandamq endi unub qaji naŋgi Mondor di oqa kerasai. Naŋgi a unosaieqnub. Naŋgi a qa qaliesai dego. Ariya niŋgi a qa qalie. A niŋgi koba na unub. Bunuqna a bosim nuŋgo are miliqiq di sqas.

**18** “E niŋgi mandum aŋgro bul uratŋwasai. E nuŋgoq olo bqai.

**19** Sokiňala tamo uŋgasari mandamq endi unub qaji naŋgi e olo nubqasai. Ariya niŋgi e nubqab. E ɿambile unum deqa niŋgi dego ɿambile sqab.

**20** Sosibqa batı deqa niŋgi endegsib qaliegqab, e na ijo Abu beteryesonam niŋgi kamba e beterbesonab e niŋgi beterŋgejunum.

**21** Niŋgi quiy. Tamo bei na e qalaqalaibqas di a ijo dal anjam dego qusim dauryoqnqas. Yim ijo Abu na kamba tamo di qalaqalaiyqas. E na dego tamo di qalaqalaiyoqnsiy aqaq di brantoqnsiyqa e segi qa babtoqnqai.”

<sup>22</sup> Onaqa Judas bei Judas Iskariot sai a na Yesus endegsi nenemyej, “O Tamo Koba, kiyaqa ni tamo ungasari kalil mandamq endi unub qaji nañgoq di brantqa saidosim gago segiq di brantoqnsim ni segi qa babtoqnqam?”

<sup>23</sup> Onaqa Yesus na minjej, “Tamo bei na e qalaqalaibqas di a ijo anjam dauryoqnqas. Yim ijo Abu na kamba tamo di qalaqalaiyimqa aqo ijo Abu wo aqaq bosim a ombla gaigai sqom.

<sup>24</sup> Tamo bei a e qalaqalaibqasai di a ijo anjam dauryqasai. Anjam e na niñgi merñgeqnum qaji endi ijo anjam sai. Anjam endi ijo Abu e qarinbej qaji aqa anjam.

<sup>25</sup> “Anjam endi e niñgi koba na sosim merñgeqnum.

<sup>26</sup> Bunuqna Aqaryaingo Tamo a nuñgoq bosim singilatñgwas. A Mondor Bole. Ijo Abu na a qarinym ijo ñam na bosim anjam kalil niñgi merñgekritqas. Osim nuñgo areqalo tigelteñgimqa anjam kalil e niñgi merñgeqnum qaji deqa olo are qaloqnqab.

<sup>27</sup> “E niñgi uratñgwa osiy nuñgo are latetñgwai. E segi are lawo unum deqa e nuñgo are latetñgwai. Mandam tamo bei na degsim nuñgo are latetñgwa keresai. Deqa niñgi are gulbeingaiq. Osib ulaaib.

<sup>28</sup> E niñgi endegsim merngonum quonub, ‘E niñgi uratñgsiy olo nuñgoq bqai.’ Niñgi e qalaqalaibonub qamu niñgi ijo anjam deqa areboleboleingwo qamu. Di kiyaqa? E ijo Abu aqaq olo oqwai deqa. Ijo Abu agi a na e tulan buñbejunu.

<sup>29</sup> E ijo Abu aqaq oqosaisosim anjam endi merñgonum. Deqa bunuqna e ijo Abu aqaq oqitqa

nin̄gi e qa nuñgo areqalo torei siñgilatqab.

**30** “Mandam endeqa gate koba Satan a beqnu. A na e gulbe bei ebqa keresai. Deqa e olo anjam olekoba totoryosiy merñgwasai.

**31** Ijo are koba endegsi unu. Mandam qaji tamo ungasari nañgi qalieqab, e ijo Abu qalaqalaiyenqum deqa anjam a na merbeqnu qaji di e dauryeqnum. Ariya nin̄gi tigelab iga gilqom.”

## 15

### *Yesus a wain ñamtañ bole*

**1** Osiqa Yesus a olo marej, “E segi wain ñamtañ bole. Ijo Abu a wain wau qa lanja.

**2** Ijo dani qudei nañgi gei bole atqasai di ijo Abu na nañgi giñgeñjrsim taqal breinjrqas. Ijo dani nañgi gei bole ateñqab di ijo Abu na gereinjrimqa nañgi olo gei koba ateñqab.

**3** Anjam kalil e nami merñgoqnem qaji dena nin̄gi gereñgej koboej.

**4** Ningi e beterbesoqniy. Yimqa e dego nin̄gi betern̄gesqai. Ñam dani a segi sqas di a geitqa keresai. Qoboq di beteresqas di a geitqas. Dego kere nin̄gi e beterbesqasai di nin̄gi gei bole atqa keresai.

**5** “E segi wain ñamtañ bole. Ningi ijo dani bul. Tamo bei a e beterbesqas di e dego a beteryesqai. Yimqa a gei koba ateñqas. Ningi e uratbqab di nin̄gi wau bei yqa keresai.

**6** Tamo bei a e beterbesqasai di a ñam dani uge bul giñgeñyosib taqal breiyib kañgrañjamqa koroiyosib ñamyuwoq di breiyib yugwas.

**7** “Niñgi e beterbesosib ijo anjam nunqoq di soqniqma niñgi inçgi bei qa Qotei pailyqab di a na inçgi di ençgas.

**8** Niñgi gei koba atelenjosib ijo añgro bole soqniy. Yimqa ijo Abu aqa ñam tulañ kobaqas.

**9** Ijo Abu na e qalaqalabeqnu dego kere e na niñgi qalaqalaingeqnum. Deqa niñgi gaigai ijo qalaqalaiyo kumbraq di soqniy.

**10** Niñgi ijo dal anjam kalil dauryoqnqab di niñgi ijo qalaqalaiyo kumbraq di sqab. E ijo Abu aqa dal anjam dauryoqnsimqa aqa qalaqalaiyo kumbraq di unum dego kere.

**11** E segi areboleboleibeqnu deqa niñgi dego areboleboleingoqnam. Ijo arebolebole di nuñgoq di tulañ kobaoqnam. Utru deqa e na anjam endi niñgi merñgonum.

**12** Ijo dal anjam agiende. E na niñgi qalaqalaingeqnum dego kere niñgi segi segi qa qalaqalaiyo kumbra yoqniy.

**13** Qalaqalaiyo kumbra tulañ bolequja bei agiende. Tamo bei na aqa was nañgi aqaryainjrqa osimqa aqa segi ñambile uratosim moiqas. Qalaqalaiyo kumbra dena qalaqalaiyo kumbra kalil tulañ buñnjrejunu.

**14** Niñgi ijo anjam kalil e na merñgeqnum qaji endi dauryqab di niñgi ijo segi was bole sqab.

**15** Anjam kalil ijo Abu na e merbeqnaq queqnum qaji di e ubtosim niñgi merñgeqnum. Deqa e niñgi ‘was’ merñgeqnum. E niñgi ‘kanjal tamo’ merñgosiaeqnum. Kanjal tamo a aqa tamo koba aqa wau qaliesai.

**16** “Niñgi na e giltbosai. E na niñgi giltñgem.

Osim niŋgi wau eŋgem. Niŋgi gilsib gei koba atelenjoqniqbqa nungo gei gaigai sqajqa deqa e na niŋgi wau eŋgem. Deqa niŋgi ijo ñam na iŋgi bei qa ijo Abu pailyqab di a na iŋgi di eŋgas.

<sup>17</sup> E na niŋgi dal anjam endegsi merŋgwai. Niŋgi segi segi qa qalaqlalaiyo kumbra yoqniy.”

*Mandam qaji tamo uŋgasari naŋgi na  
Yesus aqa aŋgro naŋgi jeutŋreqnub*

<sup>18</sup> Osiqa Yesus a olo marej, “Mandam qaji tamo uŋgasari naŋgi na niŋgi jeutŋgeqnub. Deqa niŋgi endegsi poŋgem, naŋgi namoqna e dego jeutboqneb.

<sup>19</sup> Niŋgi mandam qaji tamo unub qamu mandam qaji tamo uŋgasari naŋgi na niŋgi qalaqlainjgeqnub qamu. Agi naŋgi na naŋgo segi was naŋgi qalaqlainjreqnub dego kere. Ariya niŋgi mandam qaji tamo sai. E na niŋgi giltŋgem deqa niŋgi mandam qaji kumbra urateb. Utru deqa mandam qaji tamo uŋgasari naŋgi na niŋgi jeutŋgeqnub.

<sup>20</sup> E nami merŋgonum, kaŋgal tamo na aqa tamo koba bunyqa keresai. Niŋgi anjam deqa are qaliy. Jeu tamo naŋgi na e ugeugeiboqneb dego kere naŋgi na niŋgi ugeugeiŋgoqnb. Naŋgi ijo anjam dauryoqneb qamu naŋgi nuŋgo anjam dego dauryeqnub qamu.

<sup>21</sup> Ariya naŋgi ijo Abu e qariŋbej qaji a qa qalisai. Deqa naŋgi niŋgi ugeugeiŋgoqnb. Di kiyaqa? Niŋgi ijo ñam ejunub deqa.

<sup>22</sup> “E bosim naŋgi anjam minjrosai qamu naŋgi une saiqoji unub qamu. Ariya e naŋgi anjam minjrem deqa naŋgi naŋgo une ultqa gam saiqoji.

<sup>23</sup> Tamo bei na e jeutbqas di a na ijo Abu dego jeutqas.

<sup>24</sup> E manjwa qudei tamo bei na nami yosaioqnej qaji di naŋgo ambleq di babtosai qamu naŋgi une saiqoji unub qamu. Ariya e naŋgo ambleq di manjwa qudei babteqnamqa naŋgi unoqnsib aqo ijo Abu wo jeutgeqnub.

<sup>25</sup> Naŋgo kumbra dena dal anjam bei neŋgreŋq di unu qaji di aqa damu brantej. Anjam agiende, ‘Tamo naŋgi e laŋa jeutbeqnub.’

<sup>26</sup> “Aqaryaingo Tamo a ijo Abu ombla unub. E na a qarinyit nuŋgoq bqas. A anjam bole qa Mondor. A ijo Abu aqaq dena bqas. Bosim ijo kumbra ti ijo wau ti ubtosim marqas.

<sup>27</sup> Niŋgi dego ijo kumbra ti ijo wau ti ubtosib marqab. Di kiyaqa? Nami e ijo wau utru atem bati deqa niŋgi e ombla sosib ijo wau unoqneb dena bosib bosib agi bini niŋgi e ombla unum.

## 16

<sup>1</sup> “Niŋgi ijo ñam uratosib uloŋaib deqa e na anjam endi merngeqnum.

<sup>2</sup> Bunuqna jeu tamo naŋgi na ningi taqal breiŋgosib niŋgi olo Qotei tal miliq gilqa saidŋgwab. Osib bati bei bamqa naŋgi na ningi moiyoŋgoqeqnqab. Osib endegsib are qaloqeqnqab, ‘Iga Qotei aqa wau ojeqnum deqa iga na naŋgi moiyoŋnjreqnum.’

<sup>3</sup> O ijo aŋgro, jeu tamo naŋgi aqo ijo Abu wo qa qaliesai deqa naŋgi niŋgi degŋgwab.

<sup>4</sup> Naŋgi ningi degŋgibqqa niŋgi ijo anjam e bini merngeqnum qaji endeqa olo are qaliy.”

*Yesus a Mondor Bole qa anjam marej*

Osiqa Yesus a olo marej, “Nami e niŋgi koba na soqnem bati deqa e na anjam endi niŋgi merŋgosaioqnom.

<sup>5</sup> Sokiňala e niŋgi uratŋgsiy ijo Abu e qarinbej qaji aqaq olo oqwai deqa bini e anjam endi niŋgi merŋgeqnum. Ariya niŋgi kamba e nenembosaieqnub, ‘Ni qabitqam?’ degbosai.

<sup>6</sup> E niŋgi anjam endi merŋgeqnum deqa niŋgi are gulbeinjeqnu.

<sup>7</sup> E bole merŋgwai. E niŋgi uratŋgsiy oqwai. E oqwasai di Aqaryaiŋgo Tamo agi Mondor Bole a nuŋgoq bqasai. Utru deqa e niŋgi uratŋgsiy oqwai. E oqsiy Mondor qarinjyitqa a nuŋgoq bqas.

<sup>8</sup> Bosimqa mandam qaji tamo uŋgasari naŋgo une babtetenjroqnim naŋgi poinjroqnnqas. Kumbra bole qa utru dego a na osornjroqnim naŋgi qalieqnnqab. Qotei a tamo uŋgasari naŋgi peginjrqas kumbra di dego naŋgi qalieqajqa deqa Mondor na naŋgi osornjroqnnqas.

<sup>9</sup> A na mandam qaji tamo uŋgasari naŋgo une babtetenjroqnnqas. Di kiyaqa? Naŋgi e qa naŋgo areqalo siŋgilatosaeieqnub deqa.

<sup>10</sup> Kumbra bole qa utru dego a na naŋgi osornjroqnnqas. Di kiyaqa? E ijo Abu aqaq oqitqa niŋgi e olo nubqasai.

<sup>11</sup> Qotei a tamo uŋgasari naŋgi peginjrqas kumbra di dego Mondor na naŋgi osornjroqnnqas. Di kiyaqa? Qotei na mandam endeqa gate koba Satan pegiyosim ɻamyuwoq waiyqas.

<sup>12</sup> “E anjam gargekoba niŋgi merŋgwajqa ijo areqaloq di unu. Bini e merŋgwasai. Di kiyaqa? Nunjo areqalo na ojqa keresai deqa.

<sup>13</sup> Ariya anjam bole qa Mondor a bosimqa nun̄go areqalo gereiyetŋimqa ningi anjam bole kalil poiŋgekritqas. Aqa segi areqalo na anjam mern̄gwasa. A anjam quoqnsim di segi ningi mern̄goqnqas. Osim kumbra mondoŋ brantelenqas qaji di dego ubtoqnsim mern̄goqnqas.

<sup>14</sup> A ijo anjam osim niŋgi mern̄goqnqas. Kumbra dena a na ijo ñam koba ti ijo siŋgila koba ti boleq atqas.

<sup>15</sup> Ijo Abu aqa iŋgi iŋgi kalil di ijo iŋgi iŋgi dego. Deqa e niŋgi mern̄gonum, Qotei aqa Mondor na ijo anjam osim niŋgi mern̄goqnqas.”

*Yesus aqa aŋgro naŋgi are gulbeinjrimqa  
olo bunuqna naŋgi areboleboleinjrqas*

<sup>16</sup> Osiqa Yesus a olo marej, “Sokiñala niŋgi e nubqasai. Olo sokiñala niŋgi e nubqab.”

<sup>17</sup> Onaqa Yesus aqa aŋgro naŋgi segi segi maroqneb, “Yesus a marqo, ‘Sokiñala niŋgi e nubqassai. Olo sokiñala niŋgi e nubqab.’ A dego marqo, ‘E ijo Abu aqaq olo oqwai.’ A kiyaqa degsi marqo?”

<sup>18</sup> Naŋgi degsib maroqnsib olo maroqneb, “Yesus a kiyaqa marqo, ‘Sokiñala’? Anjam di aqa utru iga poigosai.”

<sup>19</sup> Naŋgi Yesus aqa anjam deqa nenemyqa laqnab di qalieosiqa endegsi minjrej, “E niŋgi mern̄gonum, ‘Sokiñala niŋgi e nubqasai. Olo sokiñala niŋgi e nubqab.’ Ijo anjam di aqa utru niŋgi poiŋgosai deqa niŋgi segi segi qaireqnub.

<sup>20</sup> O ijo aŋgro, e bole mern̄gwai. Niŋgi akam ti sosib are tulan̄ gulbein̄gas. Amqa mandam qaji tamo uŋgasari naŋgi areboleboleinjrqas. Ariya

nuŋgo are gulbe di olo koboamqa niŋgi tulanj areboleboleiŋgas.

<sup>21</sup> Uŋja a aŋgro oqajqa batieqnaqa aqa jejamu tulanj jaqatinjyeqnaqa a are gulbekobaiyeqnu. Ariya a aŋgro osim aqa jaqatinj koboamqa a aqa jaqatinj deqa olo are qalqasai. A aŋgro osim deqa tulanj areboleboleiŋgas.

<sup>22</sup> Dego kere bini niŋgi are gulbeiŋgwo. Ariya bunuqna e niŋgi olo niŋgitqa niŋgi are gulbe di uratosib tulanj areboleboleiŋgas. Nuŋgo arebolebole di tamo bei na olo yaingwa kerasai.

<sup>23</sup> Bati deqa niŋgi olo e anjam bei nenembqasai. E bole mernŋwai. Niŋgi ijo ñam na iŋgi bei qa Abu pailyqab di a na iŋgi di enŋwas.

<sup>24</sup> Niŋgi nami ijo ñam na Qotei pailyosaioqneb. Ariya bini niŋgi iŋgi bei oqajqa are soqnimqa niŋgi ijo ñam na Qotei pailyoqniy. Osib deqa niŋgi iŋgi di osib tulanj areboleboleiŋgas.”

*Yesus a mandam endeqa siŋgila kalil gotraŋyosiq tigelejunu*

<sup>25</sup> Osiqa Yesus a olo marej, “E niŋgi yawo anjam mernŋgoqnam. Bunuqna e olo yawo anjam bei niŋgi mernŋwasai. Anjam aqa damu geregere plaltosiy ijo Abu qa mernŋoqnnqai.

<sup>26</sup> Bati deqa e segi niŋgi qa Abu pailyqasai. Niŋgi ijo ñam na Abu pailyoqnnqab.

<sup>27</sup> Ijo Abu a segi na niŋgi qalaqalainjgeqnu. Di kiyaqa? Niŋgi e qalaqalaiboqnsib e Qotei aqaq na bem degsi poŋgeqnu deqa.

<sup>28</sup> Nami e ijo Abu aqaq na bosim mandamq aiyem. Sokiňala e olo mandam uratosiy aqaq olo oqwai.”

**29** Onaqa Yesus aqa aŋgro naŋgi aqa anjam di qusib minjeb, “Od, endego ni boleq di anjam ubtosim mergonum. Ni yawo anjam mergosai.

**30** Deqa bini iga poigwo, ni kumbra kalil qa qalieonum. Deqa iga ni anjam bei nenemmqsasai. Ni namoqna gago nenem qalieonum. Utru deqa iga ni qa gago areqalo siŋgilatosim maronum, bole, ni Qotei aqaq na bem.”

**31** Onaqa Yesus na kamba minjrej, “Ninji e qa nuŋgo areqalo siŋgilatonub e? Di keretonub.

**32** Niŋgi quiy. Bati bei bqas agi bqo. Sokiñala jeu tamo naŋgi na niŋgi teteiŋgibqa niŋgi kalil segisegiosib nuŋgo qureq jaraiqab. Jaraiyibqa e segi sqai. Bole, e segi sqasai. Ijo Abu a e ombla sqom.

**33** E anjam endi niŋgi merngeqnum. Di kiyaqa? Niŋgi na e beterbosib are lawo sqajqa deqa. Bole, niŋgi mandamq endi gulbe koba oqnqab. Di unjum. E segi na mandam endeqa siŋgila kalil gotranjosim tigelejunum. Deqa niŋgi are siŋgilatosib soqniy.”

## 17

### *Yesus a aqa aŋgro naŋgi qa pailyej*

**1** Yesus a anjam degsi marsiq koboonaqa lan goge tarosiqa Qotei endegsi pailyej, “O Abu, bati brantqo. E ino segi Aŋgro qujai unum deqa ni ijo ñam kobaqujatimqa e kamba dego ino ñam kobaqujatqai.

**2** Ni e siŋgila ebem. Siŋgila dena e na tamo ungasari kalil naŋgi taqatnjroqnqai. Osiy tamo kalil ni na ebem qaji naŋgi ñambile enjritqa naŋgi ñambile gaigai sqab.

**3** Nambile gaigai sqajqa kumbra agiende. Tamo e na ñambile enjreqnum qaji nañgi ni qa bole qalieeqnub. Agi ni segi Qotei bole. Nañgi e Yesus Kristus qa dego bole qalieeqnub. Agi ni na e qariñbonam mandamq aiyem. Ñambile gaigai sqajqa kumbra agide.

**4-5** “O Abu, e mandamq endi ino ñam koba ti ino singila koba ti babtoqnem. Osim wau kalil ni na ebem qaji di yekritem. Nami mandam a brantosaisonaqa e ni ombla ñam koba ti soqnem. Ñam di ni na olo ebimqa aqo ombla ñam koba ti sqom.

**6** “Tamo kalil ni na ebem qaji nañgi di e na ino ñam osornjroqnem. Deqa nañgi ino anjam dauryoqneb. Nañgi ino segi tamo soqneb deqa ni na nañgi mandamq endena elejosim e ebem.

**7** Bini nañgi qalieonub, iñgi iñgi kalil ni na e ebem qaji di inoq dena branteb.

**8** Nañgi degsib qalieonub. Di kiyaqa? Anjam kalil ni na e merbem qaji di e kamba nañgi minjrnám nañgi queb. Qusib ni na e qariñbonam bem anjam di nañgo areqaloq di siñgilateb. Osib endegsi poinjrej, e inoq dena bem.

**9** “E nañgi qa ni pailmonum. E mandam qaji tamo uñgasari nañgi qa ni pailmosai. Tamo ni na ebem qaji nañgi qa segi e ni pailmonum. Di kiyaqa? Nañgi ino tamo unub deqa.

**10** Ijo tamo kalil nañgi di ino dego. Ino tamo kalil nañgi di ijo dego. Nañgoq dena e ñam kobaquja eqnúm.

**11** “E inoq olo bqai. Deqa e mandamq endi olo sqasai. Ariya tamo ni na ebem qaji nañgi mandamq endi sqab. O Abu, ino kumbra kalil

tulañ boledamu. Ni segi qujai une saiqoji. Ino ñam koba ni na ebem qaji ñam dena ni na ijo tamo nañgi taqatnjroqnime. Amqa aqo aiyel are qujaitosim unum dego kere nañgi kamba are qujaitosib sqab.

<sup>12</sup> E nañgi koba na sosimqa ino ñam kobaqua ni na ebem qaji ñam dena nañgi taqatnjroqnem. Deqa ijo añgro bei padalosai. Añgro qujai agi ni nami padalqajqa giltem qaji a segi padalqas. A padalamqa ino anjam neñgreñq di unu qaji di aqa damu brantqas.

<sup>13</sup> E olo inoq bqai. Ijo segi arebolebole tulan kobaosim tamo ni na ebem qaji nañgoq di gaigai sqajqa deqa e mandamq endi sosimqa anjam endi mareqnum.

<sup>14</sup> “E na nañgi ino anjam minjroqnem. Utru deqa mandam qaji tamo uñgasari nañgi na nañgi jeutnjreqnub. Nañgi mandam qaji tamo sai. Agi e dego mandam qaji tamo sai.

<sup>15</sup> Ni na nañgi joqsim nañgi mandam uratosib laj qureq oqwajqa deqa e ni pailmosai. Nañgi mandamq endi soqnib ni na nañgi taqatnjroqnim tamo uge Satan na nañgi ugeugeinjraim deqa e ni pailmonum.

<sup>16</sup> Nañgi mandam qaji tamo sai. Agi e dego mandam qaji tamo sai.

<sup>17</sup> Ino anjam kalil bole. Ni ino anjam bole di nañgi minjroqne. Yimqa anjam di nañgo are miligiq di waquoqnimqa nañgi ino segi tamo tiñtij sqab.

<sup>18</sup> Nami ni na e qariñbonam mandamq aisim tamo uñgasari nañgo ambleq di soqnem. Deqa e kamba tamo ni na ebem qaji nañgi qariñnjritqa mandam qaji tamo uñgasari nañgo ambleq di sqab.

**19** E nañgi qa are qalsiy ijo segi jejamu ni emekritqai. Ijo kumbra dena nañgi ino segi tamo tiñtiñ sosib ino anjam bole dauryoqnqab.

**20** “E ijo aŋgro 11 nañgi qa segi ni pailmosai. Bunuqna nañgi ijo anjam mare mare laqnibqa tamo uŋgasari gargekoba nañgi naŋgo anjam quoqnsib e qa naŋgo areqalo sinqilatoqnqab. E nañgi qa dego ni pailmonum.

**21** O Abu, ni ijoq di unum. E dego inoq di unum. Aqo aiyel are qujaitosim unum. Ijo segi tamo uŋgasari kalil nañgi dego aqo aiyel koba na are qujaitosim sqajqa deqa e ni pailmonum. Yimqa mandam qaji tamo uŋgasari nañgi qalieqab, ni na e qariŋbonam bem.

**22** Aqo aiyel are qujaitosim unum. Ñam koba ni na ebem qaji di e kamba olo ijo segi tamo uŋgasari nañgi enjrem. Di kiyaqa? Nañgi dego aqo aiyel koba na are qujaitosim sqajqa deqa.

**23** E ijo segi tamo uŋgasari naŋgoq di unum. Ni ijoq di unum. Kumbra dena nañgi kalil dego aqo aiyel koba na are qujaitosim sqom. Soqnimqa mandam qaji tamo uŋgasari nañgi na nañgi unjrsibqa qalieqab, ni na e qariŋbonam bem. Osib qalieqab, ni e qalaqalaibeqnum dego kere ni ijo segi tamo uŋgasari nañgi qalaqalainjreqnum.

**24** “O Abu, tamo uŋgasari ni na ebem qaji qure e sqai di nañgi dego e ombla qure dia sqom. E deqa ni pailmonum. Nañgi e ombla sosibqa ñam koba ni na ebem qaji di unqajqa deqa ti e ni pailmonum. Nami ni mandam atosaisosimqa ñam koba di e ebem. Di kiyaqa? Ni na e qalaqalaiboqnem deqa.

**25** O Abu, ino kumbra kalil tulaq bole tiñtiñ.

Mandam qaji tamo uŋgasari naŋgi ni qa qaliesai. Ariya e ni qa qalie bole. Ijo segi tamo uŋgasari naŋgi dego ni qa qalie bole. Deqa naŋgi qalieonub, ni na e qariŋbonam bem.

<sup>26</sup> E ino ñam naŋgi osornjroqnen. Naŋgi olo osornjrqai. Yimqa ni na e qalaqalaibeqnum dego kere naŋgi ino qalaqalaiyo kumbraq di sqab. Amqa e segi naŋgi koba na sqom.”

## 18

### *Judas a Yesus osiq jeu tamo naŋgo banq di atej*

<sup>1</sup> Yesus a degsi Qotei pailyosiq koboonaqa a na aqa aŋgro naŋgi joqsiqa koba na walwelosib Kidron ya dosib taqal beiq aisib naňu agu beiq di soqneb.

<sup>2</sup> Bati gaigai Yesus aqa aŋgro naŋgi koba na naňu agu dia korooqneb. Deqa Yesus aqa aŋgro Judas agi Yesus osim jeu tamo naŋgo banq di atqas qaji a naňu agu di qaliesoqnej.

<sup>3</sup> Deqa a na qaja tamo gargekoba naŋgi wanjal ti lam ti sebru ti eleŋonab joqsiqa naňu agu deq gileb. Atra tamo kokba ti Farisi ti naŋgi na naŋgi qariŋjrnab Yesus ojqa gileb. Rom naŋgo qaja tamo qudei dego naŋgi koba na gileb.

<sup>4</sup> Gulbe kalil Yesus aqaq di brantqas qaji di a nami qaliesoqnej. Deqa qaja tamo naŋgi aqaq bonabqa a naŋgo areq aisiqa nenemnjrej, “Ninji yai qa bonub?”

<sup>5</sup> Onaqa naŋgi na kamba minjeb, “Iga Yesus Nasaret qaji a qa bonum.” Onaqa Yesus na minjrej, “E agiende.” Judas agi Yesus osiqa qaja tamo

nañgo banq di atej qaji a nañgi koba na tigeleso-qneb.

<sup>6</sup> Onaqa nañgi Yesus aqa anjam di quisibqa qore na ululonjosib ḥereḥeb.

<sup>7</sup> Onaqa Yesus na olo nenemnjrej, “Niñgi yai qa bonub?” Onaqa nañgi na minjeb, “Iga Yesus Nasaret qaji a qa bonum.”

<sup>8</sup> Onaqa Yesus na minjrej, “E nami mern̄gonum, e agiende. Niñgi e qa bonub di e segi ojiy. Ijo angrø nañgi uratn̄jrib gileb.”

<sup>9</sup> Yesus a nañgi degsi minjrej deqa aqa anjam bei nami marej qaji di aqa damu brantej. Agi a nami endegsi marej, “O Abu, tamo nañgi ni na ebem qaji bei e uratit padalqasai.”

<sup>10</sup> Onaqa jeu tamo nañgi Yesus ojeqnab Simon Pita na aqa sebru osiqa atra tamo gate aqa kañgal tamo bei gateq di qalqajqa waiyej grotosiqa dabkala segi gentetej. Kañgal tamo di aqa ñam Malkus.

<sup>11</sup> Onaqa Yesus na Pita minjej, “Ino sebru olo ate. E jaqatiñ koba oqai. Jaqatiñ di ya uge uyo bul. Di uyqai. Ijo Abu na merbej, ‘Ni jaqatiñ di oqam.’”

*Qaja tamo nañgi Yesus ojsib Anas aqa talq osib aiyeb*

<sup>12</sup> Onaqa qaja tamo nañgi ti nañgo gate koba a ombla na Yesus ojsib aqa banq tonteteb.

<sup>13</sup> Osib Kaiafas aqa sou Anas aqa talq osib aiyeb. Kaiafas a wausau deqa Juda nañgi atra tamo gate soqnej.

<sup>14</sup> Agi a nami Juda tamo kokba nañgi minjrej, “Tamo qujai a tamo ungasari kalil nañgi qa moiqas di kere.”

*Pita a marej, “E Yesus aqa aŋgro sai”*

<sup>15</sup> Qaja tamo naŋgi Yesus osi aiyeqnabqa Saimon Pita a qoreq na Yesus dauryosiq aiyej. Yesus aqa aŋgro bei dego a dauryosiq aiyej. Aŋgro di atra tamo gate a qalie. Deqa a Yesus dauryosiq toreijen miligiq gilsiq atra tamo gate aqa talq di brantej.

<sup>16</sup> Ariya Pita a sirajme qala oqeql di tigelesoqnej. Onaqa Yesus aqa aŋgro agi atra tamo gate a qaliesoqnej qaji a na sirajme taqato uŋa minjnaqa odyonaqa Pita osiq ombla na jen miligiq gilsib tal qalaq di tigelesoqneb.

<sup>17</sup> Onaqa sirajme taqato uŋa a na Pita nenemyej, “Ni Yesus aqa aŋgro kiyo?” Onaqa Pita na kamba minjej, “Eo. E aqa aŋgro sai.”

<sup>18</sup> Kanjal tamo naŋgi ti tal taqato tamo naŋgi ti yornjrnaqa ɣam tuŋguyosib ɣamyuwo areq di tigelesosib ɣam yoroqneb. Onaqa Pita a dego bosiq naŋgi koba na tigelesosib ɣam yoroqneb.

*Atra tamo gate a anjam gargekoba Yesus nene-myooqnej*

<sup>19</sup> Bati deqa atra tamo gate a anjam gargekoba Yesus nene-myooqnej. Yesus aqa aŋgro naŋgi qa ti aqa anjam a na tamo ungasari naŋgi minjroqnej qaji deqa ti nene-myooqnej.

<sup>20</sup> Onaqa Yesus na kamba minjej, “E boleq di tamo ungasari naŋgi anjam minjroqnam. E bati gaigai Qotei tal miligiq di, atra tal miligiq di, Juda naŋgo koro sawaq di anjam palontoqnsim minjroqnam. E uliosim anjam minjrosaioqnam.

<sup>21</sup> Deqa ni kiyaqa e nene-kobaibeqnum? Tamo ungasari ijo anjam quoqneb qaji naŋgi segi nen-

emnjrimqa nañgi na mermqab. E anjam minjrqnem qaji di nañgi qalie.”

<sup>22</sup> Yesus a atra tamo gate degsi minjnaqa qaja tamo bei Yesus aqa areq di tigelesoqnej qaji a banj lubtosiqa Yesus aqa ulatamuq di qalej. Osiga minjej, “Ni kiyaqa atra tamo gate aqa medabu ojonom?”

<sup>23</sup> Onaqa Yesus na kamba minjej, “E anjam maronum endi gisanjamqa ubtosim merbe. Ariya ijo anjam boleamqa ni kiyaqa e lubonum?”

<sup>24</sup> Onaqa Anas na aqa qaja tamo nañgi minjrnnaqa Yesus osib atra tamo gate Kaiafas aqaq gileb. Yesus aqa banj tonto qorbi sonaq osi gileb.

### *Pita a olo marej, “E Yesus aqa angro sai”*

<sup>25</sup> Saimon Pita a ñamyuwo areq di tigelesosiq ñam yoreqnaqa tamo qudei na minjeb, “Ni dego Yesus aqa angro bei kiyo?” Onaqa Pita a saidosiq minjrej, “Eo. E aqa angro sai.”

<sup>26</sup> Onaqa atra tamo gate aqa kañgal tamo bei na Pita minjej, “E ni kiyo Yesus ombla nañu aguq di sonam numonum?” Tamo di agi Pita na tamo dabkala gentetej qaji aqa was.

<sup>27</sup> Onaqa Pita a olo saidosiq minjej, “Di e sai.” Pita a degsi gisanqoqalubtonaqa tuwe anjamej.

### *Juda tamo kokba nañgi na Yesus osib Pailat aqa talq gileb*

<sup>28</sup> Onaqa nobqolo malu qameqnaq Juda tamo kokba nañgi na Kaiafas aqa talq dena Yesus osib Rom nañgo mandor Pailat aqa tal kobaqujaq gileb. Nañgi tal miligiq gilosai. Nañgi endegsib are qaleb, “Pailat a Juda tamo sai. A sawa bei qaji tamo. Deqa iga aqa tal miligiq gilqa getento. Gago dal anjam

degsiunu. Iga aqa tal miliq gilqom di iga une ti sqom. Deqa gago yori bati koba brantimqa iga ingi uyqa keresaiigwas.” Naŋgi degsib are qalsib deqa naŋgi Pailat aqa tal miliq gilosai.

<sup>29</sup> Naŋgi oqeinq di tigelesonabqa Pailat a segi oqedosiq naŋgoq di brantej. Brantosiqa nenemnjrej, “Tamo endi aqa une kiye qa niŋgi a osib ijoq bonub?”

<sup>30</sup> Onaqa naŋgi na Pailat minjeb, “Tamo endi a kumbra uge yosai qamu iga inoq osi bosai qamu.”

<sup>31</sup> Onaqa Pailat na olo minjrej, “Niŋgi a olo osi aisiq nunjo segi dal anjam na aqa une qa pegiyiy.” Onaqa naŋgi na kamba Pailat minjeb, “Iga Juda tamo. Deqa iga na tamo moiyatqa keresai.”

<sup>32</sup> Naŋgi Pailat degsib minjeb deqa anjam bei Jesus a nami marej qaji di aqa damu brantej. Agi Jesus a gam kiye na moiqas di a segi nami ubtej.

<sup>33</sup> Onaqa Pailat a olo puluosiqa aqa tal miliq gilsiq aqa qaja tamo naŋgi minjrnaqa naŋgi na Jesus osib aqa areq beb. Bonabqa Pailat na nenemyej, “Ni Juda naŋgo Mandor Koba e?”

<sup>34</sup> Onaqa Jesus na kamba minjej, “Ni ino segi areqalo na anjam di merbonum kiyo tamo qudei na e qa saimonub qusim anjam di merbonum kiyo? Ni e merbe.”

<sup>35</sup> Onaqa Pailat na olo minjej, “E Juda tamo e? Sai. Ni que. Ino segi leŋ agi Juda naŋgi ti atra tamo kokba ti naŋgi na ni osib ijoq bonub. Deqa ni merbe. Ni une kiye yonum deqa ni osi bonub?”

<sup>36</sup> Onaqa Jesus na minjej, “E mandam qaji mandor sosai. Degsi so qamu Juda naŋgi na e ojeqnab ijo wau tamo naŋgi ŋirinjosib qoto itnjreb qamu.”

<sup>37</sup> Onaqa Pailat na olo Yesus nenemyej, “Ni bole mandor e?” Onaqa Yesus na minjej, “Od, ni kere merbonum. E mandor. E anjam bole ubtqajqa deqa mandamq aisim ɣambabem. Tamo kalil anjam bole dauryeqnub qaji naŋgi ijo anjam queqnub.”

<sup>38</sup> Onaqa Pailat na nenemyej, “Anjam bole di kiye?”

*Juda naŋgi na Pailat minjeb, “Ni Yesus ɣamburbasq di qame!”*

Pailat a degsi marsiqa olo oqedosiqa Juda tamo kokba naŋgoq gilsiqa minjrej, “E tamo endi aqa jejamuq di une bei unosai.

<sup>39</sup> Deqa e nuŋgo kumbra bei dauryqai. Wausau gaigai nuŋgo yori bati koba branteqnaqa e na tamo qujai tonto talq dena uratoqnsim eŋgeqnum. Deqa ningi na merbiy. Wausau endeqa e tamo yai uratosiy eŋgwai? E Juda naŋgo mandor endi uratosiy eŋgwai e?”

<sup>40</sup> Onaqa Juda tamo kokba naŋgi olo tulan̄ saidosib minjeb, “Ni a uratim oqedaiq. Tonto tamo Barabas a uratim oqedem.” Naŋgi Pailat degsib minjeb. Barabas a leŋ ojo tamo.

## 19

<sup>1</sup> Onaqa Pailat a Yesus osiqa aqa qaja tamo naŋgo banq di atsiqa minjrej, “Nin̄gi Yesus bu toqon̄ na kumbainyiy.” Degsi minjrnaqa naŋgi na Yesus osib bu toqon̄ na kumbainyeb.

<sup>2</sup> Kumbainyosib koboonaqa naŋgi na sil luwit osib lulumosib dena mandor kokba naŋgo gateatal bul gereiyosib aqa gateq di atetosib siŋila

na teqiyeb. Osib gara jugo olekoba lent mandor kokba nangi gaigai jigeqnub deqaji bei osib Yesus jigeteb. A segi qa Mandor Koba maroqnej deqa nangi na kumbra degyeb.

<sup>3</sup> Osib nangi Yesus aqa areq bosib a misiliyoqnsib gisan na binjyoqnsib minjoqneb, “O Juda naŋgo Mandor Koba, kaiye.” Nangi degsib Yesus misiliyoqnsib baŋ lubtosib aqa ulatamuq di qaloqneb.

<sup>4</sup> Onaqa Pailat a olo aqa talq dena oqedosiqa Juda tamo kokba naŋgi minjrej, “Niŋgi uniy. E Yesus aqa jejamuq di une bei yala unosai bole sai. Niŋgi di qaliegajqa deqa e Yesus olo nunqoq osi bonum.”

<sup>5</sup> Degsi minjrnaqa Yesus a oqedej. Gate tatal sil luwit na gereiyosib aqa gateq di ateteb qaji de ti gara lent a jigeteb qaji de ti qorbi oqedej. Onaqa Pailat na minjrej, “Niŋgi tamo endi uniy.”

<sup>6</sup> Degsi minjrnaqa atra tamo kokba ti naŋgo qaja tamo naŋgi ti Yesus unsibqa naŋgi murqumyoqnsib Pailat wainyoqnsib minjoqneb, “Ni a ḥamburbasq di qame! Ni a ḥamburbasq di qame!” Onaqa Pailat na minjrej, “Niŋgi segi na Yesus osib ḥamburbasq di qamiy. E aqa jejamuq di une bei unosai.”

<sup>7</sup> Onaqa Juda tamo kokba naŋgi na olo Pailat minjeb, “Yesus a segi qa marqo, ‘E Qotei aqa Nir.’ Aqa une deqa a moiym. Gago dal anjam degsi unu.”

<sup>8</sup> Onaqa Pailat a naŋgo anjam di quсиqa a tulan ulaugetej.

<sup>9</sup> Osiqa a olo Yesus osiq tal miliqq gilsiqa nenemyej, “Ni sawa qabe qaji? Ni e merbe.” Onaqa

Yesus a mequmesoqnej. A na kamba anjam bei Pailat minjosai.

<sup>10</sup> Deqa Pailat na olo minjej, “Ni anjam bei merbqasai e? Ni que. E tamo kobaquja. Deqa e ni uratmit ni gilqam. E ni uratmzasai di ni ɣamburbasq di gaijosisim moiqam. Ni degsi poimosai e?”

<sup>11</sup> Onaqa Yesus na Pailat minjej, “Qotei laj qureq di unu qaji a na ni singila emosai qamu ni e gulbe bei ebqa keresai qamu. Deqa ino une kiñala. Ariya atra tamo gate agi e ojsiq ino banq di atqo qaji aqa une kobaquja.”

<sup>12</sup> Yesus na Pailat degsi minjnaq qusiqa olo oqedosiqa Juda tamo kokba naŋgi minjrej, “Uŋgum. E Yesus uratit gilqas.” A naŋgi degsi minjreqnaqa naŋgi na olo tulaj saidoqnsib murqumyoqnsib minjoqneb, “Ni Yesus uratim gilaiq. Ni a uratqam di ni mandor koba Sisar aqa wau tamo bolesai. Yesus a marqo, ‘E segi mandor koba.’ A degsi marqo deqa a na Sisar jeu atqo.”

<sup>13</sup> Naŋgi na Pailat degsib minjeqnab qusiqa a olo Yesus osiq oqedosiqa aqa awo jaram kobaq di awoej. Pailat a gaigai tamo nango une qa peginjrqa oqnsiq dia awooqnej. Jaram so qaji sawa di aqa ñam Meniŋ Bijal. Hibru anjam na “Gabata” mareqnub.

<sup>14</sup> Juda naŋgo yori bati koba brantqa laqnej deqa yori bati aqa iŋgi iŋgi kalil gereiyosib atnab soqnej. Seŋ bati 12 onaq qanam jigeej. Deqa Pailat na Yesus osiqa Juda tamo kokba naŋgi minjrej, “Niŋgi nunjo mandor koba uniy.”

<sup>15</sup> Onaqa naŋgi tulaj leleŋjoqnsib minjoqneb, “Ni a taqal waiy! Osim ɣamburbasq di qame!” Onaqa Pailat na nenemnjrej, “E nunjo mandor koba

osiy ɣamburbasq di qamqai e?” Onaqa atra tamo kokba naŋgi na kamba minjeb, “Gago mandor bei saiqoji. Gago mandor qujai agi Sisar.”

<sup>16</sup> Onaqa Pailat a naŋgo areqalo dauryosiqa Yesus osiq naŋgo baŋq di atsiqa minjrej, “Niŋgi na Yesus osib ɣamburbasq di qamiiy.”

### *Yesus a ɣamburbasq di gaiŋej*

<sup>17</sup> Pailat a Juda tamo kokba naŋgi degsi minjr-naqa qaja tamo naŋgi Yesus osib aqa qawarq di aqa segi ɣamburbas atetosib a baŋ ojsib Jerusalem uratosib osi gilsib sawa agu kiňala bei aqa ñam Tamo Gate Tanu di branteb. Ñam di Hibru anjam na “Golgota” mareqnub.

<sup>18</sup> Di brantosib Yesus osib ɣamburbasq di qameb. Tamo aiyel dego ɣamburbasq di qameleñeb. Yesus a ambleq di tigeltoſib tamo bei aqa baŋ qonaŋq di tigelteb. Bei aqa baŋ woq di tigelteb.

<sup>19</sup> Onaqa Pailat a anjam bei neŋgreŋyosiq ɣamburbas mutu gogeq di atej. A endegsi neŋgreŋyej, “Yesus Nasaret qaji a Juda naŋgo Mandor Koba.”

<sup>20</sup> Sawa agu Yesus ɣamburbasq di gainteb qaji di Jerusalem jojom. Deqa Juda tamo uŋgasari gargekoba naŋgi gile beoqnsib anjam Pailat na neŋgreŋyej qaji di sisivoqneb. Anjam di Hibru anjam na ti Rom naŋgo anjam na ti Grik naŋgo anjam na ti turtosiq neŋgreŋyej.

<sup>21</sup> Onaqa Juda naŋgo atra tamo kokba naŋgi na Pailat minjeb, “‘Yesus a Juda naŋgo Mandor Koba’ anjam degsi neŋgreŋyaim. ‘A marej, “E Juda naŋgo Mandor Koba,”’ anjam degsi neŋgreŋye.”

**22** Onaqa Pailat na minjrej, “Uŋgum. E anjam neŋgreŋyonum degesoqnem.”

**23** Ariya qaja tamo naŋgi na Yesus ɿamburbasq di qamsibqa aqa gara eleŋqa marsib gilteleŋeb. Gilteleŋosib tumbol qolqe ateb. Aqa gara jugo olekoba di gara baŋga qujai na gereiyeb. Gara baŋga bei na totoryosai. Gara di tulan boledamu.

**24** Deqa qaja tamo naŋgi segi segi qairosib mareb, “Iga gara di bumbranqasai. Iga meniŋ silali alaŋonam tamo yai aqa meniŋ na buŋnırqas a na gara di oqas.” Degtib marsib meniŋ silali alaŋeb. Naŋgi kumbra di yeb deqa Qotei aqa anjam bei neŋgreŋq di unu qaji di aqa damu branṭej. Anjam agiende, “Naŋgi ijo gara eleŋqa marsib gilteleŋqab. Gilteleŋosib meniŋ silali alaŋqab.”

**25** Yesus aqa ai wo aqa ai yala wo ɿamburbas utruq di tigelesoqneb. Maria Makdala qure qaji wo Klopas aqa ɿauŋ Maria wo naŋgi aiyel dego bosib koba na tigelesoqneb.

**26** Onaqa Yesus a tirosiqa aqa ai wo aqa angro agi a tulan qalaqalaiyoqnej qaji de wo ɿamburbas utruq di tigelesonab unjrsiqa aqa ai metosiq minjej, “O ai, di ino angro.”

**27** Osiqa angro di minjej, “Di ino ai.” Onaqa bati qujai deqa angro dena Yesus aqa ai osiqa aqa segi talq di ombla sosibqa taqatoqnej.

### *Yesus a moiyej*

**28** Yesus a qalieej, wau kalil aqa Abu na yej qaji di kobotej. Osiqa marej, “E ya qarbqo.” A degsi marej. Di kiyaqa? Qotei aqa anjam bei neŋgreŋq di so qaji di aqa damu brantqajqa deqa.

**29** Onaqa qaja tamo naŋgi Yesus aqa anjam di quisibqa gara ñenŋgi bei osib wain isa kobaq di tuqtib. Tuqtosib ñamtan̄ bei aqa dani osib mutuq di gara ñenŋgi qosisib osib Yesus anaiyqajqa soqtosib aqa medabuq di ateb. Wain di ya nobu bei ñamburbas utruq di nami atnab soqnej qaji dena tigsib Yesus anaiyeb.

**30** Onaqa Yesus a wain isa koba di uysiqa marej, “Bini e ijo wau kobotonum.” Degsi marsiqa aqa gate gulain̄osiqa mondor titosiq moiyej.

### *Qaja tamo bei na Yesus aqa jar ban̄gaq di qamej*

**31** Juda naŋgo yori bati koba brantqa laqnej deqa yori bati aqa inŋgi inŋgi kalil gereiyosib atnab soqnej. Nebe yori bati. Deqa Juda naŋgi mareb, “Iga yori bati qa tamo naŋgi ñamburbasq di uratnjrim sqasai.” Osib naŋgi Pailat aqa areq bosib minjeb, “Ni ino qaja tamo naŋgi minjrimqa gilsib tamo ñamburbasq di gain̄ejunub qaji naŋgo siŋga gentetnjribqa urur moreŋabqa osib subq atqab.”

**32** Onaqa Pailat a naŋgo anjam di quisiga odosiq aqa qaja tamo qudei qariŋnjrnaq gilsib tamo aiyel Yesus koba na ñamburbasq di gain̄esoqneb qaji naŋgo siŋga gentetnjreb.

**33** Osib Yesus aqa areq gilsib uneb a nami moiyej. Deqa naŋgi aqa siŋga gentosai.

**34** Onaqa qaja tamo bei na aqa qaja osiq Yesus aqa jar ban̄gaq di qamnaq leŋ ti ya ti aiyel.

**35** Naŋgi kumbra di yonabqa e ijo segi ñamdamu na unem. E kumbra deqa saoqnsim laqnum. E segi qalieonum, ijo anjam bole. Deqa niŋgi quisib nuŋgo areqaloq di siŋgilatiy.

**36** Qaja tamo nañgi kumbra di yeb deqa Qotei aqa anjam bei neñgreñq di so qaji di aqa damu brantej. Agi endegsib neñgreñyeb, “Nañgi aqa tanu bei gentqasai.”

**37** Qotei aqa anjam bei dego aqa damu brantej. Anjam agiende, “Nañgi qaja na aqa jar bañgaq di qamsibqa a koqyesqab.”

*Tamo aiyel na Yesus aqa jejamu osib sub bunujq di ateb*

**38** Onaqa tamo bei aqa ñam Josep a Yesus aqa jejamu osim subq atqa marsiq Pailat a nenemyqa gilej. Josep a Arimatea qure qaji. A Yesus dauryoqnej qaji. A Juda tamo kokba nañgi ulainjrsiq deqa uliosiq Yesus dauryoqnej. A boleq di dauryosaloqnej. Ariya a Pailat aqa areq gilsiq neneemyej, “Ni e odbimqa e Yesus aqa jejamu osiy subq atqa kere e?” Onaqa Pailat na Josep odyonaqa a Yesus aqa jejamu osiq subq atqa gilej.

**39** Nikodemus agi nami qolo Yesus aqaq gilej qaji a dego Josep ombla na Yesus aqa jejamu osib subq atqa gileb. Nikodemus a gilqa osiqa ñam so aqa ya quleq ti utru aiyela tutosiq gereiyosiq osi gilej. Nam so aqa ya di aqa gulbe 30 kilogram.

**40** Onaqa nañgi aiyel Yesus aqa jejamu osib gara boledamu na dalaosib ñam so aqa ya di osib aqa jejamuq di liyeb. Juda nañgi na tamo subq atqa oqnsib degyeqnub.

**41** Sawa Yesus ñamburbasq di qameb qaji qalaq di nañu agu bei soqnej. Nañu agu dia sub bunuj bei soqnej. Sub dia nami tamo bei atosaisoqneb.

**42** Sub di isaq di sosai. A jojom di soqnej. Juda nañgo yori bati aqa ingi ingi kalil gereiyqa bati

brantej deqa naŋgi aiyel na Yesus aqa jejamu osib sub miligiq di jugeb.

## 20

### *Yesus a subq na tigelej*

<sup>1</sup> Yesus a subq di sonaq yori batiej. Olo nebeon-aqa nobqolo ambru Maria Makdala qure qaji a tigelosiqa Yesus aqa subq gilej. Gilsiq ŋam atej meniŋ kobaquja sub me getenteb qaji di waqosiq taqal di sonaq unej.

<sup>2</sup> Unsiqa olo puluosiq urur ti aisiq Saimon Pita wo Yesus aqa angro agi a tulan qalaqalaiyoqnej qaji de wo naŋgi aiyel itnjrsiqa minjrej, “Gago Tamo Koba aqa jejamu subq dena osib jaraiyonub. Qabia kiyo atonub di iga qaliesai.”

<sup>3</sup> Degsi minjrnaqa Pita angro de wo naŋgi anjam di quisibqa Yesus aqa sub unqajqa gileb.

<sup>4</sup> Naŋgi aiyel gurgurosib giloqnsib angro dena Pita buŋyosiqa namoosi gilsiq subq di brantej.

<sup>5</sup> Osiq sub meq di tigelosiqa miligi tirosiq gara Yesus dalaeb qaji di sonaq unej. A sub miligiq aiyosai.

<sup>6</sup> Onaqa Saimon Pita a bunuqna bosiq torei sub miligiq aiyej. Aisiq a dego gara Yesus dalaeb qaji di unej.

<sup>7</sup> Gara mutu bei Yesus aqa gate qoseteb qaji di lubosiq taqal beiq di sonaq unej. Gara mutu di gara qudei ti turtosiq sosai. A segiq di soqnej.

<sup>8</sup> Onaqa angro namo subq di brantej qaji a dego sub miligiq aiyej. Aisiq gara di unsiq marej, “Bole.”

<sup>9</sup> Bati deqa naŋgi aiyel Qotei aqa anjam bei neŋgreŋq di so qaji di aqa utru geregere poinjrosaisoqnej. Anjam agiende, “Kristus a olo subq na tigelqas.”

<sup>10</sup> Ariya naŋgi olo puluosib naŋgo qureq aiyeb.

### *Maria Makdala qaji a Yesus unej*

<sup>11</sup> Onaqa Maria a sub qalaq di tigelesosiqa akamoqnej. Akamoqnsiqa sub miligi tirej.

<sup>12</sup> Tirosiqa laŋ aŋgro aiyel sub miligiq di sonab unjrej. Naŋgi gara qat jigsib Yesus neioteb qaji lumeq di awesoqneb. Bei gateqsi bei singaqsi awesoqneb.

<sup>13</sup> Awesosibqa Maria minjeb, “Uŋa, ni kiyaqa akameqnum?” Onaqa minjrej, “Naŋgi ijo Tamo Koba osib jaraiyonub. Qabia kiyo atonub di e qaliesai.”

<sup>14</sup> Maria a naŋgi degsi minjrsiq bulosiqa aqa qoreq di Yesus a tigelesonaq unej. A qaliesai, di Yesus.

<sup>15</sup> Onaqa Yesus na Maria minjej, “O uŋa, ni kiyaqa akameqnum? Ni yai unqa bonum?” Onaqa Maria a are qalej, “Tamo endi a naňu agu taqateqnu kiyo?” Degsi are qalsiq minjej, “Ni na kiyo ijo Tamo Koba osim sawa qabia atonum di merbimqa e gilsiy oqai.”

<sup>16</sup> Onaqa Yesus na minjej, “O Maria.” Degsi minjnaqa Maria a Yesus qa poiyonaqa areiyosiq minjej, “O Rabonai.” Di Hibru anjam. Aqa damu, “O Qalie Tamo Koba.”

<sup>17</sup> Onaqa Yesus na Maria minjej, “E ijo Abu aqaq ogosaiunum deqa ni e ojaim. Ni ijo was naŋgoq gilsim endegsi minjre, ‘Yesus a marqo, ‘E ijo Abu

aqaq olo oqwai. Ijo Abu agi nun̄go Abu dego. Ijo Qotei agi nun̄go Qotei dego.” ’ Ni gilsim nañgi degsi minjrej.”

<sup>18</sup> Onaqa Maria Makdala qaji a Yesus aqa anjam di quisiqa gilsiq Yesus aqa aŋgro nañgi itnjrsiqa minjrej, “E gago Tamo Koba a unonum.” Osiqa anjam kalil Yesus na minjej qaji di olo nañgi sainjrej.

### *Yesus aqa aŋgro nañgi na a uneb*

<sup>19</sup> Yori bati koboosiq bilaqttonaqa Yesus aqa aŋgro nañgi tal bei gogetosib sirajme kalil qandimteleñosib warum miligiq di soqneb. Nañgi Juda tamo kokba nañgi ulainjrsib deqa degyeb. Onaqa bati qujai deqa Yesus a tal miligiq di brantosiqa nañgo ambleq di tigelosiq minjrej, “O ijo aŋgro, ningi are lawo soqniy.”

<sup>20</sup> Osiqa aqa banj ti jar bañga ti nañgi osornjrej. Onaqa nañgi kalil Tamo Koba a unsibqa tulan̄ areboleboleinjrej.

<sup>21</sup> Onaqa Yesus na olo minjrej, “Ningi are lawo soqniy. Ijo Abu na e qarinjbej dego kere e ningi qarinjgeqnum.”

<sup>22</sup> Yesus na aqa aŋgro nañgi anjam degsi minjrsiqa aqa mondor puynjrsiqa minjrej, “Ningi Qotei aqa Mondor Bole oiy.

<sup>23</sup> Ningi tamo ungasari nañgo une kobotetnjqab di Qotei a dego nañgo une kobotetnjqas. Ariya ningi tamo ungasari nañgo une kobotetnjqasai di Qotei a dego nañgo une kobotetnjqasai.”

### *Tomas a Yesus unej*

<sup>24</sup> Yesus a nañgoq di brantej di Tomas a nañgi koba na sosai. Tomas a Yesus aqa aŋgro 12 deqaji bei. Aqa ñam bei Didimus.

**25** Onaqa Yesus aqa angro naŋgi gilsib Tomas itosib minjeb, “Iga gago Tamo Koba a unonum.” Degsi minjnabqa a naŋgo anjam di qunaq ugeiyonaq minjrej, “E ijo ɻamdamu na Yesus aqa baŋ bile tutu na qameb qaji pirigi di unsiy ojqai di e marqai, ‘Bole.’ E aqa jar baŋga qaja na qameb qaji pirigi di dego unsiy ojqai di e marqai, ‘Bole.’ E unqasai di e bole qa marqasai.”

**26** Ariya bati 7 koboonaqa Yesus aqa angro naŋgi olo tal miliq di soqneb. Tomas a dego naŋgi koba na soqneb. Siraŋme kalil qandimesonabqa Yesus a tal miliq di brantosiqa naŋgo ambleq di tigelosiq minjrej, “O ijo angro, niŋgi are lawo soqniy.”

**27** Osiqa Tomas minjej, “O Tomas, ni ino baŋ gei na ijo baŋ bile qameb qaji pirigi ojsim unime. Ino baŋ waiyosim ijo jar baŋga qameb qaji pirigi dego oje. Areqalo aiyelтайм. Areqalo qujaitosim e qa ino areqalo siŋgilat.”

**28** Onaqa Tomas na Yesus minjej, “O Yesus, ni ijo Tamo Koba. Ni ijo Qotei dego.”

**29** Onaqa Yesus na olo Tomas minjej, “Ni ino ɻamdamu na e nubsim deqa ino areqalo e qa siŋgilatonum e? Ariya tamо uŋgasari naŋgo ɻamdamu na e nubosaieqnub qaji naŋgi e qa naŋgo areqalo siŋgilatqab di naŋgi tulan areboleboleinjrqas.”

### *Jon a anjam endi neŋgreŋyej di aqa utru*

**30** Yesus a Qotei aqa maŋwa tulan gargekoba aqa angro naŋgo ɻamdamuq di yoqnej. E aqa maŋwa quja quja segi buk miliq endi neŋgrenyonum.

**31** E anjam endi neŋgrenyonum. Di kiyaqa? Ningi sisivosib Yesus qa nuŋgo areqalo siŋgilatosib a bole

Kristus Qotei aqa Niri degsi poiñgwajqa deqa. Osib niñgi Yesus aqa ñam na ñambile gaigai sqajqa deqa.

## 21

### *Yesus aqa angro 7 nañgi na Yesus uneb*

<sup>1</sup> Onaqa bati bei Yesus a Taiberias ya agu qalaq di sosiqa aqa angro nañgoq di olo brantej. E deqa kiñala saqai.

<sup>2</sup> Ya agu qalaq di Yesus aqa angro 7 nañgi soqneb. Angro bei Saimon Pita. Bei Tomas aqa ñam bei Didimus. Bei Nataniel. Nataniel aqa qure utru Kana. Kana a Galili sawaq di unu. Sebedi aqa ñiri aiyel nañgi dego ya agu qalaq di soqneb. Ariya Yesus aqa angro aiyel dego nañgi koba na soqneb.

<sup>3</sup> Onaqa Saimon Pita na nañgi minjrej, “E qe oqajqa deqa kakaj waiyqa aiyeqnum.” Onaqa nañgi na minjeb, “Iga kalil koba na ainqom.” Degsi minjsib nañgi koba na aisib qobuñ gogetosib ya robuq oqsib kakaj waiyoqneb. Di qolo. Waiyeqnab nebeej. Nañgi qe bei osai bole sai.

<sup>4</sup> Nobqolo ambru nañgi qobuñ miliq di sosib ñam ateb Yesus a alile di tigelesonaq uneb. Nañgi qaliesai, di Yesus.

<sup>5</sup> Deqa a na nenemnjrej, “O ijo angro, niñgi qe onub e?” Onaqa nañgi na minjeb, “Eo. Iga qe osai.”

<sup>6</sup> Onaqa minjrej, “Niñgi qobuñ aqa qala bei ban woq di kakaj waiyyi. Waiyosib niñgi qe oqab.” Onaqa nañgi Yesus aqa anjam di dauryosib ban woq di kakaj waiyeb qe tulañ ani eb. Qe di tulan gargekoba deqa nañgi na soqtosib qobuñ goge di atqa keresaiinjrej.

<sup>7</sup> Onaqa Yesus aqa aŋgro agi a tulaŋ qalaqalaiy-oqnej qaji a na Pita minjej, “Tamo di gago Tamo Koba.” Onaqa Saimon Pita a anjam di qusiqa aqa gara jugo wauqa osiq piqtej qaji di olo jigsiga qobuŋ dena prugosiq yaq aisiq qawainjosiq Yesus aqa areq gilej.

<sup>8</sup> Yesus aqa aŋgro qobuŋ miligiq di soqneb qaji naŋgi alile jojom 100 mita. Deqa kakaj qe na maqesonaq naŋgi qobun na titosib aisiib alile di tiryeb.

<sup>9</sup> Alile di tiryosib ɣam ateb di Yesus a nami ɣam tuŋguyosiq qe koitonaq ɣamyuwoq di sonaq uneb. Bem qudei dego sonaq uneb.

<sup>10</sup> Deqa Yesus na minjrej, “Niŋgi qe onub di qudei osi boiy.”

<sup>11</sup> Onaqa Pita a olo qobuŋ gogetosiqa kakaj qe ti titosiq alile di atej. Qe di kokba. Qe kalil sisiyeb 153. Di qe gargekoba. Ariya kakaj yala braŋosai.

<sup>12</sup> Onaqa Yesus na minjrej, “Niŋgi bosib ingi uyyi.” Aŋgro bei na yala nenemyosai, “Ni tamo yai?” Degosai. Naŋgi qalie, di naŋgo Tamo Koba.

<sup>13</sup> Onaqa Yesus a ɣamyuwo jojomysiq a bem ti qe ti di osiq naŋgi anainjronaq uyeb.

<sup>14</sup> Yesus a subq na tigelosiqa aqa aŋgro naŋgoq di brantoaiyeltej. Bini qalubqo.

*Yesus na Pita minjej, “Ni ijo kaja du du naŋgi gereinjrime”*

<sup>15</sup> Naŋgi ingi uynab koboonaqa Yesus na Saimon Pita nenemyej, “O Saimon, Jon aqa ɣiri, ni ijo aŋgro kalil naŋgi buŋnjrsimqa ni segi e tulan qalaqalaibeqnum e?” Onaqa Pita na minjej,

“Od, Tamo Koba, ni qalieonum, e ni qalaqalaimeqnum.” Onaqa Yesus na minjej, “Ni ijo kaja du du naŋgi gereinjrine.”

<sup>16</sup> Osiqa olo Pita nenemyej, “O Saimon, Jon aqa njiri, ni e tulaŋ qalaqalaibeqnum e?” Onaqa Pita na minjej, “Od, Tamo Koba, ni qalieonum, e ni qalaqalaimeqnum.” Onaqa Yesus na minjej, “Ni ijo kaja naŋgi taqatnjrine.”

<sup>17</sup> Osiqa olo nenemyej, “O Saimon, Jon aqa njiri, ni e qalaqalaibeqnum e?” Yesus na Pita anjam di nenemyoqalubtej deqa Pita a are gulbeiyonaq minjej, “O Tamo Koba, ni kumbra kalil qa qalie. Deqa ni qalieonum, e ni qalaqalaimeqnum.” Onaqa Yesus na olo minjej, “Ni ijo kaja naŋgi gereinjrine.”

<sup>18</sup> “O Pita, e bole mermqai. Ni aŋgro wala sosimqa ni ino segi areqalo dauryoqnsim sawa ni gilqajqa are soqnej qaji deq giloqnem. Ariya bunuqna ni qeliosimqa ino banj aiyel soqtim tamo bei na ni tontmosim sawa ni gilqajqa asgimqas qaji deq osi gilqas.”

<sup>19</sup> Pita aqa moiqajqa gam di Yesus na ubtosiqa degsi minjej. Pita a gam dena moiylim Qotei aqa ñam goge oqwas. Pita a di qalieqajqa deqa Yesus na degsi minjej. Osiqa Pita minjej, “Ni e daurbe.”

### *Anjam getento*

<sup>20</sup> Osiqa Yesus a Pita ombla walweloqnsibqa Pita a bulosiqa aŋgro Yesus na tulaŋ qalaqalaiyognej qaji a naŋgi aiyel daurnjreqnaq unej. Aŋgro di agi nami Yesus aqa aŋgro naŋgi koba na ingi uyqnsibqa a Yesus beteryosiq nenemyej, “O Tamo

Koba, aŋgro yai na ni osim jeu tamo naŋgo baŋq di atqas?"

<sup>21</sup> Deqa Pita a aŋgro di unsiqa Yesus nenemyej, "O Tamo Koba, bunuqna ino aŋgro di a kumbra kiye turqas?"

<sup>22</sup> Onaqa Yesus na Pita minjej, "Aŋgro di a moiyo-saisoqnimqa e olo bqai degsi minjitqa ni deqa are koba qalaim. Di ino wau sai. Di ijo wau. Ni e daurbe."

<sup>23</sup> Yesus na Pita degsi minjej. Deqa aŋgro di a moiqasai anjam di sawa sawaq gileqnaqa Kristen was kalil naŋgi quoqneb. Aŋgro di a moiqasai Yesus na Pita degsi minjosai. A na minjej, "Aŋgro di a moiyo-saisoqnimqa e olo bqai degsi minjitqa ni deqa are koba qalaim."

<sup>24</sup> Yesus aqa aŋgro di agi e segi. E na anjam endi neŋgreŋyonum. E ijo segi ɻamdamu na Yesus aqa kumbra kalil endi unsim deqa neŋgreŋyonum. Iga qalieonum, ijo anjam endi bole.

<sup>25</sup> Yesus a mandamq endi sosiqa a kumbra tulanq gargekoba yoqnej. Deqa e are qalonum, Yesus aqa kumbra kalil deqa neŋgreŋyqom di buk tulanq tumbol kobaosim sawa sawa kalilq di maqosim sawa atqa keresaiqas.

**Yesus Aqa Anjam Bole 2000  
The New Testament in the Anjam language of Papua  
New Guinea, 2000 edition  
Nupela Testamen long tokples Anjam long Niugini,  
2000**

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

---

PDF generated using Haiola and XeLaTeX on 28 Dec 2024 from source files dated 31 Aug 2023

6bd977a8-0139-583b-a367-c04faf6223cc